

Muselu Wapama wa Yesu Kirixtu woolebiwa ni Luka

Madhu oovolowana

Niivuru ndda nilebiwe ni Luka. Luka aali namugu oAziya Mung'onong'ono adhowile alabaga vamohi ni murumiwi Pawulo. Ahisuuza onamoona wa athu aji-nji ayene yamvelelesa Yesu eeddaga mwiilaboni. Niivuru ndda nilebiwe muwari mwa yaaka ya 60 ofiyedha 64 Kirixtu agabaliwe.

Luka kaali muZhudewu, alebele wa aKirixtu amohi yahaali aZhudewu wi aliwa ekalena yooromela wi ele yasuuzihiwiwa yaali ebaribari. Oliye afunile aakulele wi Mulugu ahisasanyedha wambeela wale wi ale yahaali aZhudewu teto yeere ovolowa mu oMwene wa Mulugu.

Niivuru ndda nnasuuziha wi Yesu oneere owela mbwenye ela kineereye mowaaguvamwene. Ooromela yeeddege ejjihedhaga odha waaye.

Ogawanyeya wa niivuru

Mwaha wa niivuru *1.1-4.*

Obaliwa wa Zhuwawu Namabathiza ni wa Yesu *1.5 ofiyedha 2.52.*

Mabasa a Zhuwawu Namabathiza *3.1-20.*

Yesu onosasanyedheliwa mabasa aaye *3.21 ofiyedha 4.13.*

Yesu oGalileya *4.14 ofiyedha 9.50.*

Olenddo wa Yesu wookuma oGalileya odhowa oZheruzalemi *9.51 ofiyedha 19.44.*

Sumaana yoogomihedha oZheruzalemi *19.45 ofiyedha 21.38.*

Okwa, ovenyihiwa ni ogwela wa Yesu *22.1 ofiyedha 24.53.*

Madhu ovolowana

1 ¹ Wa Tiyofilu ooriiheya, athu ajinjeene yahisayela osasanyedha bili ya dhego dheereyile^a vaari va hiyo. ² Aliwa yahileba dhedho dhaaddeliwiisu ni athu yoonile vameentoni okuma omambeelelo, olaleyaga. ³ Miyo goosayela-sayela dhego dhaatedhene dhedhi moohariha pama, okuma omambeelelo guhuubuwelela teto wi giire wuulebela we Tiyofilu dhowiireya nda moosasanyedha pama. ⁴ Gihiirana dhedho wi munone wi dhisuuziliinyu seebaribari.

Obaliwa wa Zhuwawu Namabathiza wahivuhuleliwa

⁵ Mudhidhi oyene Heroddi, agali mwene a oZhudeya, wahi-kala namakutha, ndina naaye eeriwa Zakariya. Aali a nikuru na anamakutha a Abiya. Mwihiyanaaye eeriwa Ezabeli, aali a nihimo na Aroni. ⁶ Aabiileene yaali owogoowa mirima vameentoni va Mulugu, yoohariha mowaakwanela malamulo ni magano a Nabwiya. ⁷ Kayanna mwaana, vovi Ezabeli kaabala. Aabiileene yaali owululeene.

⁸ Nlabo nimohi Zakariya ahiddaga mabasa aaye onamakutha vameentoni va Mulugu. Waali mudhidhi wa nikuru naaye na onamakutha nowiimelela, ⁹ mooharihedha mukalelo weewa wa onamakutha, ahimoreliwa gari moosakuliwa ovolowa mburo woweela wa Nabwiya wi apahe libani na mukutho.

¹⁰ Mudhidhi oyene, athu aatene yakala ode olobelaga. ¹¹ Mungero a Nabwiya ahidha vowambeela, wiimela omoononi wooja wiibuwa-ni wapahiwa dhoonukwela dha mukutho. ¹² Zakariya agamoonile ahirurumuwaga ni woova. ¹³ Mungero ahimwiirelaga: “Zakariya, kawoove! Vovi malobelo aawo ehiiweya. Mwihiyanaawo Ezabeli oneere ombala mwaana, oyene onamuthwiwe ndina na Zhuwawu. ¹⁴ Oliye onaakale ohagalala ni oteyela wa we, ajinji eneere odhiveliwa ni obaliwa waaye. ¹⁵ Vovi oliye onaakale mulubale vameentoni va Nabwiya. Kadha ang'wa yoong'wa yoolezeliha, onaakale oodhaaliwa ni Muneba Woweela, naari ahinabaliwe.^b ¹⁶ Onodha aatthwaruse amwaana Ezarayeli ajinjeene wa Nabwiya Mulugu aaye. ¹⁷ Vano oneere okala vasogolo va Nabwiya mmunebani ni kopolo dha Eliyazi wi atthwaruse mirima dha ababiinya wa aniiwa, aatthwaruse avuruvuru wi ekanne nthakwithakwi na athu ooharihamo, aasasanyedhe athu wa Nabwiya nlogo nooharihamo”.

^a 1.1 Naari wi: *dharumeedhiwe ni ebaribari*. ^b 1.15 Naari wi: *okumela mbaani mwa amaaye*.

¹⁸Nuwindo, Zakariya ahimukoha mungero, wiira: “Ginanone addi dhedho, vovi miyo ni mwihiyanaaga nuhuuluvala?”

¹⁹Mungero ahimwaakulaga, wiira: “Miyo gili Gabiriyeli, gineemelela vameentoni va Mulugu. Ogirumile duuliyeeene wi giwoge ni we ni wudheelana Muselu Wapama. ²⁰Woone vovi kuroromele madhu aaga, oneere okala oohuwoga ofiyedha nlabo nenddo dhineereye nda”.

²¹Athu yoomujehhaga Zakariya, etikinaga ni mwaha wooribeliwa mu nyuba ya Mulugu. ²²Agakumile kaakwanihile waawogana. Aliwa onone-lamo wi ohooneyeliwa omburoni woweela. Zakariya awoga ni madada, baahi. Kaanda okumiha madhu.

²³Dhahipadduwa egaakwanile malabo a mabasa aaye ahiwelela vaade. ²⁴Nuwindo, egavirile malabo ayene Ezabeli ahikanna wari, ofiyedha mweeri mitanu kaavenya vaade. ²⁵Ezabeli ahiiraga: “Ndala Nabwiya ohiirana wa miyo, ohudhiveliwa ni miyo, ohumaaliha manyazo yanna miyo vaari va athu”.

Obaliwa wa Yesu wahivuhuleliwa

²⁶Vigavirile mweeri mitanu na mmohi Ezabeli aganna wari, mungero Gabiriyeli ahirumiwa ni Mulugu murudda wa elabo ya oGalileya nluwa na oNazarethi. Wewo wadhowiliye omfwanya namwali, eeriwa Mariya. ²⁷Oyene ahaamunonile mulobwana. Athomeliwe ni mulobwana, eeriwa Zhuuze, aali a nlogo na mwene Davidi. ²⁸Mungero agafiyile, ahimulojela-ga, wiira: “We ohukanna mahala! Nabwiya oli ni we”.

²⁹Mariya ageewile ahisimwelaga vajinjivene, wuubuwelaga, eeraga: “Olojela wula onatapulela ddi?” ³⁰Mungero ole omwiirela:

“Mariya, kawoove.

Weevo ohufwanya mahala a Mulugu.

³¹*Oneere okalana wari.*

*Onombala mwaana-pongwe,
oyene oneere omuthwa ndina na Yesu.*

³²*Onaakale mulubale, akopolo.*

*Oneethaniwege Mwaana a Mudhulu-dhulu.
Nabwiya Mulugu oneere omvaha
othonga wa babe Davidi.*

³³*Oneerege othonga nlogo na Yakobo okala ni okala.*

Omwene waaye kudha omala”.

³⁴Mariya ahiwogaga, wiira: “Dhinaandeye addi dhedhi vovi miyo kagimunonile mulobwana?”

³⁵Mungero ahimwaakula, wiira: “Muneba Woweela oneere wuukitela kopolo dha Mudhulu-dhulu dhinowuukuneela ni murinti waaye. Vovi Oweela onabaliwe mwa we oneeriwege Mwaana a Mulugu.^c ³⁶Woone, mmudhi aawo

^c 1.35 Naari wi: vovi mwaana onaabaliwe oneeriwege oweela Mwaana a Mulugu.

Ezabeli nuliyeene ohukanna wari. Onomujejiha mwaana-pongwe, ola bu mweeri wa neetanu na mmohi. Oliye agali owuuluvaleene, oyene athu aatene yamwiiriwa muliba ohubala. ³⁷Vowi ni Mulugu kilivo ehinaandeya”.

³⁸Vano Mariya omwaakulaga, wiira: “Gili va, mwiimeleli a Nabwiya. Dhiireye wa miyo dhaatedhene mooligana ni madhu eenyu”. Vano mungero ovenyavo veemeliligiye.

Mariya onomweeddela Ezabeli

³⁹Malabo alene Mariya ahivenyaga mowaaguva odhowa nluwa na oZhudeya murudda wo mwaangoni. ⁴⁰Ovolowa mba mwa Zakariya, omulojela Ezabeli. ⁴¹Ezabeli ageewile olojela wa Mariya, mwaanaya ahiikahinyaga mbaani mwa amaaye. Ezabeli teto ahidhaaleliwaga Muneba Woweela. ⁴²Ahiwogaga ni ndhu nootaama, wiira:

*“Oreelihiwa di nyo
vaari va ahiyana;
yoreelihiwa si yoovaha ya
mbaani mweenyu!*

⁴³Asaa! Dhaandeyile addi wi amaaye a Nabwiya aaga, egeeddele miyo?

⁴⁴Vowi viiwilliimi olojela weenyu, mwaana ohiikahinya volubalevene ni ohagalala mbaani mwaaga. ⁴⁵Muli ooreelihiwa mwaha woororomela wi Nabwiya dhuwaaddeliyeni, dhineere wiireya!”

Jibo ya Mariya

⁴⁶Nuwindo, Mariya ahiiraga:

“Egumi yaaga enomuriha Nabwiya,

⁴⁷*muneba waaga onohagalala
mwa Mulugu, Mvulumusi aaga.*

⁴⁸*Vowi ohoona wiiveviha wa mwiimeleli aaye.*

*Okuma dhiinova odhowa osogolo ni anamabaliwelamo
aatene enagiirege ooreelihiwa ⁴⁹mwaha wi
oowodha ohugiirela dhego dhuulubale.*

Oweela thili ndina naaye.

⁵⁰*Thagaraga dhaaye dhinowaafiyedha
anamabaliwelamo aatene, alene enamuriha.*

⁵¹*Ohaabalalesa ni moonoo waaye owiithukula,
ni moobuwelelo eewa oovirigana.*

⁵²*Ohaakitiha mamwene mumpanddoni mweewa,
waagweliha owiiveviha.*

⁵³*Ohaarubaliha ni dhapama aliba dala,
waapaganya ehinna yego ooreela.*

⁵⁴*Ohumukamihedha Ezarayeli mwiimeleli aaye,
kaddiwaalele thagaraga dhaaye ⁵⁵wa Abarahamu*

*ni anamabaliwelamo aaye okala ni okala,
wona aroromelihiye makolo eehu”.*

⁵⁶Mariya ahikala ni Ezabeli mweeri dhowaakwana miraaru. Vano owelela vaade vaaye.

Obaliwa wa Zhuwawu Namabathiza

⁵⁷Mudhidhi ogaakwanile wowi Ezabeli abale, ahimbala mwaana-mulobwana. ⁵⁸Amwaaddamani ni amudhi aaye egeewile wi Nabwiya ohumweeddiwela thagaraga voolubalevene, yahihagalala ni oliye.

⁵⁹Vigavirile malabo matanu ni maraaru yahimudhowana mwaana wi eeneliwe yafunaga emuthwe ndina na babe, Zakariya. ⁶⁰Amaaye yahaa-kulaga, wiira: “Naari! Eeriwege Zhuwawu”. ⁶¹Yahimwiirelaga: “Amudhi aawo kalivo winna ndina nenddo”.

⁶²Omukoha babe a mwaana ni madada wi ki mwaana ola eeriwege aani. ⁶³Ahilobaga ntabwa olebavo: “Ndina naaye di Zhuwawu”. ⁶⁴Mo-waaguva mulomo waaye wahifuguwaga, nlumi otapuwa, owogaga, amutamaalaga Mulugu. ⁶⁵Wahikalaga woova wa amwaaddamani aatene a Zakariya ni murudda dhaatedhene dha omwaangoni dha oZhudeya, dhoowogiwa dhowiireya nde. ⁶⁶Aatene yeewile nde yoologolela mmirmani, yiiraga: “Mwaana ola onaakale aani?” Mwaha wi kopolo dha Mulugu dhaali ni oliye.

Jibo ya Zakariya

⁶⁷Zakariya, babe Zhuwawu, ahidhaaliwa Muneba Woweela wambeela ovuwiha mutheenga ola, eeraga:

⁶⁸“Ootamaaliwa akale Nabwiya,
Mulugu a wEzarayeli,

wowi oheeddela ni woobola nlogo naaye.

⁶⁹ Ohunivenyihedha ovulumusa wa kopolo,
odheela vaade va Davidi, mwimeleli aaye.

⁷⁰ (Wona Mulugu mwawogeliye odheela
vamulomoni vanamavuhulela oweela murima
okuma wale-wale.)

⁷¹ Wi eere onoobola wa amwiiddani eehu
mmadadani mwa aatene alene enanaaba.

⁷² Ohooneyiha thagaraga dhaaye wa makolo eehu,
wuubuwelela nipangano no waandana
woopanganela waaye woweela,

⁷³ Olibela wamwiireliye babiihu Abarhamu:

⁷⁴ Wi eere onivulumusa mmadadani mwa,
amwiiddani eehu wi nimweebedhege nihoovaga,

⁷⁵ moweela mirima ni wiiwelela vameentoni vaaye

malabo maatene a egumi yeehu.

76 *We mwaanaga, oneerege wiithaniwa
namavuhulela a Mudhulu-dhulu.*

*Vowi oneere odhowa vasogolo va Nabwiya
wi osasanyedhe dila yaaye.*

77 *Ni waalaleyela athu a Mulugu ovulumusiwa weewa
odheela mooleveleliwa dhoothega dheewa,*

78 *vowi Mulugu eehu dathagaraga,
ohuneeddelo okumela odhulu
wona ofuwa wa nduwa, 79 wi naamoneyele ale
enedda mwiipipini ni murinti wookwa,
wi aasogolele manyalo eehu mundila ya murenddele”.*

80 Mwaana ole owunnuwa ni oliba mwa muneba, ahikala mwiidde-
ddereni ofiyedha nlabo nenddo neyooneyihiliye wa Ezarayeli wona
pogo.

Obaliwa wa Yesu
(Matewuzhi 1.18-25)

2 ¹Mudhidhi olene ahikalawo kingi mulubale a elabo yaatene,^d eeriwa
Aguxtu. Ahivuwiha nlamulo neeriliye wi athu aatene elebeliwe.
²(Vano waali olebela wowambeela, Kurenio aaliye kuminadori a elabo
ya oSiriya.) ³Vano athu aatene yahidhowa kadda muthu mudhi woobali-
wela wi yalebeliwe.

⁴Mwaha wa ela, Zhuuze ahivenya mudhi wa oNazarethi wa oGalileya.
Odhowa nluwa na oBetelemi, oZhudeya, wewo wabaliwe kingi Davidi.
Vowi oliye aali a nlogo na Davidi. ⁵Ahidhowa wi alebeliwe ni mwihya-
naaye Mariya, aganna wari.

⁶Zhuuze ni Mariya egali oBetelemi wewule, wahifiya mudhidhi wowi
oliye abale. ⁷Ahimbala mwaanaye, mwaana-pongwe owambeela. Ahi-
muhuruwedha mwaanaye ni guwo. Omukonaantiha munigulani mwajela
aneenyama munikolani mwemo pwagoniwa, mwaha wi suubi a aleddo
kamwaali mburo.

Amakambuzi a mabila ni angero

⁸Mmuruddani mule yahikalamo amakambuzi a mabila. Ayene
yawang'anelaga aneenyama eewa ni mahiyu. ⁹Vano vowaaguva
mungero a Nabwiya Mulugu ahifiya vameentoni veewa. Mungero
ole agafiyile, waara wa nthithimiho na Nabwiya Mulugu wahaa-
moneyelaga vaaligiisu, aliwa yahirurumuwa ni woova. ¹⁰Vano

^d 2.1 Naari wi: *Sezari*.

mungero ahiwogaga ni aliwa, wiira: “Ee! Kamoove! Guhudhelanaani Muselu Wapama, oyene onavahe odhiveliwa wuulubale athu aatene. ¹¹ Vuruwanani, museluya buula: Muhubaliweliwa peeno veva, muluwani na Davidi, Mvulumusi, Kirixtu^e ole aroromelihiwe, Nabwiya. ¹² Yoonihedhoya enaakale ela: mu-neere omfwanya mwaana agabaliwe ohuruwedhiwe ni guwo, okonaantihiwe munigulani moojela aneenyama”.

¹³ Vano vovaaguvavene, yahifiya angero ajinji anyakoddo a odhulu, yegi omutamaala Mulugu ni madhu ala:

¹⁴ “*Athithimihiwe Mulugu odhulu woolapesesa, murenddele elabo ya vati wa athu alene Mulugu enaadhiveliye*”.

¹⁵ Vano dhahipadduwa angero egavenyile vameentoni va amakambuzi a mabila, odhowa odhulu, yegi owoga mmohi ni mukwaaye: “Kabeni dhiinoveva oBetelemi noone dhedho dhipadduwile dhinoonihile Nabwiya Mulugu”.

¹⁶ Vano yahimaruwaga mowaaguva edhowaga oBetelemi. Yahimfwanyaga Mariya ni Zhuuze, egamukonaantihile mwaana munigulani. ¹⁷ Vano egamoonile mwaanaya, yahambeelaga olaleya muselu wawaaddelile mungero mwaha wa mwaana ole. ¹⁸ Vano athu aatene yeewaga dhende, dhalaleyaga amakambuzi a mabila, yahitikinaga. ¹⁹ Vano Mariya oologolelaga nda mmurimani apimaga, asayelaga ononelamo. ²⁰ Vano amakambuzi a mabila ale yahimaruwaga owelela mundduli. Edhowaga mundila yegi omuthithimiha emutamaalaga Mulugu, mwaha wa dhaatedhene dhedho dheewiliwa wona mwaaddeliwiisu.

Yesu onodhowiwana nyuba ya Mulugu

²¹ Egavirile malabo matanu ni maraaruru mwaanaya ahiineliwa mooligana ni mMalamuloni a Mozezi. Ageeneliwe yahimuthwa ndina na “Yesu” wona mwawogele mungero Mariya ahinakanne wari.

²² Egaakwanile malabo oweelihiwa wona Malamulo a Mozezi yahimuthukulelaga mwaanaya oZheruzalemi wi oonihwe wa Nabwiya, ²³ (Wona mulebeliwiwa mMalamuloni a Nabwiya: “Ana-pongwe aatene owambeela eneerege oveleliwa wa Nabwiya”,^f) ²⁴ ni mvahi wa mukutho wona dhilebiwe mMalamuloni a Nabwiya: “Paara emohi ya maziya naari kangayiwa biili dhing'onong'ono”.^g

²⁵ OZheruzalemi wahikala mulobwana oyene eeriwa Simiyawu. Oliye aali oohariha, oomoova Mulugu. Oojejihedha wooboliwa wa Ezarayeli. Muneba Woweela waali ni oliye. ²⁶ Wahimvuhulela Muneba Woweela wi

^e 2.11 Kirixtu mu ewogelo ya eGerego enatapulela *Muthikitheliwi, Misiya*, naari wi: *oosakuliwa a Mulugu*, oyene onaavulumuse athu. Moone teto verisikulu 26. ^f 2.23 Okuma 13.2,12 ^g 2.24 Levitiku 12.8

kanaakwe ahimoonile Kirixtu ole aroromelihiwe ni Nabwiya. ²⁷Moosogoleliwa ni Muneba Woweela ahivolowaga nyuba ya Mulugu. Ababiinya a mwaana yahimudhowana Yesu wi yaakwanelihe dhaatedhene dhilebiwe mMalamuloni dhooligana ni mwaana abaliwa. ²⁸Egamfiyilena wule, Simiyawu ahimuthukulaga mwaana mmadadani mwaaye, omutamaalela Mulugu eeraga:

²⁹ *“Vano Nabwiya, gipaganyeni ni murenddele miyo, mwiimeleli eenyu, wona mwagiroromelihe nyo.*

³⁰ *Mwaha wi dhiinova meento aaga ehoona ovulumusa weenyu,*

³¹ *wewo osasanyedhe nyo vameentoni va athu aatene,*

³² *waara wi waamoneyele athu a milogo dhimohi^h dinavaha nthithimiho wa nlogo neenyu Ezarayeli”.*

³³ Ababe ni amaaye a Yesu yootikinaga dhawogaga Simiyawu dha mwaanaya. ³⁴ Simiyawu ahaareeliha, wiira wa Mariya, amaaye a Yesu: “Mwaana ola ohusakuliwa wi akale totela yootongwa naari ovenya wa athu ajinji mu Ezarayeli, onaakale etoonyihedho yoovaanyihana. ³⁵ Oliyeye onodha ooneyihe moobuwelelo a mmirimani mwa athu ajinjeene. Nyo mmani okubanya onodha olate murima weenyu wona supaadda”.

³⁶ Wahikala namavuhulela mmohi a mwihiyana eeriwa Anna mwaana a Fanuweli a nlogo na Azeri. Aali owuuluvaleene agateliwe akalile yaaka tanu nabiili. ³⁷ Nuwindo, okala maamukwele yaaka makumi mataanu ni maraaru ni yaaka nnayi (84). Kaavenyamo munyuba ya Mulugu, mbwenye oweebedha mahiyu ni mutana ni othuga. ³⁸ Vano mudhidhi mmohive olene ahimutamaalelaga Mulugu, awogaga dha nriiho na mwaanaya wa ale aatene yajejihedha wooboliwa wa Zheruzalemi.

³⁹ Egamalile oharihamo dhawoga Malamulo a Nabwiya yahiwelela o Galileya oluwani weewa, oNazarethi. ⁴⁰ Mwaanaya owunnuwa ni odhaaliwa tthottho, mahala a Mulugu yaali ni oliye.

Muzombwe Yesu munyuba ya Mulugu

⁴¹ Yaaka ni yaaka ababiinya a mwaana yoodhowesa oZheruzalemi, Omamuthabelelo Paxkwa.ⁱ ⁴² Yesu agaakwanihile yaaka kumi ni biili, aliwa yahidhowa oZheruzalemi omathangani wona moolemeelela. ⁴³ Egamalile malabo a mathanga, ewelagawo, Yesu ahihalaga oZheruzalemi, ababiinya ehinonaga. ⁴⁴ Yuubuwelelaga wi oli ni akwaaye a muulenddoni, yaheeddaga nlabo naatenene nuwindo wambeela omusayela mwa amudhi eewa ni mwa ale yamunonile, ⁴⁵ yahamfwanyiligiisu

^h 2.32 Ala bi ayene yahaali aZhudewu. ⁱ 2.41 Paxkwa yaali mathanga oofuneyesesa a aZhudewu. Moone Okuma 12.1-27. Vowi Yesu avenyihile nlabo nenddo na Paxkwa, hiyo dhiinova Paxkwa eehu nnathabela ovenyihwa wa Yesu muukwani.

yahiwelelaga oZheruzalemi wi yamusayelege. ⁴⁶Vigavirile malabo maraaruru yahimfwanyaga munyuba ya Mulugu agakaraatile vaari va anamasuuziha a Malamulo avuruwanaga, akohaga. ⁴⁷Aatene alene yamwiiwaga yootikinaga vajinjivene dha ononelamo waaye ni maakulelo aaye. ⁴⁸Mowaaguva ababiinya egamoonile yaaligi ootikiniheya, amaaye yahimwiirelaga: “Mwaanaga, wiiriliwe ela ni hiyo ddi? Ababo ni miyo nahisimwela ni wuusayela”.

⁴⁹Oliye ahawaakulaga, wiira: “Mwahaya bwaddi mwagisayelesiinyu? Kamunonile wi eli yoofuneya wi gikalenge vaade va ababa?” ⁵⁰Mbwenye aliwa kayeweelagamo yawaaddeligiiye.

⁵¹Omaruwa vamohi ni aliwa odhowaga oNazarethi. Amaaye yoolo-golela dhego dhaatedhene dhedhi mmurimani. ⁵²Yesu owunnuwa ni tthotho ni mahala, vameentoni va Mulugu ni va athu.

Zhuwawu Namabathiza onosasanyedha dila ya Yesu Kirixtu
(*Matewuzhi 3.1-12; Maruku 1.2-8*)

3 ¹Vowaakwana yaaka kumi ni tanu dha omwene wa Tibeeriyo Sezari, Pontiyo Pilatu agali kuminadori a oZhudeya, Heroddi agali namathonga^j a elabo ya oGalileya, ddibile Filipi aali namathonga a elabo yo Etureya ni Taroniti, Lusaniya aali namathonga a elabo yo Abilene, ²Annasi ni Kayifa yaali asogoleli a anamakutha, mudhidhi oyene yahidha madhu a Mulugu wa Zhuwawu, mwaana a Zakariya. ³Zhuwawu aheddedda mirudda dhaatedhene dha seresere ya mwihinje Zhordawu alaleyaga wi ebathiziwe etthwaruwaga wi eleveleliwe mwa dhoothega. ⁴Wona mwalebeliwiwa muniivuruni na madhu a namavuhulela Ezaya, eera:

*“Ndhu na muthu nnakuwa mwiideddereni:
‘Sasanyedhani rampa wi Nabwiya aviremo,
mogolele dila yaaye.*

⁵*Maddiba maatene evuheleliwe,
mwaango dhaatedhene ni thuthuma dhiliganelihiwe
dila dhookoromana dhineere wogooliwa.
Muli magologodha muliganelihiwe.*

⁶*Athu aatene eneere woona ovulumusa wa Mulugu!* ^k

⁷Anamwinji yoodhowaga wi yabathiziwe. Zhuwawu oowoga, eeraga: “Nyo mulogo wa dhivili! Wuwaaddeleni baani othawa owali wa Mulugu onafuna odha? ⁸Mwihidde mabasa owooneyiha wi muhutthwaruwa dhoothega dheenyu. Mmirimani mweenyu muhuubuwelege owoga, wiira: ‘Nihikanna babiihu Abarhamu’. Mbwenye miyo ginowuwaadde-

^j 3.1 Naari wi: *tetararaka*. *Namathonga* eeriwa tetararaka, athonga epaddi ya nennayi ya murudda mmohi. Moone teto verisikulu 19. ^k 3.6 Ezaya 40.3-5

lani wi Mulugu onowaanda, waasaddula mabwe alena wi ekale ahima a Abarahamu. ⁹Badho ehipanihiwa wi egwaddena misisi dha mithanko. Mithanko dhaatedhene dhihinavaha dhoovaha dhapama dhineere okakattiwa wi dhivokedhiwe vamunddoni”.

¹⁰Nuwindo, anamwinji yahimukohaga, yiiraga: “Hiyo nneere ddi?”

¹¹Zhuwawu ahaakulaga, eeraga: “Ole winna maleya meenddi, amvache nimohi ole ohinna. Ole winna yooja, eerena emodha-modhave”.

¹²Yahifiyaga anamakoha-musoko^l wi ebathiziwe. Yoomukohaga, yiiraga: “Namasuuziha, ki nneerege ddi?”

¹³Ahawaakulaga, eeraga: “Naari kamweenjedhedhege okwaranyiha mwaaddeleliwiinyu”.

¹⁴Teto anyakoddo yahimukohaga, yiiraga: “Ki hiyo, nneerege ddi?”

Oliye ahawaakulaga: “Kammwaaakege muthu korowa dhaaye moomuthuusa, kammurathelege muthu. Mudhiveliwege ni yooliveliwa yeenyu”.

¹⁵Mudhidhi oyene athu yoomujejihedha Kirixtu ole aromelihiwe,^m yowiikohaga weekiwa akala Zhuwawu daali Kirixtu. ¹⁶Zhuwawu ahaawaakulaga aatene: “Miyu, epaddi yaaga, ginowuubathizani ni mahinje, mbwenye onodha oowodha onagikwaranya naari kagifwaneelele otapula mingoyi dha sapathe dhaaye. Oliye oneerege wuubathizani ni Muneba Woweela ni munddo. ¹⁷Etelo yaaye eli mmadadani wi amveethena tiringu, amulogolele vatatani, aakahe makataya ni munddo woohuthima”.

¹⁸Nuwindo, oolaleya Muselu Wapama aalibihaga ni madhu majinjeene.

¹⁹Vano Zhuwawu agamusumulule namathonga a murudda, Heroddi ole mwaha woomutela Heroddiya, mwadha ddibile ni dhabure dhimohi dheeriliyena, ²⁰Heroddi aheenjedhedha dhabure dhimohi voomuhela Zhuwawu mukaambura.

Obathiziwa ni makolo a Yesu

(*Matewuzhi 1.1-17; 3.13-17; Maruku 1.9-11*)

²¹Dhahipadduwa athu aatene ebathiziwaga teto ahibathiziwa Yesu. Alobelaga odhulu wahithuleyaga. ²²Muneba Woweela ni ekalelo ya kangayiwa wahikitelaga va oliye. Vevale odhulu wahiiweya ndhu niiraga: “We oli Mwaanaga, oodhivela aaga, mwa we ginohagalala”.

²³Yesu, aganna yaaka dhowaakwana makumi maraaru, ahambeela mabasa aaye. Aali, wona mweereliisu, mwaana a Zhuuze, mwaana a Eli, ²⁴Eli mwaana a Mathati,

^l 3.12 *Anamakoha-musoko* Ala aEzarayeli aatene yawoona wona “anamathega.” Yanna mukalelo wabure vameentoni va athu, mwaha wi yamulabela guveruno a oRoma aali mwiiddani a Ezarayeli. Moone teto Luka 5.27,29-30; 7.29,34; 15.1; 18.10,11,13; 19.2.

^m 3.15 *Kirixtu* mu ewogole mu eGerego enatapulela *Muthikitheliwi, Misiya*, naari wi: *oosakuliwa a Mulugu*, oyene onaavulumuse athu.

- Mathati mwaana a Leevi, Leevi mwaana a Meliki,
ola di mwaana a Yannayi, mwaana a Zhuuze,
- 25 Zhuuze mwaana a Matathiya,
Matathiya mwaana a Amosi, Amosi mwaana a Nahumi,
ola di mwaana a Esili, mwaana a Nagayi,
- 26 Nagayi mwaana a Maathi,
Maathi mwaana a Matathiya,
Matathiya mwaana a Semeyini,
ola di mwaana a Yoseki, mwaana a Yoda,
- 27 Yoda mwaana a Yowanane,
Yowanane mwaana a Resa,
Resa mwaana a Zorobabeli,
ola di mwaana a Salatiyeli, mwaana a Neri,
- 28 Neri mwaana a Meliki,
Meliki mwaana a Addi,
Addi mwaana a Kosamu,
ola di mwaana a Elemadamu, mwaana a Eri,
- 29 Eri mwaana a Zhouwe,
Zhouwe mwaana a Eliyezeri,
Eliyezeri mwaana a Yorimu,
ola di mwaana a Matathi, mwaana a Leevi,
- 30 Leevi mwaana a Simiyawu,
Simiyawu mwaana a Zhuda,
Zhuda mwaana a Zhuuze,
ola di mwaana a Yonamu, mwaana a Eliyakimu,
- 31 Eliyakimu mwaana a Meleya,
Meleya mwaana a Menna,
Menna mwaana a Matatha,
ola di mwaana a Nathani, mwaana a Davidi,
- 32 Davidi mwaana a Zhesi,
Zhesi mwaana a Obeddi,
Obeddi mwaana a Bowazi,
ola di mwaana a Sala, mwaana a Naxoni,
- 33 Naxoni mwaana a Aminadabi,
Aminadabi mwaana a Adiiimini,
Adiiimini mwaana a Arini,
Arini mwaana a Heziromo,
ola di mwaana a Perezi, mwaana a Zhuda,
- 34 Zhuda mwaana a Yakobo,
Yakobo mwaana a Ezaaki,
Ezaaki mwaana a Abarhamu,
ola di mwaana a Tera, mwaana a Nahori,

- 35 Nahori mwaana a Serugi,
 Serugi mwaana a Ragawu,
 Ragawu mwaana a Pelegi,
 ola di mwaana a Heberi, mwaana a Sela,
- 36 Sela mwaana a Kayinani,
 Kayinani mwaana a Arifaxadi,
 Arifaxadi mwaana a Semu,
 ola di mwaana a Nowe, mwaana a Lameki,
- 37 Lameki mwaana a Methuzalemi,
 Methuzalemi mwaana a Enoki,
 Enoki mwaana a Zharedi,
 ola di mwaana a Mahalaleyele, mwaana a Kayinani,
- 38 Kayinani mwaana a Enooxe,
 Enooxe mwaana a Seti,
 vano ola di mwaana a Adamu,
 mwaana a Mulugu.

Weehiwa wa Yesu mwiideddereni
(Matewuzhi 4.1-11; Maruku 1.12-13)

4 ¹ Yesu agawelilewo omwihinjeni Zhordawu ahidhaaleliwa ni Muneba Woweela. Muneba mmohive wahimuthukulela mwiideddereni ² mowaakwana malabo makumi mannayi, wewule eehiwaga ni Sathana. Kaaja yego malabo alene. Omamalelo wiwa ahikalana dala.

³ Nuwindo, Sathana ahimwaaddamela, wiira: “Akala oli Mwaana a Mulugu wiirele nibwe ndda nsadduwe nikale mukaathe”.

⁴ Mbwenye Yesu ahimwaakulaga, wiira: “Maleba Ootaleleya enawoga wi: *‘Muthu kanakala ni egumi mwaha wa yooja, baahi, mbwenye onokalawo mwa madhu maatene enakuma odhulu’* ⁿ”.

⁵ Nuwindo, Sathana ankeene ahimuthukulaga Yesu omudhowana mwaango wootaama omooniha omwene dhaatene dha mwiilaboni ni nthithimihoniwa. ⁶ Nuwindo, Sathana ahimwiirelaga: “Gineere wuuvaha othonga wula waatene ni nthithimiho neewa, na omwene ola, vovi gihivahiwa, vano ginomvaha oyene ginamfuniimi. ⁷ Wagikokorela, ogeebedha, dhaatedhene dhinakala dhaawo”.

⁸ Yesu ahimwaakulaga, wiira: “Maleba Ootaleleya yiire: *‘Omweebedhege Nabwiya Mulugu aawo, omwiimelelege oliyeeneve, baahi’* ^o”.

⁹ Nuwindo, Sathana ahimuthukulaga Yesu omudhowana oZheruzalemi, omugweliha vadhulu va nyuba ya Mulugu, omwiirela: “Akala oli Mwaana a Mulugu, olupele vati. ¹⁰ Vovi dhihilebiwa wi:

“Mulugu onoodha aalamule angero aaye wi yuwiing’aneleni;

ⁿ 4.4 Deteronomiyo 8.3 ^o 4.8 Deteronomiyo 6.13

¹¹ vano aliwa eneere wuuhiddealani ni madada eewa,
wi manyalo eenyu enadha eporeye ni mabwe' ".^p

¹² Yesu ahimwaakulaga, wiira: "Mbwenye Maleba Ootaleleya yiire:
'Ohumwehe Nabwiya Mulugu aawo' ".^q

¹³ Sathana vagomeliwiye omweeha ahimwihiyaga, ajejihedhaga ofiya mudhidhi wofwanelela.

Yesu onokooggiwa ni athu a oNazarethi

(Matewuzhi 13.53-58; Maruku 6.1-6)

¹⁴ Vano Yesu ahiwelela oGalileya ni owodha wa Muneba Woweela, bili yaaye yahiiweya okumela wewule ni mirudda dhaatedhene dhowaaddamana. ¹⁵ Oosuuziha wewule mu nyuba dha matugumano dha aZhudewu,^r athu aatene yoomutamaala.

¹⁶ Nuwindo, Yesu ahidhowa oNazarethi wewo waleliwiye. Nlabo na sabuddu ahivolowaga nyuba ya matugumano. Wona moolemeelela ahiimelaga wi eelenge. ¹⁷ Yahimwinkaga niivuru na namavuhulela Ezaya. Oliye ofugula,^s ofwanyavo valebiwe madhu ala:

¹⁸ "Muneba wa Mulugu ohugikitela.

Ohugithikithela wi gaalaleyele

Muselu Wapama aliba orabula.

Ogirimile wi gilaleyele wooboliwa

wa athu eli mukaambura,

aliba ohoona wi yoonege,

ni waatapula ale yinna goyi,

¹⁹ *wi gilaleyele yaaka ya mahala a Mulugu".^t*

²⁰ Ageelengile ahifugaga niivuruna, omwinka mwiimeleli, okaraati. Vevale meento a athu aatene yaaligi va oliye, yegi omusugwa. ²¹ Vano Yesu ahambeelaga owoga, wiira: "Dhaatedhene mwiwiliinyu odheela Maleba Ootaleleya, geelengiliimi dhihaakwanela peeno veva".

²² Aatene yoomwiirelaga onamoona ni otikina mwa madhu aaye a mahala, yadheela vamulomoni vaaye. Yookohanaga, yiiraga: "Olaya kahuwo mwaana a Zhuuze?"

²³ Yesu ahawaaddela, wiira: "Moohaanganyedha munodha mugiwogele nigano: 'Nowi we oli namugu, wiiyilihe weeka! Dhaatedhene mwiwiliihu mwiiriliinyuna oKafaranawu, mwiirena owaninyu wuno' ".

^p 4.10-11 Masaalimu 91.11-12 ^q 4.12 Deteronomiyo 6.16 ^r 4.15 Nyuba dha matugumano dha aZhudewu Nda mu ewogelo ya eGerego dheeriwa sinagoga. Mabasa eewa kayaali oolobelamoove, naari osuuzamo Malamulo, mbwenye teto yowaathongamo athu yahaaharihamo Malamulo a aZhudewu. Moone teto maverisikulu 31, 41. ^s 4.17 Naari wi: otapula. ^t 4.18-19 Ezaya 58.6; 61.1-2

²⁴Yesu ahiwogagave, eeraga: “Ebaribareene ginowuwaaddelani wi kalivo namavuhulela naari mmohi, onaakeliwa ni nriiho veelaboni vaaye. ²⁵Ebaribareene ginowuwaaddelani wi mudhidhi wa Eliyazi wahikala amaamukwele ajinjeene muEzarayeli. Wahikala yummi yaaka thaaru ni mweeri mitanu ni mmohi, muzongwe ahirubwaga yahikalawo dala yuulubale elabo yaatene. ²⁶Eliyazi kaarumiwe naari wa amaamukwele ale, ahili maamukwele a oZarapita, waaddamela oSidoni. ²⁷Mudhidhi wa Elizewu, wahikala aliba mareda^u gwee muEzarayeli kaavo naari mmohi eelihiwe ahili Naamani, muSiriya”.

²⁸Athu aatene yaaligi mu nyuba ya matugumano veewiligiwa yahitakaleliwaga vajinji. ²⁹Yahimukumihaga Yesu muluwani omudhowana vadhulu va mwaango wootaama, wewo wamagiliwiwa nluwa neewa ni efunelo yowi yamvokedhe musiddo mooodiia. ³⁰Mbwenye Yesu ahiviraga vaari veewa, ovenyavo.

Yesu onowiigara muneba wootakala
(*Maruku 1.21-28*)

³¹Vano Yesu ahikitelaga oKafaranawu, mudhi mulubale wa oGalileya. Nlabo na sabuddu egi waasuuziha athu munyuba ya matugumano. ³²Athu yootikinaga dhosuuziha dhaaye, vowi yaali madhu oothongi.

³³Ahikalagavo mulobwana mmohi, ahiddiwe ni muneba wootakala. Ahikuwaga ni ndhu nootaama, wiira: ³⁴“Ti! Ninna ddi hiyo ni nyo,^v Yesu muNazarethi? Mudheele ontolosa? Miyo guhuunonani wi muli Oweela a Mulugu”.

³⁵Yesu ahisumululaga, wiira: “Wiire pee! Okume mwa muthu ola!” Vano muneba wabure ole wahimutongwihedha vati vameentoni va athu aatene, okumamo mwa muthu ole, kuwamporosege.

³⁶Aatene yegi otikina valubalevene, ewogaga muthu ni mukwaaye: “Alaya madhu baani? Enalamula ni owodha vamohi ni kopolo mineba dhootakala wi dhivenyemo, dhivenyagamo”. ³⁷Bili ya Yesu yoovuwa mirudda dhaatedhene dhowaaddamela.

Owodha wa Yesu mwa mineba dhabure ni dhiredda
(*Matewuzhi 8.14-17; Maruku 1.29-38*)

³⁸Yesu ahimaruwaga okuma nyuba ya matugumano, odhowa vaade va Simawu. Omfwanya mbogohi a Simawu ahikalagana goyi mwaha wa nipaddawe nuulubale. Anaamudhi aaye yahimulobaga wi amuyilihe. ³⁹Ahisusedhaga vaaligi muredda, ageemelile, ahilamula wi nipaddawe

^u 4.27 *Mareda* mu ewogelo ya eGerego, kinaagana maredave, mbwenye teto dhiredda dhoohiyana-hiyana dha nikupa na muthu. ^v 4.34 Mu ewogelo ya eGerego onafuna owoge ddi: *Munihiye mmurenddeleni*.

nimwihiye; omwihiya, oyila. Mowaaguva ovenya, wambeela waakamihedha aliwa.

⁴⁰Ociguwoni, athu aatene yegi waadhana wa Yesu alene yannaga dhi-reda dhoohiyana-hiyana. Egi waayiliha, vowaahela madada mmohi ni mmohi. ⁴¹Athu ajinji yegi okuma mineba dhabure, dhikuwaga, dhiiraga: “Nyo muli Mwaana a Mulugu”. Yesu oohiihaga wi dhihiwoge wovi dhahinona wi oliye di Kirixtu” ole aroromelihiwe.

⁴²Ode ogasile, Yesu ahidhowaga mburo mmoheene yeekawo. Anamwinji yoomusayelaga egamfwanyile yahimuwadeelelaga wi ahidhowe. ⁴³Mbwenye oliye ahawaaddelaga, wiira: “Eli yoofuneya wi galaleyele Muselu Wapama wa Omwene wa Mulugu teto mmaluwani mamohi wovi si dhedho girumeliwiimi”. ⁴⁴Vano Yesu oolaleyela mu nyuba dha matugumano dha oZhudeya.^x

Wiithaniwa wa anamasuuzwa owambeela

(*Matewuzhi 4.18-22; Maruku 1.16-20; Zhuwawu 1.35-42*)

5 ¹Nlabo nimohi Yesu ahiimelaga seresere ya Nyaza ya oGenezareti,^y athu ajinji yegi ompinyamina wi yiiwe madhu a Mulugu. ²Oliye ahoonaga mwanddeya miinddi seresere ya nyaza, anamatotaya yahikitagamo, yaahuwaga mathavi eewa. ³Yesu ahigwelaga mmwanddeyani mmohi, waaligi wa Simawu, ahimulobaga wi asusihedhe vang'ono munyaza. Ahikaraatigi, wambeela waasuuziha anamwinji.

⁴Agamalile owoga, ahimwiirelaga Simawu: “Susihedha wooddiha mwaabwinihe mathavi eenyu wi mutote”.

⁵Simawu ahaakulaga, wiira: “Namasuuziha, mahiyu maatene nihilaba kanipile yego. Mbwenye, wovi di nyo munagiruma waabwiniha, miyo ginere orumeedha”.

⁶Egabwinihile mathavi, yahipaga somba dhijinji mathaviya yahambee-laga otaleya. ⁷Yahiraga etoonyihedho wa akwiwa yaaligi mmwanddeyani mmohi wi edhe yaakamihedhe. Aliwa yahidhowaga, odhaaliha mwanddeya dhaamiinddihene ofiyedha ohala vang'ono wi dhibwine.

⁸Simawu Peduru agoonile nde, ahikokoraga vakukuuve ni Yesu, wiira: “Nabwiyani, mususe wa miyo wovi gili namathega”. ⁹Simawu ni akwaaye yahitikinaga menjivelo a somba dhapiligiisu. ¹⁰Tiyago ni Zhuwawu amwaana a Zebedeyo, akwaaye a Simawu teto yahitikinaga vajinjivene. Yesu ahiraga Simawu: “Kawoove! Okuma dhiinova odhowa osogolo onaakale namatota a athu”. ¹¹Mowindo yahisusihedhaga mwanddeya dheewa ode, ohiya dhaatedhene, omuharaga Yesu.

w 4.41 *Kirixtu* mu ewogelo ya eGerego enatapulela *Muthikitheliwi, Misiya*, naari wi: *oosakuliwa a Mulugu*, oyene onaavulumuse athu. x 4.44 Dhoolebiwa ni madada dhimohi dhini: *Galileya*. y 5.1 Ela sowi Nyaza ya oGalileya.

Oyilihiwa wa muliba mareda
(*Matewuzhi 8.1-4; Maruku 1.40-45*)

¹²Dhapadduwile ayi, Yesu aaligi nluwa nimohinene, mwahikala mulobwana mmohi anna mareda^z mwiili waatene. Agamoonile Yesu, ahikokoraga, oworomihedha kove vati, omuloba, wiira: “Nabwiya, nyo muhukanna owodha, mwafuna mugeelihe”.^a

¹³Yesu ahimutapulelaga madada omukahinyana, wiira: “Gihifuna. Kala oweela!” Mudhidhi olene mareda yahimmalelaga.

¹⁴Yesu ahimuthonga, wiira: “Onamwaaddele mmohi; mbwenye odhowe weyoonihedhe wa anamakutha ni ovelela mukutho woweelihiwa waawo wona mwalamulele Mozezi, okale onamoonna wa athu”.

¹⁵Mowindo, bili ya Yesu yoovuweya vajinjivene, athu ajinji yoodha omvuruwanaga ni oyilihiwa dhireda dheewa. ¹⁶Yesu oopoothowesa odhowa mburo mmohi va yeeka, olobelaga.

Yesu onomuyiliha mulobwana ookwa-yaano
(*Matewuzhi 9.1-8; Maruku 2.1-12*)

¹⁷Nlabo nimohi Yesu eeraga osuuziha, aFarizi ni anamasuuziha a malamulo yahikaraatigi mwemule, yadheelege mirudda dhaatedhene dha oGalileya, dha oZhudeya ni dha oZheruzalemi. Owodha wa Nabwiya waaligi ni oliye wi aayilihe aredda. ¹⁸Nuwindo, alobwana amohiwa yahidhaaga yamuthukulege mulobwana mmohi ookwa-yaano emuthebaga vanteteni. Yoosayelaga vomvolowana wi yamurule vameentoni va Yesu. ¹⁹Ehoonile vomvolowana ni mwaha wa anamwinji. Yahigwelaga vadhulu va nyuba mwaaligi Yesu. Ovenyihavo mapalipali, okitelihavo ntete vaari va athu, vameentonivene va Yesu.

²⁰Yesu vowoona nrromelo neewa, ahimwiirelaga muliba okwa-yaano ole: “Mukwaaga, dhoothega dhaawo dhihileveleliwa”.

²¹Anamasuuziha a malamulo ni aFarizi yowuubuvelaga: “Olaya onanyemula dha Mulugu baani? Onalevelela dhoothega, baani? Muluguve, baahi”.

²²Yesu voonona dhoobuweligiisu, ahawiirelaga: “Mmirimani mweenyu munaanganyedhela ddi? ²³Yoohurusa siivi: wiira: ‘Dhoothega dhaawo dhihileveleliwa’, naari wiira: ‘Venya weedde’? ²⁴Mbwenye wi munone miyo, Mwaana a Muthu gihikanna othongi mwiilaboni ya vati woolevelela dhoothega”. Ahimwiirelaga mulobwana ookwa-yaano ole: “Ginowuwaaddela: Ovenye, othukule ntete naawo, odhowege vaade vaawo”. ²⁵Mowaaguva ahivenyaga vameentoni veewa, othukula ntete

^z 5.12 *Mareda* mu ewogelo ya eGerego kinaagana maredave mbwenye teto dhireda dhoohiyana-hiyana dha nikupa na muthu. ^a 5.12 *Mugeelihe* Naari wi: *mugiyilihe*.

vakonaantiligiye owelela vaade, amutamaalaga Mulugu. ²⁶Aatene yahitikiheyaga ni woova, yoomuthithimihaga Mulugu, yiiraga: “Peeno dhoonilihu sootikiniha”.

Yesu onomwithana Leevi

(Matewuzhi 9.9-13; Maruku 2.13-17)

²⁷Dhigeereyile nde, Yesu ahivenyagavo, omoona namakoha-musoko agakaraatile vowaakela korowa, eeriwa Leevi.^b Omwiirela: “Giharege”.

²⁸Leevi ahivenyaga, ohiya dhaatedhene, omuharaga.

²⁹Vano Leevi ahimusasanyedhela Yesu mathanga malubale vaade vaaye. Anamakoha-musoko ajinjeene ni athu amohiwa yaaligi vameeza ni aliwa. ³⁰Mbwenye aFarizi ni anamasuuziha a Malamulo yegi wawaaba anamasuuzi a Yesu. Yahaakohaga, yiiraga: “Munaja ni ong'wa ni anamakoha-musoko ni anamathega alubale mwaha wa ddi?”

³¹Yesu ahawaakulaga, wiira: “Agumi kinamurabulela namugu mbwenye aredda. ³²Kagidheelee wawiithana athu ooharihamo, mbwenye gaadheelee anamathega wi etthwaruwe”.

Yesu onokohiwa mwaha woothuga

(Matewuzhi 9.14-17; Maruku 2.18-22)

³³Vevale aFarizi yahiwogaga ni Yesu, wiira: “Anamasuuzi a Zhuwawu enothuga elobelaga dila biili-biili teto anamasuuzi a aFarizi enowiirana ndo. Mbwenye aawo enooja, enoong'wa”.

³⁴Yesu ahawaaddelaga, wiira: “Akwaaye a namatela enothuga agali vevo namatelaya? Kadhinaandeya! ³⁵Mbwenye nneere ofiya nlabo onavenyihwiiyevo vaari veewa namatelaya, mudhidhi oyene eneerege othuga”.

³⁶Nuwindo, Yesu ahaawogelaga musibe ola, wiira: “Kalivo muthu onatala ecapa ya yoowara exa acapelana yoowara yawale. Era ndo, enoongoeya, yacapeliwana exa, kinafwaneelela ni yawale. ³⁷Kalivo onamuhela vinyu muxa mmathumbani a makupa awale. Era ndo, vinyu muxa onotala mathumbaya; onothathiya vinyuya, mathumbaya enoongoeya. ³⁸Moohiyaniha, vinyu muxa onaheliwa mathumba maxa wi dhaatedhene dhilogoleye. ³⁹Kalivo onamung'wa vinyu awale, amfunaga muxa, vowi oneerege: ‘Awale dili apama’ ”.

Nabwiya a sabuddu

(Matewuzhi 12.1-14; Maruku 2.23 ofiyedha 3.6)

6 ¹Sabuddu mmohi, Yesu aviraga mmiddani mwa tirigu. Anamasuuzi aaye yegi okothola ni madada mangala a tirigu, othikithaga,

^b 5.27 Leevi Naari wi: *Matewuzhi*. Moone Matewuzhi 9.9.

otakunaga. ²AFarizi amohiwa yahikohaga, wiira: “Dhinakooodihiwa nlabo na sabuddu, muneerelana ddi?”^c

³Yesu ahawaakulaga, wiira: “Nyo kamweelengile dheerile Davidi ni akwaaye aganna dala? ⁴Wi ahivolowaga nyuba ya Mulugu, othukula mikaathe dhoreelihwa oja. Waavaha ale yannigiiyena. Mikaathe nde dhinarumeedhihiwa ojiwa bure mbwenye anamakutha weekiwa”. ⁵Yesu aheenjedhedhaga, wawaaddela: “Miyu Mwaana a Muthu gili Nabwiya a sabuddu”.

⁶Sabuddu mmohiya, ahivolowaga nyuba ya matugumano egi osuuziha. Vano mwemule mwahikalaga mulobwana mmohi akwile ndada na moonoo wooja. ⁷Anamasuuziha a Malamulo ni aFarizi yoomusugwaga, esayelaga woona akala aamuyilihe muthu nlabo na sabuddu wi ekalena yoomusumelana. ⁸Mbwenye Yesu aganonile moobuwelelo eewa, ahimwiirelaga mulobwana ole. “Venya, osusedhe vaari va”. Oliye ovenya, okala owiimeleene.

⁹Vano Yesu ahawiirelaga aliwa: “Ginowuukohani [munoono havi]? Nlabo na sabuddu dhinarumeedhiwa siivi? Wiira dhapama, naari wiirana dhabure? Ovulumusa, naari opa?”

¹⁰Vano ahaasugwaga, yamwaapeelelege, omwiirela mulobwana ole “Katapula ndada naawo”. Oliye wiirana ndo, ndada oyila. ¹¹Mbwenye aliwa yahitakaleliwaga vajinjivene, okanganelaga mwakaleligiisu esayelaga dhoofuna omwiirana Yesu.

Osakuliwa wa arumiwi kumi ni abiili

(Matewuzhi 10.1-4; Maruku 3.13-19)

¹²Nlabo nimohi mwa mudhidhi olene, Yesu ahidhowaga wi alobele omwaangoni. Ahivireliwaga mahiyu maatene alobelaga wa Mulugu. ¹³Vano ogasile ahawiithanaga anamasuuzi aaye, waasakulavo kumi ni abiili, mwa aliwa ayene yaavahiliye teto ndina na arumiwi: ¹⁴Simawu, amvahiliye ndina na Peduru; ni Andire, ddibile; Tiyago ni Zhuwawu; Filipi ni Baritolomeyo; ¹⁵Matewuzhi; ni Tome; Tiyago, mwaana wa Alifiyu; ni Simawu, eeriwa muZeloti;^d ¹⁶Zhuda, mwaana a Tiyago; ni Zhudasi a oEsikariyothi, ole ampelekile Yesu.

Mareliho ni oddilu

(Matewuzhi 5.1-12)

¹⁷Yesu vamohi ni anamasuuzi aaye akitaga omwaangoni. Ahimelaga vamusewawani vatugumanenge, anamasuuzi ajinjeene ni muthithi

^c 6.2 Malamulo a Mozezi enokooodiha olaba nlabo na sabuddu. Moone Okuma 20.8-11; Deteronomiyo 5.12-14. ^d 6.15 AZeloti Aliwa yaali a nikuru na aZhudewu yeethukulela oPalextina wona anamurala. Aliwa yoofuna wiinyuwela mwa pwere wi yaagoonjihe ni wawiiagara aRoma.

mulubale wa athu yadheelaga murudda waatene wa oZhudeya ni oZheruzalemi ni a seresere ya nyaza ya oTiru ni oSidoni. ¹⁸Yadheelege omwiiwa ni oyilihiwa dhiredda. Ale yarabulihiwa ni mineba dhabure yooyilihiwa. ¹⁹Anamwinji aatene yoosayelaga omukahinya, vowi kopolo dhookuma mwa oliye, waayilihaga aatene.

²⁰Vano Yesu ahawang'anaga anamasuuzwa aaye, wawaaddela, wiira:

*“Ooreelihiwa di nyo mwihinna yego,
vowi Omwene wa Mulugu bweenyu.*

²¹*Ooreelihiwa di nyo mwinna dala dhiinova,
vowi munoodha murubale.*

*Ooreelihiwa di nyo munaandda dhiinova,
vowi munoodha muteye.*

²²*Ooreelihiwa di nyo athu yowiiddani,
ekoodda weedda ni nyo, yuuruwanagani,
enyemulaga ndina neenyu wona nabure,
mwaha wa Mwaana a Muthu.*

²³“Teyelani nlabo nenddo agalalani ni olupa mwaha wi yoothetheeliwana yeenyu si yuulubale odhulu. Vowi yeere ndo awale-wale eewa ni anamavuhulela.

²⁴*“Mbwenye ooddilu di nyo oreela,
vowi muhaakela yowuuhagalasani.*

²⁵*Ooddilu di nyo munarubala mudhidhi ola,
vowi munodha mvoliwe.*

*Ooddilu di nyo munateya dhiinoveva,
vowi munodha mukubanye ni wuundda.*

²⁶*Ooddilu di nyo yootamaalagani athu aatene,
vowi awale-wale eewa yeerile ndo ni anamavuhulela ooratha.*

Waadhivela amwiiddani

(Matewuzhi 5.38-48)

²⁷“Mbwenye ginowuwaaddelani nyo munaggiwa: Mwaadhivelege amwiiddani eenyu. Mwawiiirelege dhapama ayene enowiiddani.

²⁸Mwaareelihege ayene enowuulumelelani, mwaalobelege ale eno-woonihani goyi. ²⁹Ole onooddwadhani mbarutuni, mmurugunusedhe kukuru emohi. Onowaakani kasaako, kammukooddihedhe wuwaakani maleyaya. ³⁰Mwaavahege aatene enoolobani, ole onathukula eli yeenyu, kammusanye wi oowelihedheni. ³¹Dhaatedhene dhinafuniinyu wi athu yuwiirelegen, nyo teto mwawiiirelege aliwa.

³²“Mwaadhivelaga ale enoodhivelani baahi, munadha muthuviwe ddi? Teto ni anamathegeene enowaadhivela alene enaadhivela aliwa.

³³Mwawiiirelaga dhapama alene enowiirelani dhapama, munadha muthuviwe ddi? Anamathegeene teto enowiirana ndo. ³⁴Mwaabolihaga alene

munajehiinyu wi yuuwelihedheni, munadha muthuviwe ddi? Vowi ni anamathegeene enobolihihana anamathegave, ejjihedhaga oweli-hedhiwa yankeene. ³⁵Mbwenye nyo, mwaadhivelege amwiiddani eenyu, mwawiiirelege dhapama ni obolihiha muhujehihedhaga waakela yego. Mweera ndo, yoothuviwa yeenyu enaakale ejinji. Vano munaakale aana a aMudhulu-dhulu. Vowi oliye di apama ni alene ehinamutamaala ni agongomwa. ³⁶Kalani athagaraga wona Babiinyu oli athagaraga.

Kammukonege muthu

(Matewuzhi 7.1-6)

³⁷“Muhuthongege, kamudha muthongiwa. Muhukone kamudha mukoniwa. Mulevelelege wi mudhe muleveleliwe. ³⁸Mvahege munodha mvahiwe mpimo wapama woopinyeedha woosukuseleya wootekuma. Moowomeliwa murima muneere ovahiwa, vovi ni mpimo oyene munaapimiinyuna akwiinyu, munodha mpimiwena”.

³⁹Vano oliye aheenjedhedhaga, owoga mwa musibe, wiira: “Dhili dhoofwanelele wi muliba ohoona amusogolele muliba ohoona mukwaaye? Kinamorele mmuliddini aabiileene? ⁴⁰Namasuuzi kanamukwaranya namasuuziha aaye, mbwenye aatene alene enavirihamo masuuziho enokala wona anamasuuziha eewa.

⁴¹“Onooniwe ekata mwiintoni mwa ddibilo, wula ohusugwaga emiri eli mwiintoni mwaawo mwaha wa ddi? ⁴²Onaanda addi omwiirela ddibilo: ‘Ddibilaaga, gihiye givenyihemo ekata eli mwiintonimo’, ohoonaga emiri eli mwiintoni mwaawo? Namanyengetha, vowambeela ovenyihemo ekata eli mwiintoni mwaawo, vano oneerege woona pama wi ovenyihemo ekata eli mwiintoni mwa ddibilo”.

Muthanko ni dhoovaha dhiwa

(Matewuzhi 7.15-20)

⁴³“Kuliwo muthanko wapama onavaha dhoovaha dhabure, naari muthanko wabure onavaha dhoovaha dhapama. ⁴⁴Muthanko oli waatene onononeya ni dhoovaha dhiwa. Mwaha wi kinahapiwege makwaaju mmiingani, naari kadhinahapiwege manga mmurothoni. ⁴⁵Muthu apama onokumiha dhoorela dha mmurimani mwaaye teto muthu abure onokumiha dhabure dha mmurimani mwaaye. Mwaha wi mulomo onowoga dhidhaalile mmurimani.

Oowaraala ni oolodhowa

(Matewuzhi 7.24-29)

⁴⁶“Mwaha wa ddi munagiithaniinyu ‘aNabwiya’ wula mwihiragana dhinowaaddeliimini? ⁴⁷Olene onadha wa miyo, eewa madhu aaga, avirihagamo, gineere wuwoonihani onaliganiiyena. ⁴⁸Onaligana ni

mulobwana mmohi amagaga nyuba yaaye, ahitiba miliddidha vakothokwani oddihiha osiddela. Vano mwihinje wahidhaala, mahinje ale yahitekumela ode, yahifwanya nyuba kayathikeyle. Mwaha wi nyubaya yahimageya pama. ⁴⁹Vano ole oneewa madhu aaga ahaavirihagamo, onaligana wona mulobwana amagile nyuba yaaye ahisiddela, kaatibele mooddiihiha. Vano mahinje edhaaga, yahitekumela nyuba ele mowaaguva yahitongwa. Obwanyuwavo yaatene”.

Oyilihiwa wa mwiimeleli a sinturiyawu

(*Matewuzhi 8.5-13*)

7 ¹Yesu agamalile owoga madhu maatene ale wa nlogo, ahivolowa-ga oKafaranawu. ²Mwemule mwahikala sinturiyawu^e ahikalana mwiimeleli amudhiveliye vajinji. Mwiimeleli ole oobulela vajinji ahililege vang'ono wi akwe. ³Sinturiyawu ole ageewile dhawogiwa dha Yesu, ahaarumaga apogo amohiwa aZhudewu wa oliye wi yamulobe amuyilihe mwiimeleli aaye. ⁴Egafiyile wa Yesu, yahimulobaga ni ntidi, yiraga: “Muthu ole doofwanelela wi mmwiirele dhedhi, ⁵mwaha wi onodhiveliwa ni nlogo neehu, ohufiyedha onimagela nyuba ya matugumano”. ⁶Yesu ahidhowaga ni aliwa. Aaddamelaga vang'ono ofiya vaade, sinturiyawu ole ahaarumaga akwaaye wi yeere: “Nabwiyani kamukukumuwe, kagifwanelele wi mvolowe mba mwaaga. ⁷Mwahaya buuyene, gihidheliimi meenka goonile yowi naari kagifwanelele wi giwoge ni nyo. Mbwenye muwoge ndhu nimohive baahi, mwiimeleli aaga onoyila. ⁸Mwaha wowi ni miyeene ginohongiwa teto gihikanna anyakoddo ginaathongiimi. Geera: ‘We kadhowa’, oliye onodhowa; wa mmohiwa: ‘We kadha’, onodha. Geera mwiimeleli aaga: ‘We kasasanya ela’, onosasanya”.

⁹Yesu ageewile madhu ale, ahitikinaga, orugunuwa wawaang'ana ale yamuharaga, wiira: “Ginowuwaaddelani wi naari muEzarayeli kagifwanyilemo nrromelo nuulubale nootthabwa wona ndda”. ¹⁰Vano aliba orumiwa ewelelaga vaade yamfwanyilege mwiimeleli agayilile.

Yesu onomvenyiha mwaana a maamukwele

¹¹Voovira mudhidhi vang'ono, Yesu ahidhowaga oluwani neeriwa Nayiimi, vamohi ni anamasuuzi aaye ni athu ajinjeene. ¹²Aaddamelaga ofiya vamulago va nluwa ndde,^f ahigumanaga ni athu yathukulege muruthu edhowaga omasiye, aaligi mwaana mmohive a maamukwele. Athu ajinjeene a muluwani mule yaaligi ni maamukwele ole. ¹³Nabwiya agamoonile ahimweeddiwelaga thagaraga, wiira: “Kawuundde”.

^e 7.2 *Asinturiyawu* yaali asogoleli a anyakoddo zana (100) a Roma. ^f 7.12 Wale-wale maluwa majinji yowaabeliwa cinga. Nyuba dhaatedhene dhakala muwari mwa cinga, yathawiha koddo dhodheela dhilabo dhimohi.

¹⁴Agafiyile vakukuuve ahikahinyaga ntete ale yathukulege wiimela. Yesu wiira: “Muzombwe, miyo ginolamula, kavenya!” ¹⁵Mwanookwa ahivenyaga okaraati wambeela owogaga. Vano Yesu omuwelihedha wa amaaye.

¹⁶Athu aatene yowoovaga. Yoomutamaalaga Mulugu, yiiraga: “Nama-vuhulela mulubale ohooneya vaari va hiyo, Mulugu oheeddela nlogo naaye wi akamihedhe”. ¹⁷Muselu ola wawoga dha oliye wahivuwaga oZhudeya ni mirudda dhaatedhene dhowaaddamela.

Zhuwawu Namabathiza onowaaruma anamasuuzaa aaye wa Yesu
(*Matewuzhi 11.1-19*)

¹⁸Anamasuuzaa a Zhuwawu yahidhowaga omwaaddela dhego dhaatedhene dhende. Zhuwawu ahawiithanaga abiili mwa aliwa, ¹⁹waaruma wa Nabwiya wi yamukohe: “Akala duuliyeene ajijihiwa odha,^g naari nimujejihege mmohiwa?”

²⁰Anamasuuzaa ale egafiyile vaaligi Yesu, yahiraga: “Zhuwawu Namabathiza ohuniruma wi nuukoheni: ‘Akala dinyeene eeriwa onodha naari nimujejihege mmohiwa?’ ” ²¹Mudhidhi olene ahaayilihaga athu ajinji dhiredda, dhabure dhimohi dhaakathamihani ni okumiha mineba dhabure ni wawooniha aliba ohoona ajinji. ²²Yesu ahawaakulaga, wiira: “Dhowani mwamwaaddele Zhuwawu nde dhooniliinyu ni dhiiwiliinyu: aliba ohoona enowooni, aliba otopinya enowedda, aliba maredda^h enoweelihiwa, aliba ohiiwa enowiiwa, anookwa enovenyihani ni oorabula enolalelyiwa Muselu Wapama. ²³Oreelihiwa duuleene ohunokuuwa mwaha waaga”.

²⁴Egavenyilevo anamarumiwa a Zhuwawu, Yesu ahambeelaga owoga ni athu mwaha wa Zhuwawu, eeraga: “Mwadhowile mwiiddeddeni woona ddi? Bango yoothikeya ni pevo? ²⁵Ki-to mwagele woona ddi? Muthu oowara guwo dhoofeewa? Ale enawara dhapama enakala mburo dhooddidilela, enakala mmavade mwa mamwene. ²⁶Ki-to mwagele woona ddi? Namavuhulela? Ee, miyo ginowuwaaddela wi oliye onomukwaranya namavuhulela. ²⁷Ola di oyene onawogiwa mMalebani Ootaleleya wi:

*“Miyo ginomuruma osogolo waawo
murumiwi aaga, oyene
onaasanyedhege dila vasogolo vaawo.”ⁱ*

²⁸Miyo ginowuwaaddelani wi mwa oobaliwa ni mwihiyana kaavo oomukwaranya Zhuwawu, mbwenye mung'ono muuMweneni wa Mulugu, oyo dili oomukwaranya oliye”.

^g 7.19 *Duuliyeene ajijihiwa odha* enamwaagana Muthikitheliwi, oyene aZhudewu aatene yamujehedhiwa ofiya, Misiya, naari wi Kirixtu. ^h 7.22 *Maredda* mu ewogelo ya eGerego kinaagana mareddave mbwenye teto dhiredda dhoohiyana-hiyana dha nikupa na muthu. ⁱ 7.27 Malakiya 3.1

²⁹ (Vano athu oohiyana-hiyana aatene ofiyedha anamakoha-musoko yeewilege madhu a Yesu. Baayene yaakwanihile odidela ebaribari ya Mulugu, vowi yahirumeedha obathiziwa ni Zhuwawu. ³⁰ Mbwenye aFarizi ni anamatapulela a Malamulo kayaakwanihile efunelo ya Mulugu, vowi aliwa kayarumeedhile obathiziwa ni Zhuwawu.)

³¹ Yesu ahiwogaga, eeraga: “Ginaafwanafwanihe ni aani mulogo wa mudhidhi ola, ki enafwanafwana ni aani? ³² Enafwanafwana ni ahima ekaraatile vamusika, nikuru nimohi yaakuwelaga, amohiwa yiiraga:

“*‘Hiyo nuhuwoobelani mvilovilo,
nyo kamwiinile,
nihiiba jibo ya vamakwelo,
nyo kamuunddile.’*

³³ Zhuwawu Namabathiza ohudha, ahijaga mukaathe, ahing'waga vinyu, nyo muni: ‘Ohukanna muneba wabure’. ³⁴ Ohudha Mwaana a Muthu ajaga, ang'waga, nyo muni: ‘Ole muliba nrima namang'wa vinyu akwaaye ba anamakoha-musoko ni anamathega!’ ³⁵ Mbwenye ale enarumeedha ttho-ttho dha Mulugu, enowooniha wi dila yaaye si ya ebaribari”.

Mwihiyana oothega onothikithela makura manyalo a Yesu.

³⁶ Yesu ahoobiwaga ni mFarizi mmohi wi aje vaade vaaye, agavolowile mba mwa mFarizi, Yesu ahikaraatigi vamajelo. ³⁷ Moone, muluwani mule, mwahikalaga mwihiyana mmohi aali oothega. Ageewile dhowi Yesu onaja mba mwa mFarizi, ahidhaagana garaafwa na alabasuturu,^j mwaaligi makura oonukwela a mutheengo wookwima. ³⁸ Ahikokoraga odduli wa Yesu, waaddamela vamanyaloni aaye, anddaga, onyethihaga ni mitori manyalo a Yesu ahuhuraga ni nthithi, ombezharigi manyalo, amukuthulelaga makura oonukwela.

³⁹ Vano mFarizi ole amoobilege Yesu agoonile nde, ahambeelaga wuu-buwela mmurimani mwaaye, eeraga: “Yesu ola ahaakale namavuhulela, eere onona wi omukahinyile baani, mwihiyana ola dowi havi: vowi ‘namathega’”.

⁴⁰ Yesu ahiwogaga ni mFarizi, wiira: “Simawu, gihikanna madhu wi guwaaddele”.

Oliye ahiiraga: “Namasuuziha, wogani”.

⁴¹ Yesu ahiiraga: “Yahikalawo athu abiili yafiyaarile korowa wa namafiyaariha, mmohi afiyaarile korowa dha parata^k dhowaakwana mazana matanu (500), mmohiya makumi matanu (50). ⁴² Vowi kayaakwaniha oweliha, mwiinya ahaalevelela aabiileene. Ki weevo, mwa abiili ala onamutthettheese muliba ofiyaariha duuvi?”

^j 7.37 *Alabasuturu* naali nibwe noozhazhaala na mooneyelo oweela nasasanyiwana mino, milinga ni magaraafwa a makura oonukwela. ^k 7.41 Naari wi: *denariyo*. Denariyo yaali korowa yawale ya parata ya oRoma mutheengo waliveliwa namalaba alaba nlabo nimohi.

⁴³Simawu ahimwaakulaga, wiira: “Ginoonelamo aleveliwe dhijinji”.
Yesu ahimuwogagana, wiira: “Ohaakula pama”.

⁴⁴Ageere ndo, Yesu ahimurugunuwelaga mwihiyana ole omwiirela Simawu: “Onomoono mwihiyana ola? Miyo gahivolowa mba mwaawo, kugivahile mahinje oohuwana manyalo, mbwenye ola ohugikuthulela mitori manyalo aaga. ⁴⁵Ohuhuraga ni mathithi aaye. We kugibezhari mbwenye ola givolowileve kamaalile ogibezhari manyalo aaga. ⁴⁶Kugikuthulele makura mmuruni mwaaga mbwenye ola ohugikuthulela manyalo aaga ni makura oonukwela. ⁴⁷Mwa ela ginowuwaaddelani wi dhoothega dhaaye dhijinji, dhihileveliwa. Vowi ohooneyiha odhivela wujinji mbwenye ole oleveliwe dhooyeva onadhivela vang'ono”.

⁴⁸Nuwindo, ahiwogaga ni mwihiyana, wiira: “Dhoothega dhaawo, dhihileveliwa”.

⁴⁹Ale yaaligi ni Yesu vamajelo yahambeelaga owoga weekiwa, yiraga: “Ki olaya baani onafiyedha olevelela dhoothega?”

⁵⁰Mbwenye Yesu ahimwaaddelaga mwihiyana ole, wiira: “Nuuvulumu-sile thi nrromelo naawo dhowa ni murenddele”.

Musibe wa namadhala

(*Matewuzhi 13.1-23; Maruku 4.1-20*)

8 ¹Nuwindo, Yesu ahivenyaga odhowa weddedda nluwa ni nluwa, murudda ni murudda, alaleyaga awaaddelihaga athu Muselu Wapama wa Omwene wa Mulugu. Anamasuza kumi ni abiili yaaligi vamohi ni oliye, ²teto ni ahियana amohi ale yaayiliihiye mwa mineba dhabure ni dhireda dhimohi, ahियanaya baala: Mariya a oMagadala, oyene akumihawe mineba dhootakala mitanu namiinddi, ³ni Zhuwana mwihiyanaaye Kuza musadoro a nyuba ya Heroddi, Suzana ni ahियana amohiwa ajinjeene. Yamukamihedha Yesu ni dhookalana dheewa.

⁴Athu ajinjeene yoothamagelaga wa Yesu, edheelaga mudhi dhoohiyana-hiyana. Oliye ahiwogaga musibe ola, wiira: ⁵“Namadhala ahidhowa odhala bewu. Adhalaga bewu, dhimohi dhamorelege moogomela dila onyingaleliwa, balame dhahidha oddoddavo oja. ⁶Bewu dhimohi dhamorelege vamabweni omela dhunnuwaga wumma, vovi kavaali munyetho. ⁷Bewu dhimohi dhamorelege vamiingani, dhigamelile dhahunnuwa vamohi ni miingadha, dhahihogeya. ⁸Vano bewu dhimohi dhahimorela theya yapama. Omela wunnuwa ofiyedha ovaha mazana ni mazana, okwaranya bewu dhadhaliwege”.

Awogagave nda, ahikuwaga, wiira: “Ole winna obaruni wowiwa, eewe!”

⁹Anamasuza a Yesu yahimukohaga, wiira: “Musibe ola onatapulela ddi?” ¹⁰Oliye ahawaakulaga, wiira: “Nyo muhuvahiwa ononelamo dha wipiini dha Omwene wa Mulugu, mbwenye amohiwa ginaawogana mwa misibe, vovi,

“*‘yoonaga mbwenye kinoona;
yiiwaga mbwenye kineeweelamo’.*¹

¹¹“Musibe ola onatapulela ndha. Bewu bi madhu a Mulugu. ¹²Bewu dhamorele moogomela dila, baale eneewa madhu a Mulugu, mbwenye adha Sathana aavenyihamo mmirimani mweewa wi enadhe eroromele, evulumusiwe. ¹³Bewu dhamorele vamabweni, baale eneewa madhu yawaakela ni ohagalala, mbwenye kinakanna misisi. Enaroromela mudhidhi vang'ono, voofiya dhooweha, enowelega mundduli. ¹⁴Bewu dhamorele vamiingani baale eneewa madhu a Mulugu, yawaakela voovira malabo vang'ono, enohogeya ni oosanyeyela, dhoorela ni dhimohi dhoofuna egumi kinafiyedha ovaha. ¹⁵Bewu dhamorele theya yapama baale eneewa muupamani ni murima wowogoowa yaalogoleta madhuya, ofiyedha ovaha furuuta ni ovilela.

Musibe wa panti
(*Maruku 4.21-25*)

¹⁶“Kalivo muthu onahiddiha panti, akuneela ni mpika naari ohela vati va kama, eehi. Onahela vowooneyela wi enavolowegemo yonege waara. ¹⁷Vowi kilivo yowiipteeya ehinadha yooneya, naari yoologoheya ehinadha enoniwa ni ovuhuleleya. ¹⁸Pole-pole, mwiiwe pama! Ole winna, onoweenjedhedhiwa; ole ohinna, elene enoobuweleliye wi gihikanna onowaakiwa”.

Amaaye ni addibile a Yesu
(*Matewuzhi 12.46-50; Maruku 3.31-35*)

¹⁹Amaaye a Yesu ni addibile yahidhaaga wi yoonane. Mwaha wa anamwinji kiyaakwanihilege ofiya vaaligi oliye. ²⁰Vano muthu mmohi ahidhowaga omwaaddela, wiira: “Mmeenye ni addibilinyu eli ode wu, enafuna moonane”.

²¹Yesu ahawaakulaga, wiira: “Ama ni addibilaga baale eneewa madhu a Mulugu ni wiirana dhinawoga madhuya”.

Yesu onomaaliha nipevo nuulubale
(*Matewuzhi 8.23-27; Maruku 4.35-41*)

²²Nlabo nimohi Yesu ahivolowaga mmwanddeyani vamohi ni anama-suuza aaye, ahawiirelaga: “Kabeni nilabuweni nidhowe kobela emohi ya nyaza”. Omaruwa. ²³Elabuwaga, Yesu ahidhaaleliwaga kove, ogonaga. Vano nahitatamuwaga nipevo nuulubale munyaza, mmwanddeyani mwahambeelaga odhaala mahinje, okala yego yowoopiha wa aliwa ohala nena ni obwina. ²⁴Yahimususedhaga, omvenyiha ekuwaga,

¹ 8.10 Ezaya 6.9

yiiraga: “Namasuuziha, Namasuuziha, nnokwa hiyo!” Yesu ahivenyaga, ohiha nipevo ni owali wa mahinje; dhaatedhene dhahimaalaga, okala murenddele. ²⁵Nuwindo, ahaakohaga, wiira: “Ororomela weenyu oli wuuvi?”

Aliwa owoveene yootikinaga, ekohanaga vakaleligiisu, yiiraga: “Ki ola-ya baani? Onafiyedha olamula nipevo ni kuluzi, dhimwiiwelelaga”.

Oyilihiwa wa mulobwana mmohi ahiddiwe ni muneba wootakala

²⁶Yahaabuwelaga elabo ya oZherasa, eli epaddi emohiya ya Nyaza ya oGalileya. ²⁷Yesu akitagawene, ahithamageliwaga ni mulobwana a muluwani mwemule. Oyene ahiddiwe ni muneba wootakala. Mudhidihi mujinjeene kaawara, kaakala vaade, akalesa munsiyeni. ^m ²⁸Vano agamoonile Yesu, ahikokoraga vameentoni vaaye, ahikuwaga ni ndhu nootaama, wiira: “Yesu, Mwaana a Mulugu a Mudhulu-dhulu, muna-funa ddi ni miyo? Ginowuulobani kamugirabulihe!” ²⁹Mwaha wi Yesu ahilamulaga wi muneba wabure ovenyemo mwa oliye. Woomwihidda wiinddi-wiinddi. Athu yommaga ni fingwi madada ni meddo wi aang’aneliwege; oorunddumula dhaatedhene, woomuthamagihedha muneba wabure mukokolani.

³⁰Yesu ahimukohaga, wiira: “Ndina naawo oli aani?”

Ahimwaakulaga, wiira: “Nili anamwinji.” ⁿ Vowi mineba dhootakala dhijinjidhene dhahivolowa mwa oliye. ³¹Mineba dhootakala dhahimulobaga Yesu wi ahiigarele omuliddini ohinna omagomelo.

³²Vevale voojihiwaga nikwedda nuulubale na kumba omwaanngoni. Mineba dhootakala dhahimulobaga wi arumeedhihe dhivolowe mukumbani. Yesu ahirumeedhihaga. ³³Mineba dhootakala dhigakumilemo mwa mulobwana ole dhahivolowaga mukumbani, kumbadha dhahikitaga dhithamagelaga musiddo omorela munyaza, okwa.

³⁴Amakambuzi a kumba egoonile nde dhapadduwilege, yahithawaga, odhowa olaleyaga muluwani ni mmavade. ³⁵Athu yahikumaga, odhowa wi yoone dhende dheereyile. Egafiyile vakukuuve vaaligi Yesu, yahimfwanyaga mulobwana ole akumihiwemo mineba dhabure agakaraatile omanyaloni a Yesu agawarile, aganna zelu dhoobaliwana. Yahikalagana woova. ³⁶Ale yoonilege nde dhiireyaga yahawaaddeliagamo teto mwemule mwamuyiliheliye muliba minebadha. ³⁷Nuwindo, athu aatene yaapeelelege Zherasa yahimulobaga Yesu wi avenyewo, vowi yahikalagana woova wuulubalewene.

^m 8.27 Masiye a mudhidhi olene yakala wona nikungu. ⁿ 8.30 Anamwinji Mu ewogelo ya eGerego madhu ala eni *Lezhiyawu*, enatapulela wi nikuru na anyakoddo macikwi matanu ni nimohi. Aaneba ole ahiromolaga ndina nenddi otapulela wi mineba dhootakala dhedho dhaali mwa oliye dhaali dhijinji wona nikuru nuulubale na anyakoddo.

Vano Yesu ahigwelaga mmwanddeyani dila biili wi adhowege, ³⁸ mulobwana ole akumihiwe mineba dhootakala ahimulobaga wi amuharege. Yesu ahimpaganyaga, omwiirela: ³⁹“Owelele vaade vaawo wawoge dhaatedhene nde dhuwiirele Mulugu”. Nuwindo, ooyilihiwa ole ahidhowaga olaleyaga muluwani mwaatemwene dhego nde dhaatedhene dhamwiirele Yesu.

Yesu onomuyiliha mwaana a Zhayiro ni mma mmohi

(Matewuzhi 9.18-26; Maruku 5.21-43)

⁴⁰ Yesu awelagawo anamwinji yahimwaakelelaga ni ohagalala mwaha wi aatene yoomujjihaga. ⁴¹ Vevale mulobwana mmohi aaligi mpogo a nyuba ya matugumano eeriwa Zhayiro. Ahidhaaga okokora omanya-
loni a Yesu, omuloba wi afiye vaade vaaye. ⁴² Anna mwaanaye mmohive, mwaana-mwihiyana anna yaaka kumi ni biili, ahalilege nena ni okwa. Yesu adhowaga, anamwinji yoompinyaminyaga. ⁴³ Vahikalaga mwihiyana mmohi arabulile yaaka kumi ni biili ni maredda oomweerini [ahinoonga dhookalana dhaaye dhaatedhene ni anamugu;] kaalivo muthu aakwanihile omuyiliha. ⁴⁴ Ahidhaaga odduli wa Yesu, okahinya nipiyo na yoowara yaaye, mowaaguva maredda ale omweerini yahimala.

⁴⁵ Mbwenye Yesu ahiraga: “Ogikahinyile baani?” Aatene egarunile. Peduru ahiraga: “Namasuuziha, anamwinji ehuwaapelelani ni wuupinyaminyani vano muni: [‘Ogikahinyile baani?’]”

⁴⁶ Mwa dhaatedhene Yesu ahikalelaga ntidi, eeraga: “Ohukalavo ogikahinyile; mwahaya gihoona wi mwa miyo owodha ohukumamo”.

⁴⁷ Mwihiyana ole agoonile wi kadhaandeya wiilogoaha ahaaddamelaga osogolo wa Yesu okokora agurumelaga. Omwaaddeliamo vameentoni va athu aatene mwahaya wamukanyiheligiiye mowaaguva ayila. ⁴⁸ Nuwindo, omwiirela: “Mwaanaga, nrromelo naawo nuhuuyiliha!^o Dhowa ni murenddele”.

⁴⁹ Yesu awogagave, ahifiyaga muthu ookumela vaade va Zhayiro, musogoleli a nyuba ya matugumano. Omwaaddela, wiira: “Ii, muhumukukumule namasuuziha, mwaaninyuya ohumariheya”.

⁵⁰ Mbwenye Yesu, ageewile nda, ahiraga: “Kawoove; ororomele baahi, mwaanawo onovulumusiwa”.

⁵¹ Afiyiligiye vaade kaamwihiyilege muthu bure ovolowa mba vamo-hi ni oliye, mbwenye Peduru, Zhuwawu ni Tiyago, ababe ni amaaye a mwaana ole. ⁵² Athu aatene yowunddaga ekuwaga. Vano Yesu ahawiirelaga: “Kamuundde! Ola kakwile mbwenye onoogona”.

⁵³ Aatene yegi omuteya moomunyemula, vowi yahinonaga pamadhene wi mwaanaya ohukwa. ⁵⁴ Vano Yesu ahimwihiddelelaga ndada, owoga ni

^o 8.48 Naari wi: *nuhuuvulumusa*.

ndhu nootaama, wiira: “Mwaana-mwihiyana, kavenya!” ⁵⁵Egumi yaaye yahiwelelagamo, ovenya mowaaguva. Yesu ahawiirelaga wi mvaheni yooja. ⁵⁶Ababiinya yahitikiniheyaga, mbwenye Yesu ahaasinjeedhaga wi enadha emwaaddele muthu nde dhapadduwilege.

Yesu onowaaruma anamasuuzza kumi ni abiili

(*Matewuzhi 10.5-15; Maruku 6.7-13*)

9 ¹Nuwindo, Yesu ahawiithanelaga vameentoni vaaye anamasuuzza kumi ni abiili, ahaavahaga owodha ni othongi wowiigarana mineba dhature dhaatedhene ni oyiliha dhiredda. ²Yesu ahaaruma olaleya Omwene wa Mulugu ni oyiliha dhiredda. ³Ahawiirelaga kumi ni abiili: “Kamuthukule yego ya voolenddoni; naari mukogodho, naari thumba na voolenddoni; naari mukaathe, naari korowa, naari kamuthukule maleya meenddi. ⁴Vaade vinafiyedhiinyu, mukalege vevo ofiyedha nlabo noovenyavo. ⁵Yahuwaakelani, tatani nthubi na manyalo eenyu mwakumaga muluwani mweewa. Okale onamoono wookoodda weewa”. ⁶Vano yahimaruwaga, odhowa mudhi ni mudhi, elaleyaga Muselu Wapama yaayilihaga athu dhipaddi dhaatedhene.

⁷Namathonga^p Heroddi ahiwa dhaatedhene dheereya mwiilaboni mwaaye oGalileya, ahisimwelaga, vowi athu amohi yeera Zhuwawu divenyile muukwani; ⁸amohi yeera Eliyazi dikumelele; amohi yeera namavuhulela mmohi awale dhavenyile muukwani. ⁹Mbwenye Heroddi ahiiraga: “Zhuwawu duuleene miyo gimpadhihiliimi nikohi. Ki muthu ola gineewiimi dhego nda baani?” Oosayela omoonu Yesu.

Yesu onowiinjiviha mikaathe ni somba

(*Matewuzhi 14.13-21; Maruku 6.30-44; Zhuwawu 6.1-15*)

¹⁰Egawelilewo arumiwi ale yahimwaaddelagamo Yesu dhaatedhene dhende dheeriliwa. Nuwindo, Yesu ahaathukulaga arumiwi, odhowa nluwa nimohi, neeriwa Betisayida; ¹¹mbwenye anamwinji eganoni, yahimuharaga. Yesu ahawaakelelaga, waawogagana anamwinji dha Omwene wa Mulugu ni waayiliha alene yafunaga oyilihiwa.

¹²Nduwa nigahalile vang'ono okodhowa, anamasuuzza kumi ni abiili ale yahimwaaddamelaga Yesu, wiira: “Mwaarumihe anamwinji edhowe mmavade wi yeesayelege yooja ni voogona, vowi oliihu wuno bu mburo wa mwiiddeffereni”.

¹³Yesu ahawaakulaga, wiira: “Mwaavahe nyeene yego wi eje”. Aliwa yahiiraga: “Ninna mikaathe mitanu ni somba biili, baahi. Kaahi nidhowe nagule yooja ya anamwinji aatene alena”. ¹⁴(Vaaligi alobwana owaakwa-na vakukuuve macikwi matanu (5.000).)

^p 9.7 Naari wi: *tetararaka*. *Namathonga* eeriwa tetararaka, athonga epaddi ya nennayi ya murudda mmohi.

Mbwenye Yesu ahawiirelaga anamasuuzwa aaye: “Waakaraatiheni anamwinji mmakuruni a makumi matanu (50)”.¹⁵ Anamasuuzwa yahiiiragana ndo, aatene yahikaraatigi. ¹⁶Yesu ahithukulaga mikaathe mitanu ni somba biili, osugwa odhulu otamaala, opadhula mooharela, ahawinkaga anamasuuzwa wi yaagawele athu. ¹⁷Yahijaga aatene orubala. Anamasuuzwa yahiddodelaga dhoonyenyeya dhahalilege odhaaliha middanga kumi ni miindi.

Wiisoriha wa Peduru

(*Matewuzhi 16.13-20; Maruku 8.27-30*)

¹⁸Dhahipadduwa ayi Yesu ahipoothowaga odhowa wovi hivale, egi olobela ni anamasuuzwa aaye egali vakukuuve. Oliye waakohaga, eeraga: “Athu eni miyo gili aani?”

¹⁹Aliwa omwaakula, wiira: “Amohi eni muli Zhuwawu Namabathiza, amohi Eliyazi, amohiwa namavuhulela awale ovenyile”. ²⁰Oliye owelela waakoha, wiira:

“Ki nyo, muni gili aani?”

Peduru ahimwaakulaga, eeraga: “Nyo muli Kirixtu aroromelihiwe ni Mulugu”.²¹ ²¹Yesu ahaakooddihaga vajinjivene wi enaadhe emwaaddele muthu. ²²Vano oliye aheenjedhaga, wiira: “Enofuneya wi Mwaana a Muthu arabule vajinji, gikooddiwe mmadadani mwa apogo a aZhudewu ni apogo a anamakutha ni ale anamasuuziwa a malamulo; ofiyedha opiwa ni ovenyihwa nlabo na neethaaruu”.

²³Ahawaaddelaga aatene, wiira: “Onafuna odha wa miyo, eekoodde yeeka, nlabo ni nlabo athukulege muraddi waaye, agiharege. ²⁴Mbwenye ole onafuna ovulumusa egumi yaaye^r oneere oyeleela. Ole onayelega egumi mwaha wa miyo onowiivulumusa. ²⁵Muthu eyuugelela dha elabo yaatene voodha eerimeeliha ni wiitola yeekaaye, onapura ddi? ²⁶Vowi muthu onagikalela manyazo miyo ni madhu aaga, Mwaana a Muthu onodha amukalele manyazo nlabo nnadhiiye munthithimihoni naaye na Ababe ni na angero owelela. ²⁷Ebaribareene ginowuwaaddelani wi nyeene muli veva kamunafiyedhe okwa muhoonile Omwene wa Mulugu”.

Ohiyaniheya wa kove ya Yesu

(*Matewuzhi 17.1-13; Maruku 9.2-13*)

²⁸Vigavirile malabo matanu na maraaruu agawogile madhu ala, Yesu ahimuthukulaga Peduru, Zhuwawu ni Tiyago, odhowa omwaangoni wi alobele. ²⁹Alobelagave, mooneyelo a kove yaaye yahihyaniheyaga. Dhoowara dhaaye dhaaligi dhoweela mbuu,

²¹ 9.20 Kirixtu mu ewogelo ya eGerego enatapulela *Muthikitheliwi, Misiya*, naari wi: *oosaku-liwa a Mulugu*, oyene onaavulumuse athu. ^r 9.24 Egumi Naari wi: *muneba*.

dhegi ozherimela. ³⁰Mowaaguva egi owoga ni alobwana abiili. Aaligi Mozezi ni Eliyazi. ³¹Alobwana ala mooneyelo eewa yaaligi a nthithimiho. Yawogaga dha okwa waaye weeriye aakwanelihe oZheruzalemi.

³²Peduru ni amohiwa yannigiiyena, yahinyemeliwaga ni kove dhuulubale. Vano egarurumuwe, yahoonaga nthithimiho naaye ni alobwana abiili ale. ³³Evenyagavo ale vale vaaligiisu ni Yesu, Peduru ahiwogaga, wiira: “Namasuuziha, eli yapama wi nikale wewuno. Nimage misasa miraaru; mmohi weenyu, mmohi wa Mozezi, mmohiwa wa Eliyazi”. (Oliye kaanonaga dhawogigiye.)

³⁴Awogagave, wahidhaaga murabo waakuneela, egali mmuraboni mwemule. Anamasuuzi yegi woova. ³⁵Mmuraboni mule mwahikumaga ndhu, neeraga: “Ola di Mwaanaga, gimusakuliimi.^s Mmwiiwelelege oliye!”^t ³⁶Ndhu nigeeweyile anamasuuzi a Yesu yahimoonaga wi olivo yeeka. Vano aliwa yahimaalaga okuma malabo alene, kayamwaaddelile muthu dhaatedhene dhooniligiwa.

Yesu onomuyiliha muzombwe oohiddiwa ni muneba wootakala
(*Matewuzhi 17.14-23; Maruku 9.14-32*)

³⁷Ode ogasile, yahikitaga omwaangoni, yahidhowaga anamwinji wi yamugumanena Yesu. ³⁸Mulobwana mmohi vaari va anamwinji ahikuwaga ni ndhu nootaama eeraga: “Namasuuziha, ginowuulobani wi mugoonene mwaanaga, vovi ginna mmohive. ³⁹Mowaaguva muneba mmohi wamwihidda; muzombwe onokuwa moorurumusa, muneba omuddanddamuwihaga akumaga nipweru muwano. Kunaaguva omwihiya onofiyedha omvoreya. ⁴⁰Gahaaloba anamasuuzi eenyu wi yiigaremo muneba ole, mbwenye kayaakwanihile”.

⁴¹Yesu ahaakulaga, wiira: “Mulogo woohukanna nrromelo oovirigana moobuwelelo, ofiyedha alini gineeriimi givilele ni nyo? Mudhena wuno mwaanawo”. ⁴²Muzombwe ole amwaaddamelaga Yesu, muneba wootakala wahidhaaga, omutongwihedha vati otalataleyaga. Mbwenye Yesu ahinyanyuwelaga muneba wabure, omuyiliha muzombwe ole, omwinka babe. ⁴³Aatene yaaligi ootikiniheya ni kopolo dhuulubale dha Mulugu mwa dhaatedhene nde Yesu dheeriliyena. Oliye ahawiirelaga anamasuuzi aaye: ⁴⁴“Muvuruwanesese pama dhedho ginafuniimi guwaaddeleni: Mwaana a Muthu oneere ogulihwa aveleliwe mmadani mwa athu”. ⁴⁵Mbwenye aliwa kayeweelagamo madhu ale yatapuleligiwa; yaaligi owiipiteya wi enadhe yiiwelelemo. Yowoovaga omukoha yootapulela ya madhu ale.

^s 9.35 Dhoolebiwa ni madada dhijinji dhineera: *Oodhivela*. ^t 9.35 Wambeela 22.2; Masaalimu 2.7; Ezaya 42.1

Mpogo baani?

(*Matewuzhi 18.1-5; Maruku 9.33-37*)

⁴⁶Dhahipadduwa mudhidhi mmohi anamasuuzwa yegi ovaanyihana wi aakale mpogo^u mwa aliwa baani. ⁴⁷Yesu, voonona moobuwelelo eewa, ahimuthukulaga mwaana mmohi omwiimeliha vaaligiye. ⁴⁸Wawiirela: “Olene onamwaakela mwaana ola mu ndina naaga, onagaakela miyeene. Vano ole onagaakela, onamwaakela ole ogirumile. Oli mwa nyo oneeyevi-he, oyene dinaakale pogo”.

⁴⁹Zhuwawu ahaakulaga, wiira: “Namasuuziha, nihimoona muthu mmohi akumihaga mineba dhabure ni ndina neenyu, hiyo nihimwi-hiha mwaha wi kaali vamohi ni hiyo”. ⁵⁰Mbwenye Yesu ahimwiirelaga: “Kammwihiihe ole ohunavaanyihana ni nyo, ola deenyu”.

Yesu onokooodiwa ni athu a oSamariya

⁵¹Nuwindo, dhahipadduwa waaddamelaga mudhidhi wowi athukuleliwe odhulu, ahilibihedha odhowa oZheruzalemi. ⁵²Yesu ahaaruma aliba muselu vasogolo. Edhowaga aliwa yahivolowaga murudda wa oSamariya wi emusanyedhele mburo; ⁵³mbwenye athu a murudda ole kayamwaakelile Yesu vowi yahinona wi onadhowa oZheruzalemi. ⁵⁴Anamasuuzwa Tiyago ni Zhuwawu vowoona nda yahimukohaga, wiira: “Nabwiya, munofuna niithane munddo wa odhulu waapahe?” ⁵⁵Mbwenye Yesu ahaarugunuwelaga, waasumulula.^v ⁵⁶Vano yahidhowaga murudda mmohiwa.

Eli yoorusa omuhara Yesu!

(*Matewuzhi 8.19-22*)

⁵⁷Yesu adhowaga mundila ni anamasuuzwa aaye, mulobwana mmohi ahiiraga: “Gineerege wuuharani oli waatewene onadhowiinyu”.

⁵⁸Yesu ahimwaakulaga, wiira: “Makala ehikanna makungu eewa, balame dha odhulu dhihikanna dhitudji, mbwenye miyo, Mwaana a Muthu, kaginna voosameeliha muru”.

⁵⁹Ahiira wa mulobwana mmohiya: “Giharege”. Mbwenye mulobwana ole ahimwaakulaga, wiira: “Nabwiya, gihiyeni vowambeela gaatibele ababa”.

⁶⁰Mbwenye Yesu ahimwaakulaga, wiira: “Waahiye anookwa etibelanenge anookwave. We odhowe walaleye Omwene wa Mulugu”.

^u 9.46 Yawogaga dha *mpogo* kinawoga wunnuwa wa muthu mbwenye enawoga dha osogolela mabasa, nlogo, naari elabo. ^v 9.55 Enofwanyeya madhu owi dhiiraga “*Nyo kamunonile musawo wa muneba mwinniinyuna, vowi Mwaana a Muthu kadhee obwanyula egumi ya athu, mbwenye wi givulumuse*” elebiwe mu dhoolebiwa ni madada dhimohi dhixa. Mbwenye anamasuuzwa ajinji enoobuwela wi madhu ala kiyalebiwe ni Luka.

⁶¹Muthu mmohiya ahiiraga: “Gineere wuuharani, Nabwiyani, mbwenye vowambeela mugihiye gaapaganye anaamudhi”.

⁶²Yesu ahimwaakulaga, wiira: “Kalivo muthu oni agahiddelele iba, alimaga aang'anaga mundduli, afwanelela Omwene wa Mulugu”.

**Yesu onowaaruma anamasuuzza makumi
matanu nameenddi ni abiili (72)**

10 ¹Dhigeereye nde, Nabwiya Yesu ahaasakula anamasuuzza amohi, makumi matanu ni meenddi ni abiili” waaruma abiili-abiili wi esogole edhowe mmaluwani ni mburo mwafuniye odhowa. ²Aha-waaddela, wiira: “Dhoohadda dhihinjiva, anamalaba eli vang'ono. Nyo anamasuuzza mmulobe Nabwiya mwiinya a dhoohadda wi aarume anamalaba omidda waaye. ³Dhowani dhiinoveva! Miyo ginowuurumani wona mabila vaari va miiji. ⁴Muhuthukule thumba, na korowa, naari thumba na voolenddoni, naari saphatho; muhumulojele muthu mundila.^x

⁵“Nyuba enavolowigiinyumo, vowambeela muwoqe, mwiire: ‘Murenddele okale vaade va!’ ⁶Akalavo muthu a murenddele, murenddele weenyu omukitele oliye; ahikalavo, murenddeleya owelele wa nyo. ⁷Mukalege vaade vevo, mujege, mung'wege, eyene enoovahigiisuni, vovi soofuneya namalaba aakele nlivo naaye. Muheenjedhe mookala.

⁸“Mwafiya valuwani mwaakeliwa pama, mujege eyene enoovahigiisuni. ⁹Mwaayilihege aredda enaakale muluwani mo, mwawaaddelege, wiira: ‘Omwene wa Mulugu ohuufiyedhani’. ¹⁰Mbwenye, mwavolowa nluwa nimohiniwa ehuwaakelani, mvenye, mudhowe mmarampani, mweere: ¹¹‘Hiyo nihitata nthubi na nluwa neenyu noombuwelihe manyalo eehu wi ekale yoonihedho wa nyo. Mwa nda, munone wi Omwene wa Mulugu ohuufiyedhani’. ¹²Ginowuwaaddelani wi nlabo na muladdu athu a oSoddoma enodha evuguleliwe goyi yeewa ohiya athu a nluwa ndde.

¹³“Ooddilu di we, Koraziimi! Ooddilu di we, Betisayida! Vovi matikiniho yiireyile mwa nyo yaheereye oTiru ni oSidoni, athuya yeerege hivano egatthwaruwe mowaaguva, ewaraga masakwi ni wiihela nddoora. ¹⁴Mbwenye mu othongi wa Mulugu onodha avugulele goyi ya oTiru ni oSidoni, ohiyana murudda dha oKoraziimi ni Betisayida. ¹⁵We, Kafarana-wu, oneesa oneere ogwelihiwa odhowe odhulu? Naari! Onomorihedhiwa mburo wa anookwa!”

¹⁶Yesu ahiwogaga ni anamasuuzza aaye makumi matanu na meenddi ni abiili ale, wiira: “Ole onoovuruwanani, onagivuruwana miyeene; ole onagikoodda miyo onamukoodda baba aaga Mulugu ogirumile”.

^w 10.1 Dhoolebiwa dhimohi dhini: 70; teto va verisikulu 17. ^x 10.4 Madhu ala, yatapulela wi ehiselivege ni dhimohi, ehiyaga dhaarumiwiisu.

¹⁷Vano anamasuuzwa makumi matanu ni meenddi ni abiili ale yahiwe-laga ni ohagalala wuulubale; yiraga: “Nabwiyani, mwa ndina neenyu mineba dhabure dhifihiyedha oniiwelela!”

¹⁸Mbwenye oliye ahawiirela: “Miyo gihimoonza Sathana amoraga odhu-lu wona ozherima. ¹⁹Onani miyo guhuuvahani owodha woonyingalana nyowa, awalize ni owodha waatewene wa mwiiddani mowindo kilivo enoovoreyegeni. ²⁰Mwa dhaatedhene kamuhagalale mwaha wowi mi-neba dhabure dhinowuwiiwelelani, mbwenye muhagalale vovi mandina enyenu ehilebiwa odhulu”.

²¹Mudhidhi olene Yesu ahihagalala mwa Muneba Woweela, wiira: “Miyo ginowutamaalani Babani, Nabwiya a odhulu ni elabo ya vati, vovi muhaalogohedha dhego nda athu atthotho ni oosuuza, mwawooni-hile ahima. Ee! Babani, wula puufuna weenyu.

²²“Dhaatedhene gihivahiwa ni ababa kalivo omunonile Mwaana ahili Babe teto kalivo omunonile Babe ahili Mwaana ni ayene enaafuniyena waanonihani”.

²³Vano ahirugunuwelaga ombale, owoga ni anamasuuzwa aaye, wiira: “Ooreelihiwa bi meento enoona dhinooniinyu. ²⁴Vovi miyo ginowu-waaddelani wi anamavuhulela ajinji ni mamwene yahifunesesa woona dhinooniinyu mbwenye kayoonile, wiiwa dhineewiinyu mbwenye kayeewile”.

Musibe wa muSamariya apama

²⁵Nlabo nimohi namatapulela a Malamulo ahivenyaga wi amweehe Yesu. Omukoha, wiira: “Namasuuziha, gineere ddi wi gikalena egumi yoohumala?”

²⁶Yesu ahimwaakulaga, wiira: “MMalamuloni dhilebiwe avi? Onatapu-lela avi?”

²⁷Oliye ahaakulaga, wiira: “Dhilebiwe: Omudhivelege Nabwiya Mulugu aawo ni murima waawo waatene, ni egumi yaawo yaatene, ni kopolo dhaawo dhaatedhene, ni wiiwelelamo waawo waatewene;^y omudhivelege mwaaddamani aawo wona muneedhiveliwe”.^z

²⁸Yesu ahimwaakulaga, wiira: “Ohaakula pama. Wiiregena dhedho oneere okalawoove”.

²⁹Mbwenye namasuuziha a malamulo ole afunaga wiyaakwanihela yeekaaye, ahiraga: “Ki mwaaddamani aaga baani?”

³⁰Yesu ahimwaakulaga, wiira: “Aaligi mulobwana mmohi akitaga oZheruzalemi, adhowaga oZheriko, mundila ahigumana ni mapanga. Omwihidda omwaaka dhoowara dhaaye omuddwadha omporosa vajinji-vene, omwihiya nena ni okwa. ³¹Moohujejiheya, namakutha mmohi egi

^y 10.27 Deteronomiyo 6.5. ^z 10.27 Levitiku 19.18.

odha dila emohive, agamoonile mulobwana ole ahimuwereweraga. ³²Dila emohive egi ovira muLeevi, agamoonile ni oliyeene, ahimuwereweraga. ³³Vano muSamariya mmohi adheelaga dila emohive elene, agamoonile, ahifiyaga vakukuuve omweeddiwela thagaraga. ³⁴Omuhuwa makwaddaya, ohelamo makura ni vinyu ompotha. Vano omuthukula omugweliha vamwaneenyamani aaye, omudhowana nyuba ya aleddo, omukamihedha. ³⁵Ode ogasile, ahiliva korowa biili dha parata^a wa muliba nyuba yowawaakela aleddo. Oliye wiira: ‘Mmukameele muthu ola, dhinamunoonngeliinyu dhimohi gadhaaga ginoliva’ ”.

³⁶Vano Yesu ahimukohaga namasuuziha a malamulo, wiira: “Moobuwelelo aawo, athu ale araaru, aali mwaaddamani duuvi?”

³⁷Oliye ahaakulaga: “Di ole amukamihedhe”.

Yesu ahiira: “Odhowe, weeregena ndo”.

Vaade va Maarata ni Mariya

³⁸Yesu eeddaga ni anamasuuzi aaye, yahifiyaga murudda mmohi, vano mwihiyana mmohi eeriwa Maarata ahimwaakela vaade vaaye.

³⁹Maarata ahikalana ddibile mmohi, eeriwa Mariya, akaraatilege omanyaloni a Yesu, omvuruwanaga dhoosuuziha dhaaye. ⁴⁰Mbwenye Maarata aaligi ookathamiheya vajinji ni mabasa. Nuwindo, ahimwaaddamelaga Yesu, omukoha: “Nabwiyani, kamunapwatha wi ddibilaaga oyo ogihiyedhe mabasa meenka? Mwaaddeleni wi agikamihedhe!”

⁴¹Yesu ahimwaakulaga, wiira: “Maarata! Maarata! We ohusanyeya vohumaaleya ni dhego dhijinji, ⁴²mbwenye, yoofuneya si yego emohi baahi.^b Mariya ohusakula yookwaranya ela, kalivo onamwaake”.

Yesu onosuuziha olobela

(*Matewuzhi 6.5-15; 7.7-12*)

11 ¹Nlabo nimohi Yesu egi olobela mburo mmoheene. Agamarihile, namasuuzi mmohi ahimulobaga, wiira: “Nabwiyani, munisuu-zihe olobela wona Zhuwawu asuuzihile anamasuuzi aaye”.

²Vano oliye waasuuziha, wiira: “Mwaalobelaga mwiirege:

“Baba weehu, ndina neenyu noweela nthithimihiwe.

Omwene weenyu odhe.^c

^a 10.35 Naari wi: *denariyo*. Denariyo yaali korowa yawale ya parata ya oRoma mutheengo waliveliwa namalaba alaba nlabo nimohi. ^b 10.42 Enofwanyeya madhu owi: *eng'onong'ono soofuneya naari egali yego emohi* elebiwe mu dhoolebiwa ni madada dhimohi. Mbwenye anamasuuzi ajinji enoobuwela wi *mbwenye, yoofuneya si yego emohi baahi* madhu ala yalebiwe ni Luka. ^c 11.2 Dhoolebiwa ni madada dhijinji dhini: *Omwene weenyu odhe. Okwela weenyu wiireyege vati vano wona odhulu*. Mbwenye anamasuuzi ajinji enoobuwela wi *Okwela weenyu wiireyege vati vano wona odhulu* madhu ala kiyalebiwe ni Luka.

³ *Munivahe yooja yeehu yowaakwana nlabo ni nlabo.*

⁴ *Munilevelele dhoothega dheehu,
wona hiyo nnaalevelela aatene enanthegele.*

Kamurumedhele^d wi nimorele moweewiwani^e.”

⁵ Yesu ahawaaddelagave: “Moofwanafwaniha muthu mmohi a mwa nyooovo akalana mukwaaye, adhowa amusayelaga vaari ni vaari va mahi-yu amwiirela: ‘Mukwaaga, gibolihe mikaathe miraaru, ⁶vowi mukwaaga a voolenddoni difiyile vaade vaaga, oogisayela, vano kaginna yoomvaha’.

⁷“Vano mukwaayeya ola aakulaga mba-mba eeraga: ‘Kuginyagule, musiwo boofugeene, anaaga ni miyoya nihikonaanti. Kaginaakwaniha ovenya wi guuvahe enalobiwe’. ⁸Yesu ahiwoga, wiira: Ginowaaddelani wi oliye kaafuna wi avenye amvahe mikaathe, vano ahivenya omvaha dhaatedhene dhafuniye, kamvachege wi di mukwaaye, mbwenye mwaha wa ntidi.

⁹“Mwa ela ginowuwaaddelani wi lobani, munovahiwa; sayelani, munofwanya; kokothani, muneere othuleliwa. ¹⁰Vowi aatene enaloba enovahiwa, onasayela onofwanya, musiwo onofuguleliwa wa oyene onakokotha.

¹¹“Baba baani mwa nyooovo oni mwaanaye amuloba^f somba, vamburoni va amvaha nyowa? ¹²Naari amuloba nzayi, onomvaha walize? ¹³Ki nyo mugalive abure, munonile waavaha dhego dhapama aniinyu. Kaahi ebaribari wi Babiinyu a odhulu oli apama, kanaavahe mookwaranya Muneba Woweela ale enamuloba?”

Osumeliwa wa Yesu

(Matewuzhi 12.22-32; Maruku 3.20-30)

¹⁴Nlabo nimohi Yesu eegaraga muneba wootakala woohuwoga. Muneba wootakala ogakumilemo, muliba ohuwoga oowogaga, anamwinji yootikinaga. ¹⁵Vaari va aliwa amohi yowiraga: “Kopolo dhinakumihiiyena mineba dhootakala, dhinadheela wa Belezebu,^g pogo a mineba dhootakala”. ¹⁶Amohiwa yoofunaga omweeha, yoomulobaga etoonyihe-dho yootikiniha yookumela odhulu.

¹⁷Mbwenye Yesu aganonile dhowuubuwela dheewa, ahawiirelaga: “Omwene oli waatene wagawaneya mwa wooka onobwanyuwa, emudhi yagawaneya murala ni murala dhinotoongwa. ¹⁸Akala Sathana onogawa-

^d 11.4 EGerego: *Kamunihiye wi nimorele moweewiwani.* ^e 11.4 Dhoolebiwa ni madada dhijinji dhini: *Kamurumedhele wi nimorele moweewiwani, mbwenye munivulumuse wa Nambure.* Mbwenye anamasuua ajinji enoobuwela wi *mbwenye munivulumuse wa Nambure* madhu ala kiyalebiwe ni Luka. ^f 11.11 Dhoolebiwa dhijinji dhinoweenjedhedha madhu ala, owi: *amuloba mukaathe oneere omvaha nibwe.* Mbwenye anamasuua ajinji enoobuwela wi madhu ala kiyalebiwe ni Luka. ^g 11.15 *Belezebu* thi ndina nnavahiwa Sathana, oli musogoleli a mineba dhootakala.

neya mwa yeeka, omwene waaye onalibe addi? Giwogele nda mwaha wa nyoovo muneera wi gineegara mineba dhootakala ni Belezebu. ¹⁹Akala miyo gineegara mineba dhootakala mwa Belezebu, ki anamasuuzah^h eenyu eneegara ni ddi? Mowinda aliwa enodha yuuthongeni. ²⁰Mbwenye akala miyo gineegara mineba dhootakala ni kopolo dha Mulugu, ebaribareene Omwene wa Mulugu ohufiya.

²¹“Muthu a kopolo winna dhowiyiing'anelana eng'anelaga vaade vaaye, dhookalana dhaaye dhinakala dhooheeddeleya pama. ²²Mbwenye adhavo mmohiwa a kopolo dhijinj dhoomukwaranya oliye, amugonjiha, onomwaaka dhookalana dhaaye dhaatedhene dharoromeliye, onogawagawa dhooreela dhanniiyena.

²³“Muthu ohunewanana ni miyo dinavaanyihana ni miyo, olene ohunagikamihedha otugumana ni miyo onoomwadha.

²⁴“Muneba wabure wakuma mwa muthu, onoweeddedda mwiidde- ddereni osayelaga voovuma, waahifwanya, onowiyiirela: ‘Ginawelega vaade vaaga, vevale vakumiliimi’. ²⁵Vano afiya onafwanya moozheliwa mwene moosanyedha mwene. ²⁶Eendo onodhowa othukula mineba dhimohi mitanu namiinddi dhoomukwaranya ole, ovolowamo okalaga mwemule. Vano mukalelo woogomihedha wa muthu ole onokala woothabwa okwaranya mukalelo wowambeela”.

²⁷Vano dhahipadduwa, Yesu awaaddelaga dhego nda; mwihiyana mmohi a anamwinji ahikuwaga ni ndhu nootaama, wiira: “Oorelihiwa di mwihiyana wuubalileni ni mabele yawamwiinyu”.

²⁸Mbwenye Yesu ahiiraga: “Moohiyaniha, oothabwa oreelihiwa baale eneewa madhu a Mulugu ni waaloglela”.

Etoonyihedho ya Zhonasi

(Matewuzhi 12.38-42)

²⁹Vowi anamwinji yootugumanaga, Yesu ahambeelaga wawaaddela, wiira: “Ola bu mulogo wabure! Aliwa enaloba etoonyihedho yootikiniha, kinaavahiwe etoonyihedho emohiwa, ehili ya namavuhulela Zhonasi. ³⁰Mowinda wona Zhonasi aali etoonyihedho ya akadda Ninive, Mwaana a Muthu teto onaakale etoonyihedho ya mulogo olena. ³¹Nlabo noothongiwa wa athu mwene a mwihiyana a omadheelo wa pevo ya kasekase onodha eemele athonge akone mulogo olena, vowi ahidha okumela ogomele elabo wi eewe tthottho dha Salomawu. Moone oli vameentoni veenyu ohumukwaranya Salomawu. ³²Teto athu oNinive enodha yiimele ethonge mulogo ola ni waakona; vowi aliwa ehithwaruwa voviiwa olaleya wa Zhonasi. Moone, oli vameentoni veenyu ohumukwaranya Zhonasi”.

^h 11.19 EGerego: *ahima*

Panti ya mwiili
(*Matewuzhi 6.22-23*)

³³“Kalivo muthu onahiddiha panti alogoha wowiipiteya naari vati va mpika, eehi. Mbwenye, onahela vowooneyela wi enavolowegemo yoonege waara. ³⁴Panti ya mwiili bi meento. Meento aawo yakala apama, mwiili waawo waatene onakala wowaara. Mbwenye yahikala apama, mwiili waawo onakala wa yihi. ³⁵Osugwe pama, waara oli mmwiilini mwaawo ohukale yihi. ³⁶Akala mwiili waawo waatene oli wowaara, wahikalena yihi kukuru emohi, onokala wowaara wona panti yamoneyelaga vaari va we”.

Yesu onokona onyengetha wa aFarizi ni anamasuuziha a Malamulo
(*Matewuzhi 23.1-36; Maruku 12.38-40*)

³⁷Yesu agamalile owoga, mFarizi mmohi ahimwiithanaga wi yaje vamohi, vano Yesu ahivolowaga, okaraati vameeza, ³⁸mbwenye mFarizi ahitikinaga, agamoonile wi Yesu onaja ahihabilemo.

³⁹Vano Nabwiya wiira: “Nyo, aFarizi munahuwa ode wa kopo ni wa muziwo, mbwenye muwari mweenyu muhudhaala dhowaaka ni dhambure. ⁴⁰Oolodhowa nyo! Ole osasanyile ode kahuwo mmohive osasanyile muwarimwa? ⁴¹Mbwenye vowambeela mvahe dha mahala wa arabuli ni murima waatene vano dhaatedhene dhinaakale dhoweelihwa wa nyo.

⁴²“Mbwenye muneere woona nyo, aFarizi, vovi munoveleela ya neekumi ya mataakuru oonukwela ni bewu dhoowomiha dhooja dhaatedhene, mbwenye kamunapwatha wogoowa ni odhivela wa Mulugu. Soofuneya mwiiregena nda.

⁴³“Nyo aFarizi, muneere woona vovi munadhiveliwa okaraatela dhittengu dhowambeela mu nyuba dha matugumano, munadhiveliwa malojelo anriho mburo dhowooneya.

⁴⁴“Nyo aFarizi, muneere woona munaligana ni masiye ehinooneya, athu eneedda vadhuluva ehinonaga yego”.

⁴⁵Namasuuziha a Malamulo mmohi ahimwaakulaga, wiira: “Namasuuziha, mwawogaga nda, munoninyemula ni hiyeene teto”.

⁴⁶Vano Yesu, wiira: “Muneere woona nyooyo teto, anamasuuziha a Malamulo munaathukuliha athu sapo dhoonyemela dhoorusa waakwaniha aliwa, dhedho nyo muhunaandiinyu nivang'onong'ono okahinya ni embuno yeenyu.

⁴⁷“Muneere woona nyo, munamaga pama masiye a anamavuhulela ayene yapiwe ni makolo eenyu. ⁴⁸Nda dhinooniha wi munorumeedhela mabasa a makolo eenyu. Vovi aliwa yahaapa anamavuhulela. Vano nyo munamaga masiyeya. ⁴⁹Mwa ela tthottho dha Mulugu wiire: ‘Ginodha gaarumihedhele anamavuhulela ni arumiwi, aliwa enodha yaape,

amohiwa mwaathamagihege'.⁵⁰ Vowindo athu a mudhidhi ola enodha ekalena muladdu mwaha wa mwazi wa anamavuhulela aatene, yaapiliinyu wambeela omapaddusiwelo wa elabo: ⁵¹Mwazi wa Abeli ofiyedha mwazi wa Zakariya, apeliwe vaari va mburo wa mukutho ni nyuba ya Mulugu. Ee, ginowuwaaddelani wi athu a mudhidhi ola enodha ekohiwe.

⁵² “Muneere woona nyo, anamasuuziha a Malamulo, mumvenyihilevo cavi oothulana tthottho dha ononelamo dha Mulugu. Nyo kamvolowilemo nyooka mwaathiyelele ale yafuna wi evolowege!”

⁵³ Yesu avenyaga vevale, anamasuuziha a Malamulo ni aFarizi yaha-mbeelaga omusanya valubalevene ni omukoha dhoohiyana-hiyana. ⁵⁴ Ni efunelo yoomuwaga muwano wi emmagihe.

Yesu onowawaaddela ni waalibiha anamasuuzi aaye

12 ¹ Mudhidhi olene yahitugumanaga athu macikwi ni macikwi, ofiyedha onyingalanaga mmohi ni mmohiya. Yesu ahambeelaga wawaaddela anamasuuzi aaye, wiira: “Pole-pole ni emela ya aFarizi weewa oli oleketha. ² Kayiivo yookuneeleya ehinaadhe yooneya; naari yoologohiwa ehinaadhe enoneya. ³ Mwaha wi dhaatedhene dhinawogeliinyu wiipipini dhinovuweya mutaneene; dhinawogeliinyu vati-vati mba, dhinoodha dhilaleyawe vathaddo.

⁴ “Vano nyo akwaaga ginowuwaaddelani: Muhawoovege ale enapa mwiili, mbwenye osogolo kinaanda wiirana yego emohiwa. ⁵ Mbwenye miyo ginowuwaaddelani wi oofwanelela omoova; mmoovege Mulugu, onapa, akalana owodha woovokedha omunddoni woohuthima. Ee: Mmoovege oliyeene, baahi. ⁶ Mwiiwe. Anamandwi atanu kinagulihiwa korowaⁱ biili? Vano dhiyevileve Mulugu kanamuddiwaala naari mmohi. ⁷ Ofiyedha ni mathitheene a mmuruni mweenyu maatene eheelengiwa. Muhoove, nyo muli oofuneyesesa waakwaranya anamandwi ajinji.

⁸ “Miyo ginowuwaaddelani wi olene onagirumeedha vameentoni va athu teto miyo, Mwaana a Muthu, ginodha gimurumeedhe vameentoni va angero a Mulugu. ⁹ Mbwenye ole onagikoodde vameentoni va athu miyo ginodha gimukoodde vameentoni va angero a Mulugu. ¹⁰ Aatene alene enagaaba miyo, Mwaana a Muthu, enoleveleliwa, mbwenye wa ale enayemula Muneba Woweela, kidha eleveleliwa.

¹¹ “Mwathukuliwaga munyuba dha matugumano dha aZhudewu, mudhowiwagana omathongiwele ni anamathonga muladdu, muhukubanyege wi munaakule havi, naari munawoge havi. ¹² Mwaha wi mudhidhi oyene Muneba Woweela onowusuuzihani yowaakula”.

ⁱ 12.6 Korowa ndha dhaali korowa dha gwingwi dthing'onong'ono dhafuneya vang'onove, dheeriwa *asesi*.

Musibe wa mureeli oolodhowa

¹³Muthu mmohi vaari va anamwinji ahiiraga: “Namasuuziha, mmwaaddele ddibilaaga wi agigaweledo mureelelo wa babiihu”.

¹⁴Mbwenye Yesu ahimwaakulaga, wiira: “Mulobwana we, ogisakule okala namathonga naari namagawela a dhoohala dheenyu baani?”

¹⁵Vano ahawiirelaga aatene yaaligi vevale: “Pole-pole murabele ogonjhiwa nrima mwa dhaatedhene, vowi egumi ya ebaribari ya muthu kinahiddeleya ni mwaha wa dhooreela, naari dhinjiveve”.

¹⁶Vano ahaawogela musibe, wiira: “Ahikalawo muthu ooreela, mudda dhaaye dhahivaha dhooja dhijinji. ¹⁷Nuwindo, wambeela wuubuwelelaga mmurimani mwaaye yeeka, eeraga: ‘Giire havi? Vowi kaginna vohela dhilo^j dhaaga dhi’.

¹⁸“Aheenjedhave, wiira: ‘Giire ayi, gibwanyule dhiringwi dhaaga, gimage dhiringwi dhimohi dhuulubale wi gihaddelemo dhilo dhaaga ni dhookalana dhaaga. ¹⁹Gamala giyiirele miyo meenka: “We ohukalana dhooreela dhijinji dhoologoleleya, dhowaakwana yaaka dhijnjindhene; ovume, oje, ong’we, ohagalale!” ’

²⁰“Mbwenye Mulugu omwiirela: ‘We oolodhowa! Mahiyu alena onowaakiwa egumi yaawo, ki dhego dhuugeliliwe dhinakale dhawani?’

²¹“Nda dhinompadduwela ole oneyuugelela dhooreela yeeka, kahuwo ooreela ni Mulugu”.

Dhoosanyeyela dha egumi

(*Matewuzhi 6.25-34*)

²²Yesu ahiwoga ni anamasuuzi aaye, wiira: “Mwa ela ginowuwaadde-lani: Kamukale oosanyeyela egumi yeenyu, mwiiraga: ‘Nnaaje ddi? Nnaware ddi?’ ²³Vowi egumi sili yoofuneya ohiyana ni yooja, mwiili onokwaranya yoowara. ²⁴Mwawoone anakugu kinadhala, kinahadda, naari kinakanna eringwi naari matata, Mulugu onowaavaha dhooja; nyo muli oofuneya okwaranya balame! ²⁵Kalivo muthu akathamiheya-ga, onaakwanihe weenedhedha nlabo nimohi na egumi yaaye. ²⁶Vano akala kamunaakwaniha wiirana yego eng’onong’ono munakalela ddi oosanyeyela dhimohidha? ²⁷Moone monnuwelo a todo dha mukokolani. Kadhinalaba, naari kadhinaluwa. Ginowuwaaddelelani wi naari mwene Salomawu munthithimihoni naaye naatenene, kaafiyedhe owara oligana ni todo dha mukokolani. ²⁸Ki akala Mulugu onowaawariha manasi a mukokolani, eliwo peenove, omenseloni wiwa evokedhiwa vamunddoni, kanoowariheni nyo athu ooyeva nrromelo? ²⁹Muheeddege moosanyeya, muubuwelelaga wi: ‘Nnaaje ddi? Nnaang’we ddi?’ ³⁰Vowi athu a ela-

j 12.17 Naari wi: *milimo*.

bo ya vati ehinamuroromela Mulugu, binasanyeyelesesa dhego dhedhi. Mbwenye nyo, Babiinyu ohunona wi munorabulela dhedhi. ³¹Vowambee-la mwa dhaatedhene, musaye Omwene wa Mulugu, vano dhimohi dhiwa muneere weenjhedhiwa.

³²“Kamoove nyo, nikwedda ning'onong'ono na mabila, vowi Babiinyu ohudhiveliwa wuuvahani Omwene waaye. ³³Gulihani dhaatedhene dhinniinyuna korowadha mwaavahe oorabula. Mwiisayelegelele mathumba a korowa ehinataleya ni mudhidhi mudhuugelele, dhooreela dheenyu dhoohumala odhulu. Vowi wule owiia kinafiyawo, naari oswa kunaanda okwenya. ³⁴Vowi vevo vinaakale dhooreela dheenyu teto murima weenyu onakale vevo.

Wiimelela wi olabe

³⁵“Mukalege owiimageene mmwiinuni mweenyu, panti dheenyu dhooheedhene. ³⁶Vano nyo mukale oofwanafwana ni athu enamujejihe-dha nabwiya eewa okuma omathangani a matelo, adhaaga oliye akokotha enomfugulela mowaaguva. ³⁷Oreelihiwa baalene amwiimeleli enafwanyi-we ying'anelaga nabwiya adhaaga. Ebaribareene ginowuwaaddelani wi onodha aakaraatihe vameeza, nabwiinyeene mwiinya aagawelege dhooja. ³⁸Akala onaafiye vaari ni vaari va mahiyu, naari njijiji na omaselo, aafwana ehigonile ooreelihiwa enaakale amwiimeleli alene. ³⁹Teto munone nda: Mwiinya a vaade ahaanonege mudhidhi onadha mbava, eerege wiing'anela kaahiyege nyuba yaaye okupuliwa. ⁴⁰Vano nyo mwiisasanyedhe, vowi miyo, Mwaana a Muthu, ginadha mudhidhi ohunoobuweleliinyu”.

⁴¹Peduru ahimukohaga, wiira: “Nabwiya, musibe ola munaniwogela hiyo, naari athu aatene?”

⁴²Nabwiya ahiiraga: “Musadoro oororomeleya, oowaraala baani? Ole omuthomile nabwiye okala pogo ookwaranya amwiimeleli akwaaye wi aagawelege dhooja mudhidhiya waakwana? ⁴³Ooreelihiwa di mwiimeleli oyene nabwiye adhaaga onamfwanyiye eeragana ndo. ⁴⁴Ebaribareene ginowuwaaddelani wi nabwiye onomwiira musadoro a dhookalana dhaaye dhaatedhene. ⁴⁵Mbwenye mwiimeleli ole onoo-buwelela mmurimani mwaaye, eera: ‘Nabwiya onoseliwa kanadhawo’, ambeela waaddwadha amwiimeleliya anaahiyana ni anaalobwana, vano ajaga ang'waga, alezelaga. ⁴⁶Nabwiya a mwiimeleli ole onoodha nlabo nihinajehiyye naari wora ehinoniliyye. Oneere omoonihya goyi vajinji, amudhowihe mburo mmohive ni athu oohuroromela.

⁴⁷“Mwiimeleli ole ononile efunelo ya nabwiya aaye, ahivirihamo efunelo ya nabwiya aaye, onowoonihiwa goyi vajinji yowaxuliwa. ⁴⁸Mwiimeleli ole ohunonile dhinafuna nabwiya aaye, aviriganiha goyi yaaye enakala vang'ono. Ovahiwe dhijinji onokohiwa dhijinji, ohiyedhiwe dhootthabwa onolobiwa dhootthabwa”.

Yesu kadhiilena murenddele mbwenye wiiddaniha

⁴⁹Vano Yesu ahiiraga: “Miyo gidheele ovoka munddo mwiilaboni, gahifuna ogahiddile! ⁵⁰Enofuneya wi gaakele obathizo wa goyi, murima waaga kukaraateye ofiyedha wi dhiireye! ⁵¹Munoobuwelala wi gidhiilena murenddele elabo ya vati? Naari, moohiyaniha, ginowuwaaddelani wi gidheele omwalaniha. ⁵²Wambeela dhiinova odhowa osogolo, athu atanu a nyuba emohive eneerege ofiyedha omwalana. Araaru ewanenge ni abiili, abiili ewanenge ni araaru. ⁵³Baabi oneerege omwalana ni mwaanaye-mulobwana, mwaana-mulobwana oneerege omwalana ni ababe, mmeenya oneerege owana ni mwaanaye-mwihiyana, mwaana-mwihiyana oneerege owana ni amaaye, nzala oneerege owana ni nzaliye, vano nzaliye oneerege owana ni nzala”.

Dhitoonyihedho dha mudhidhi

⁵⁴Yesu ahawiiirelaga anamwinji: “Moonaga murabo dhidheela-ga onadhowela nduwa, muni: ‘Muzongwe onoodha’, nda wiireya. ⁵⁵Vano yoobaga pevo ya kasekase munowiira: ‘Oneere okala oviha’, nda wiireya. ⁵⁶Nyo muli anamanyengetha! Muhunona otapulela mukalelo wa elabo ni odhulu. Muhunonele ddi otapulela mukalelo wa mudhidhi ola wa dhiinova?

⁵⁷“Ki mwa nyo weekiinyu muhunaandela ddi onona eli yapama? ⁵⁸Akala mwiiddani aawo onowuudhowana omuthegoni, osayelee wiiwanana mmarihe muladduya mundila wi dhinaapadduwe oothukulele wa namathonga, namathonga oodhowena wa namafugela, namafugela oofugele mukaambura. ⁵⁹Miyo ginowuwaaddelani wi kunaanda okumamo ohulivile korowa yoogomihedha”.

Othwaruwa naari okwa

13 ¹Mudhidhi olene, yahikalavo athu amohiwa yamwaa-ddelile Yesu dha aGalileya, ayene Pilatu yathongiliye wi epiwe ekuthaga mikutho dha aneenyama wa Mulugu. ²Vano Yesu ahawiiirelaga: “Munoobuwela wi aGalileya ale yaali oothegesesa okwaranya aGalileya amohiwa, mwaha woopiwa ndale? ³Ginowuwaaddelani nyo wi naari! Mbwenye munoodha munoongeye mwaatene ni mukalelo mmohive, mwahitthwaruwa. ⁴Naari kumi ni atanu ni araaru ale yamoreliwe sanja yootaama ya oSi-lowami, yaapa: munoobuwela wi yaali oothega okwaranya athu aatene ookala muZheruzalemi? ⁵Ginowuwaaddelani nyo wi naari! Mbwenye munoodha munoongeye mwaatene mooligana ni aliwa, mwahitthwaruwa”.

Musibe wa namutaambwi oohuvaha

⁶Yesu aheenjedhedhave, owoga musibe ola: “Muthu mmohiwa ahikanna namutaambwi^k aaye amudhaliliye mmiddani mwa mithanko, ahidha wi ahapemo dhoovaha dha namutaambwi mwemule, mbwenye kaafwanyilemo. ⁷Vano ahimwaaddela namalaba, wiira: ‘Vihivira yaaka thaaru, gidhaaga osayela dhoovaha dha namutaambwi munamutambwinimo gihimfwanyagamo. Omukakatthe! Onanoongela ddi theya ahivahaga?’

⁸“Namalaba ahaakulaga, wiira: ‘Nabwiyani, mwihyiye yaaka emohi ofiyedha gitibe mowaapeleliha gihele manyowe. ⁹Wavaha dhoovaha yaaka elena sapama, mbwenye akala kunavahe munoodha mukakatthe’ ”.

Mwihiyana mmohi ayilihiwe nlabo na sabuddu

¹⁰Nlabo nimohi na sabuddu Yesu aasuuzihaga athu mu nyuba ya matugumano. ¹¹Mwemule mwahikala mwihiyana mmohi, anna muneba wabure, wambulelihe yaaka kumi ni yaaka tanu ni thaaru. Mutana waaye waali wookoromana kaanda wiinuuwa. ¹²Vano Yesu agamoonile, ahimwiithanaga omwiirela: “Mwihiyana we, ohutapuliwa oreda wanniiwena”. ¹³Ahimuhelaga madada, oliye mowaaguva ahogoowaga, omutamaalaga Mulugu.

¹⁴Mpogo a nyuba ya matugumano ahitakaleliwaga vowi Yesu ahiyiliha nlabo na sabuddu, ahawaaddelaga aatene yaaligi vevale, wiira: “Ehikalawo malabo matanu ni nimohi oolaba, mudheege muyilihiwe malabo ayene, mbwenye sabuddu naari”.

¹⁵Mbwenye Yesu ahimwaakulaga, eeraga: “Nyo muli anamanyengetha! Kalivo muthu onatapula ng'ombe yaaye naari buuru aaye nlabo na sabuddu, ayana wi dhang'we mahinje? ¹⁶Ki mwihiyana ola oli mwaana a Abarahamu, Sathana ammagiliye yaaka kumi ni tanu ni yaaka thaaru. Kafwaneelele otapuliwa oreda wanniiyena nlabo na sabuddu?”

¹⁷Vano Yesu agawogile nda amwiiddani aaye yahikannaga manyazo, mbwenye athu aatene vevale yahidhiveliwaga ni dhego dhootikiniha dheeriyena nde.

Musibe wa kogolo ya mpeza ni emela (Matewuzhi 13.31-35; Maruku 4.30-34)

¹⁸Mooharela Yesu ahiiraga: “Omwene wa Mulugu onaligana ni ddi? Ginafwanafwanihe ni ddi? ¹⁹Onaligana ni kogolo ya mpeza, eyene muthu yathukuliiye akuthela mmiddani mwaaye. Omela okala muthanko mulubale, balame dha odhulu odha omagamo dhitudunji mmijindani mwiwa”.

^k 13.6 Naari wi: *namutaambu*.

20 Ahiiragave: “Ginafwanafwanihe ni ddi Omwene wa Mulugu?
21 Onaligana ni emela mwihiyana yathukuliye ataganyihedha ni malanta maraaruru a saambale, ofiyedha onyakuwa naatenene”.

Musiwo woopurana

(*Matewuzhi 7.13-14*)

22 Voolenddoni waaye, woodhowa oZheruzalemi Yesu oweedda mma-luwani ni mmiruddani asuuzihaga. 23 Muthu mmohiwa ahimukohaga, wiira: “Nabwiyani, enavuluwa booyeva?” 24 Mbwenye Yesu ahimwaakula, wiira: “Wiilibihedheni wi mvolowe musiuwo woopurana. Ginowuwaadde-lani wi ajinji enodha esayelege ovolowa mbwenye kidha yaakwaniha ovolowa. 25 Adha avenya mwiinya a nyuba afuga omulago, vano nyo munodha mwiimele ode mukokothege esewo ni owoga, mwiiraga: ‘Nabwiya, nithuleleni hiyo’.

“Oliye onodha owaakuleni, eeraga: ‘Kaguunonileni, muli awuuvi nyo?’

26 “Vevo munodha mwambeelee owoga, mwiiraga: ‘Hiyo nooja, noong’wa ni nyo teto muhusuuziha mundila dha owanuhu’.

27 “Oliye onodha owiireleni: ‘Kaguunonileni muli awuuvi. Venyavoni vameentoni vaaga, mwaatene owiira dhabure!’

28 “Vevo munoodha muundde ni owurawura meeno vomoona Abarahamu, Ezaaki, Yakobo ni anamavuhulela aatene muuMweneni wa Mulugu, mbwenye nyo munodha mutukumedhiwe ode. 29 Athu ajinji enodha edheelege omadheelo wa nduwa ni omadhowelo wa nduwa ni omadheelo wa pevo ya kasekase ni omadhowelo, ekale vamajelo muuMweneni wa Mulugu. 30 Mowindo, ehikalawo oogomihedha enaakale owambeela teto ehikalawo owambeela enaakale oogomihedha”.

Okubanyedha dhoovuhuleliwa mwaha wa Zheruzalemi

(*Matewuzhi 23.37-39*)

31 Mudhidhi mmohive yahidhaaga aFarizi omwaaddela Yesu, wiira: “Venyawoni wuno mwaha wi Heroddi onafuna oopeni”.

32 Oliye ahawaakulaga, wiira: “Mudhowe mwamwaaddele kwaddwe oyo: ‘Peeno ni menselo ginakumiha mineba dhabure ni oyiliha dhi-reda, nlabo na neethaaruru ginomariha mabasa aaga. 33 Mbwenye enofuneya geedde olenddo waaga peeno ni menselo ni muroddo mwaha wi kadhinarumeedheya namavuhulela akwele ode wa Zheruzalemi!’

34 “Zheruzalemi, Zheruzalemi we, onaapa anamavuhulela waavonyaga ni mabwe ale enarumihedhiwiwe, aa! Dila ngaasi gifunaga waatugumanya anaawo wona mwanaku onaatugumanya anaaye mmompeloni mwaaye, we ohufunaga! 35 Vuruwanani, nyuba yeenyu ela enoodha esadduwe nddebe. Miyo ebaribareene ginowuwaaddelelani wi kamudha

mugoono ofiyedha mwiire: ‘Ooreelihiwa di ole onadha mu ndina na Nabwiya!’”.

Yesu vaade va mFarizi mmohi

14 ¹Nlabo nimohi na sabuddu, Yesu ahidhowaga vaade va mpogo mmohi aFarizi wi aje mukaathe, athu yaaligi vevale yegi omusugwese-sa. ²Vahikalaga mulobwana mmohi, annaga erredda yoodhibelana mwiili waatene.^m ³Yesu ahaakohaga aFarizi ni anamatapulela a Malamulo, eeraga: “Dhinorumeedheya naari kadhinarumeedheya oyiliha nlabo na sabuddu?” ⁴Aliwa kayawogilege yego. Vano ahimwihiddaga, omuyiliha ompaganya. ⁵Vooharela ahaakohaga: “Mwa nyo oni mwaanaye,ⁿ naari ng’ombe yaaye, egamorele vaceelani, ahitavulavo mudhidhi oyene nlabo na sabuddu baani?” ⁶Mwa ela kayaandilege waakula.

Mburo dhowambeela

⁷Vano Yesu egi waasugwa aliba wiithaniwa yasakulaga dhitte-ngu dhoosogolo, ahaawogelaga musibe, wiira: ⁸“Muthu eethaneliwa mathanga a matelo, ahikaraatelege ettengu yoosogolo, vovi dhinodha dhipadduwe ogakaraatile, adhe owiithaniwa mmohi oothithimiheya owuukwaranya we. ⁹Adhe ole owiithanile, eerege: ‘We venya veette-nguniva wi akaraativo ola’. Onavenyavo ni manyazo, odhowaga ettengu yoogomihedha. ¹⁰Moohiyaniha, weethaniwa, okaraatigi ettengu yoo-gomihedha; adha ole owiithanile, eera: ‘Mukwaaga venya okaraati osogolo wuno’. Onothithimiheya vameentoni va aliba wiithaniwa aatene. ¹¹Vovi ole oneegweliha onookitihwi; oneekitihwa onogwelihiwa”. ¹²Teto Yesu ahiwogaga ni muliba amwiithanilege, wiira: “Wafunaga ovaha yooja, naari wiirihedha mathanga, kwawiithanege akwaawo, naari addibilo, naari anaamudhi, naari amwaaddamani ooreela wi dhinaadhe dhipadduwe naaliweene yuwiithane, yuwelihedhe. ¹³Mbwenye we wafunaga wiirihe-dha mathanga, wawiithanege oorabula, ootopinya, ooragala ni oohoona. ¹⁴Weeraga ndo oneere oreelihiwa, vovi kinaakalena yowuwelihedha; yowelihedhiwa yaawo onaakele omavenyelo wa athu ooharhamo”.

Musibe wa mathanga malubale

(Matewuzhi 22.1-14)

¹⁵Mmohi aaligi vevale ni oliye vameeza, ageewile nda, ahiiraga: “Ooreelihiwa duule onaje mathanga muuMweneni wa Mulugu”.

¹ 13.35 Masaalimu 118.26 ^m 14.2 eGerego: *hidropisiya*. ⁿ 14.5 Dhoolebiwa ni madada dhimohi dhini: “Mwa nyo oni mwaana a buuru, naari ng’ombe yaaye, egamorele vaceelani...” Anamasuza ajinji enoobuwela wi Luka kaalebile wi mwaana a buuru mbwenye alebile wi mwaanaye.

¹⁶Yesu ahaakulaga, wiira: “Mulobwana mmohi ahisasanyedha mathanga malubale wawiithana athu ajinjeene. ¹⁷Mudhidhi wa mathanga ogafiyile ahimuruma mwiimeleli aaye wi awaaddele yawiithaniligiiye wi: ‘Dhaani vovi dhaatedhene dhihaakwanela’.

¹⁸“Mwenye aliwa yahambeelaga owoga mmohi-mmohi, owambee-la ahiiraga: ‘Gihigula mudda ginafuna gidhowe goone. Ginaloba wi mugilevelele’.

¹⁹“Mmohiya ahiiraga: ‘Gihigula ng’ombe paara tanu^o ginafuna gaxixe olimana. Ginaloba wi mugilevelele’.

²⁰“Mmohiya ahiiraga: ‘Gihitela dhiinoveva, kaginayawo’.

²¹“Mwiimeleli agawelilewo ahimwaaddelaga nabwiye. Vano muliba nyuba ahitakaleliwaga, omwaaddela mwiimeleli, wiira: ‘Venya mo-waaguva, waahare arampa alubale ni dila dha nluwa, waadhena wuno oorabula, ooragala, oohoona ni ootopinya’.

²²“Mwiimeleli ahiiragana: ‘Nabwiyani, gihiirana dhaatedhene wona mwawogeliinyu. Mwenye mburo ohukalawoove’.

²³“Vano nabwiye ahimwaakulaga, wiira: ‘Venya waahare arampa ni dila dha mmavade, waawaddihedhe evolowe athu aatene wi nyuba yaaga edhaale. ²⁴Ginowuwaaddelani wi aatene alene yeethaniwe vowambeela, kaavo naari mmohi oneere alawihe mathanga aaga’ ”.

Wiisasanyedha wowaakwanela woomuhara Yesu

²⁵Nuwindo, anamwinji yegi omuhara Yesu; ahaarugunuwelaga, wiira: ²⁶“Akala muthu onofuna odha wa miyo, aadhivela ababe, amaaye, mwihiyanaaye, addibile, arogoriye naari egumi yaaye vajiinji ogihiya miyo, kanakala namasuza aaga. ²⁷Ole ohunathukule muraddi waaye wi agiharege kanaakale namasuza aaga.

²⁸“Mwa nyo oni afunaga omaga nyuba yuulubale vowambeela, ahikaraati eelengela korowa dhinafuneyege wi oone akala oneere omariha baani? ²⁹Dhinampadduwele agambeelile adhe ahimarihe mwaha wi keele-gele korowadha mowaakwanela, aatene enamoonege eneerege ombedda, ³⁰yiiirege: ‘Mulobwana ole ahambeela omaga mwenye kamarihile’.

³¹“Naari mwene baani, oni adhowaga owana koddo ni mwene mmohiya, vowambeela ahikaraati oobuwela akala ni anyakoddo aaye macikwi kumi (10.000) onowaakwaniha owanana mwene ole onadha ni anyakoddo macikwi makumi meenddi (20.000)? ³²Akala kanaakwaniha onomuruma oomwiimelela alobe mukalelo wa murenddele, mwene mmohiya agali woolapelawene. ³³Mowindo mwaatene mwa nyo ohunahiye dhinniiyena kanaakale namasuza aaga.

^o 14.19 aEzaryeli mudhidhi wawale yalima ni ng’ombe, vano yagulihaga, yaguliha biili-biili noona bi madhu ala owi: *paara tanu*, otapulela ng’ombe kumi.

³⁴“Mwiinyu bwapama; ki wakumuwa ninawelihedhena ddi? ³⁵Kunahiddiwana yego, naari okala manyowe, naari vadhuguni; mbwenye onothathiliwa.

“Winna mabaru owiiwana, eewe”.

Musibe wa nibila noorimeela

(Matewuzhi 18.12-14)

15 ¹Anamakoha-musoko aatene ni “anamathega alubale” yoomususedhaga Yesu wi emwiwe. ²AFarizi ni anamasuuziha a malamulo yegi omwaaba, yiiraga: “Ola onowawaakela anamathega ajaga vamohi ni aliwa”.

³Vano Yesu ahaawogelaga musibe ola, wiira: ⁴“Baani mwa nyo oni aganna mabila zana (100), nirimeelavo nimohi, kanaahiye mukokolani mabila makumi matanu ni mannayi nuudha matanu ni mannayi (99), adhowa asayelaga nrimeele ofiyedha ofwanya? ⁵Agafwanyile onothukula veefuddi ni odhaaliwa ohagalala. ⁶Vano nuudhowa vaade. Ahawiithana akwaaye ni amwaaddamani awiirelaga: ‘Agalalani ni miyo mwaha wowi gihifwanya nibila naaga narimeelile’. ⁷Ginowuwaaddelani wi ni mukalelo mmohive onokala ohagalala wuulubale odhulu mwaha wa namathega mmohi onatthwaruwa, ohiyana makumi matanu ni mannayi ni atanu ni annayi (99) ooharihamo ehinafuneya otthwaruwa.

Musibe wa korowa yoorimeela

⁸“Naari mwihiyana baani, oni aganna korowa dha gwingwi kumi, arimeeliha emohi, kanahiddiha panti, azhela mba asayelaga pama ofiyedha afwanya? ⁹Vano agafwanyile, onowaatugumanya akwaaye ni amwaaddamani eeraga: ‘Agalalani ni miyo mwaha wowi gihiddodda korowa yagirimeele’. ¹⁰Miyo ginowuwaaddelani wi ni mukalelo ola, onokala ohagalala vameentoni va angero a Mulugu mwaha wa namathega mmohi otthwaruwile”.

Musibe wa mwaana ooholowa

¹¹Yesu ahiwelelaga owoga, wiira: “Mulobwana mmohi anna ahima anaalobwana abiili. ¹²Amung'onong'onoya mwa aliwa ahimwaaddela babe, wiira: ‘Babani, mugigawele epaddi ya dhooreela dhigifwanele’. Oliye omugawelawo dhooreeladha.

¹³“Vigavirile malabo ooyeva, muzombwe ole amung'onong'onoya ahitugumanyaga dhego dhaaye dhaatedhene, omaruwa, odhowa elabo emoheene yoolapela, wewo ahinoonga dhookalana dhaaye dhaatedhene ni mukalelo wabure woohuubuwelana dhoosogolo. ¹⁴Agamalile onoonga dhaaye dhaatedhene mwiilaboni mule, mwahidha dala yuulubale, oliye wambeela okanna goyi. ¹⁵Vano ahidhowaga okala ni mulobwana mmohi

a mwiilaboni mwemule, omuruma omidda waaye wi akameelege kumba dhaaye. ¹⁶Wewule oofuna agarubalile maddeya yaaja kumba, mbwenye kaalivo amvaha maddeyaya.

¹⁷“Ahuubuwelaga otthwaruwa wiyiirela yeeka: ‘Anamalaba angaasi a ababa enaja erubalaga mowaakwana, miyo gikwaga dala wuno! ¹⁸Baahi, ginovenya gidhowege wa ababa, gineere wawaaddela wi: Babani, gihi-thegela odhulu ni vameentoni veenyu. ¹⁹Vano kaginafwaneela wiiriwa mwaaninyu; mugaakele wona namalaba eenyu’. ²⁰Ahivenyaga odhowa wa ababe.

“Adheelaga woolapelawene babe ahimoonaga, omweeddiwela thagara. Ahimuthamagelaga, omukubaarela, ombezhari.

²¹“Vano mwaana ahiiraga: ‘Babani, gihi-thegela odhulu ni vameentoni veenyu. Vano kagifwaneelele wiiriwa mwaaninyu’.

²²“Babe ahawaaddelaga amwiimeleli aaye, wiira: ‘Dhaanaani mo-waaguva yoowara yooriyesesa, mmuwarihe teto mmuwarihe pethe mwimbunoni ni satho mmalyoni. ²³Mmudhena mwaana a ng’ombe ooruva mumpe. Niirena mathanga, nihagalale. ²⁴Mwaha wowi mwaana-ga ola ahikwa vano ohukanna egumi, ahirimeela, ohufwanyeya’. Vano wambeela ohagalala.

²⁵“Mwaana a mulubale aaligi omidda awelagawo, aaddamelaga vaade eewilege wiiba ni wiina. ²⁶Omwiithana mwiimeleli mmohi, omukoha, wiira: ‘Eneereya ddi?’ ²⁷Oliye omwaakula, wiira: ‘Ddibilo didhiile, ababo waaruma wi epe mwaana a ng’ombe yooruva mwaha wowi ohumwaake-la, aganna egumi’.

²⁸“Mwaana a mulubale otakaleliwa, kaafunaga ovolowa, babe ahikume-laga vaade, ombebedhaga wi avolowe. ²⁹Mbwenye oliye ahawaakulaga ababe, wiira: ‘Vihivira yaaka dhijinjidhene guwiimelelagani, gihilupile malamulo eenyu, mbwenye kamunagivahe naari mbuzi wi giirena mathanga ni akwaaga. ³⁰Mbwenye mwaaninyu ola onoongile dhooreela dheenyu ni ahiyana ooraruwa, muhumpela mwaana a ng’ombe ooruva’.

³¹“Vano babe ahimwaakulaga, wiira: ‘Mwaanaga, we mudhidhi waate-ne onakala ni miyo, dhaatedhene dhili dhaaga saawo. ³²Mbwenye yaali yoofuneya wi nihagalale, nithabe mwaha wi ddibilo ola ahikwa vano ohukanna egumi, ahirimeela vano ohufwanyeya’ ”.

Musibe wa musadoro oowaraala

16 ¹Yesu ahawaaddelaga anamasuuzwa aaye: “Wahikala mulobwana mmohiwa oreela ole anna musadoro olene athu yamusumeliwa vameentoni va nabwiye wi ononoonga dhooreela dhaaye. ²Vano nabwiye ahimwiithana omukoha, wiira: ‘Gineewiimi wawe si ddi? Waakulele dha omusadoro waawo mwaha wi dhiinova kunafwanelela okala musadoro aaga’.

³“Musadoro ole wiira mwa yeeka: ‘Gineere ddi? Vowi nabwiya aaga onogiigara mu omusadoroni. Olima mmiddani kaginaakwaniha, oloba teto onogikaliha manyazo. ⁴Miyo gihinona yowi giire, wihina athu yagaakelele mmavade mweewa geegariwa mu omusadoroni’.

⁵“Ahawiithanihaga mmohi ni mmohi alene yamfiyaarele nabwiye. Omukoha owambeela, wiira: ‘Wamfiyaarile nabwiya aaga avi?’

⁶“Oliye omwaakula: ‘Yoofiyaari yaaga si mino zana (100) dha makura’.
⁷“Nuwindo, musadoro wiira: ‘Okaraati, othukule kaarata ya yoofiyaari yaawo olebevo mowaaguva makumi matanu (50)’.

⁸“Vano ahimukohaga a nabiili, wiira: ‘Ki we, wafiyaare avi?’

“Oliye omwaakula: ‘Masakwi zana (100) a tirigu’.

“Omwiirela: ‘Thukula kaarata ya yoofiyaari yaawo olebevo makumi matanu ni maraaru (80)’.

⁹“Vano nabwiye a musadoro oonyengetha ole, ahimutamaalela mwaha wa oxaga waaye wewiliye. Mwaha wi athu a elabo ya vati booxaga okwaranya mulogo weewa oli mowaara. ¹⁰Mbwenye miyo gino-wuwaaddelani: Mulabihe dhooreela dha elabo yoonyengetha ela wi akwiinyu dhooreeladha dhoomalelani enodha yuwaakeleleni mmisasani dhoohumala.

¹¹“Ole oli oororomeleya ni dhooyeva, onororomeleyave teto ni dhijinj; ole ohunaharihamo ni dhooyeva kanaharihamo ni dhijinji. ¹²Vowi nyo mwahikale a ebaribari ni dhooreela dhoonyengetha, onoororomeleni baani ni oreela wa ebaribari? ¹³Akala muli oohuroromeleya ni weeddiha dhego dha mmoheene, onoovaheni baani weeddiha dhooreela dheenyu?

¹⁴“Kalivo mwiimeleli onaanda wawiimelela anabwiya abiili; sowi oneerege omwiidda mmohi amudhivelege mmohiwa, naari oneerege omwiivelela mmohi, mmohiwa amunyemulege. Kadhinaandeya omwiimelela Mulugu, wiimelela teto dhooreela”.^p

Malamulo ni Omwene wa Mulugu

¹⁵AFarizi, ale yaali a nrima, yeewaga dhaatedhene dhedhile, yoombeddaga. ¹⁶Yesu ahawiirelaga: “Nyo munowiihelamo wona owaakwanelesesa vameentoni va athu mbwenye Mulugu ohunona mirima dheenyu. Vowi dhinariihedheya vameentoni va athu, vameentoni va Mulugu dhinakala dhoonyemuwa.

¹⁷“Malamulo ni anamavuhulela yahivuhulela ofiyedha mudhidhi wa Zhuwawu. Okumela vevale odhowa osogolo onolaleyiwa Muselu Wapama wa Omwene wa Mulugu, vano athu aatene enaakwaniha ovolowa mwemule ni kopolo, baahi. ¹⁸Sookweya vajinji ovira odhulu ni elabo ya vati, ohiyana wi omorevo mujebho mmohi wa Malamulo.

18 “Aatene enamwalana ni mwihiyanaaye, amutela mmohi onooraruwana, ole onamutela mwihiyana omwalanile ni mamune, onoomuraruwana.

Musibe wa mureeli ni Lazaro

19 “Ahikalawo mulobwana mmohi ooreela awaresa dhoowara dha mutheengo mulubale dha liinyu oofeewa ni owiirihedha mathanga malubale, akala ni mukalelo wa athu ooreelesesa malabo maatene. 20 Ahikalawo teto muliba ooloba-loba eriwa Lazaro, anna makwadda mwiili waatene akalesa vamulago va muliba oreela ole; 21 oofunesesa oja dhoonyenyeya dhamoresa vameeza a muliba oreela. Ofiyedha anabwa yodheesa onyangulaga makwadda aaye.

22 “Dhahipadduwa muliba ooloba-loba agakwile, angero yahimuthukulaga omudhowana wakala Abarahamu. Agakwile muliba oreela yahimudhowana omulogoha. 23 Arabulaga, omunddoni mburo wa anookwa, ahisugwa odhulu, omoona Abarahamu ni Lazaro agali nikukuru. 24 Nuwindo, ahikuwaga, wiira: ‘Babani Abarahamu, mugeeddiwele thagara, mmurume Lazaro anyethihe mmahinjeni otompini wa embuno yaaye adhena addiddilihena nlumi naaga, vovi ginorabula mmunddoni mula’.

25 “Abarahamu ahimwaakulaga, wiira: ‘Mwaanaga, wuubuwelele wi wahaakela dhego dhapama dhoohagalasa egumi yaawo, wewule Lazaro aakelile dhoorabula. Mbwenye dhiinova, oliye onahagalala wuno, we onoorabula. 26 Ohiya dhaatedhene vaari va hiyo ni nyo vihikala jiji, vovi eli wuno enafuna odha wo, kinaakwaniha, naari eli wo, enafuna odha wuno kinaakwaniha.

27 “Nuwindo, ahikalelaga ntidi, eeraga: ‘Babani, miyo ginowuulobani wi mmurume Lazaro adhowe vaade va ababa 28 mwaha wi gihikanna addibilaga atanu. Awaaddele wi naaliweene enaadhe teto mburo ola wa masooso’.

29 “Abarahamu ahimwaakulaga, wiira: ‘Aliwa ehikanna Mozezi ni anamavuhulela, yawiiwelele aliweene’.

30 “Mbwenye oliye ahikalelaga ntidi: ‘Naari, babani Abarahamu, akalavo mmohi ovenyile muukwani adhowa awoga ni aliwa, enotthwaruwa’.

31 “Abarahamu ahimwaakulaga, wiira: ‘Akala aliwa kinamwiiwelele Mozezi ni anamavuhulela, nivang'onong'ono kinafunege ogonjihiwa wi ehiye naari muthu mmohi avenye omakwelo’ ”.

Yoothega ni oleveleliwa

17 1 Yesu ahawiiirelaga anamasuuzwa aaye: “Kadhinaandeya wi dhooholosa dhiihdhe, mbwenye oddilu wa muthu oyene onadhana. 2 Yaali yoofwanelele amageleliwe mukohi nibwe nuulubale na nsilo, avokedhiwe munyaza, ohiya omuthegiha mmohi mwa ahima ala.

3 “Pole-pole. Akala ddibilo ohuthega, omusumulule, atthwaruwe omulevelele. 4 Oothegela dila tanu nabiili vanlaboni, dila tanu nabiili adha wa we, eeraga: ‘Gihitthwaruwa’, omulevelele”.

⁵Vano arumiwi yahimwiirelaga Nabwiya: “Muneenjhedhe nrromelo neehu!”

⁶Nabwiya ahawaakulaga, wiira: “Mwakalana nrromelo wona bewu ya mukwani muneerege wiirela muthanko wa amora ola: ‘Wiiddule weedhale munyaza’, vano oneerege wuwiiwelelani.

⁷“Baani wa nyoovo onakanna mwiimeleli aaye alabaga omudda, naari aang'anelaga mabila, vooweruwa omudda amwiirela: ‘Odhe mo-waaguva okaraati, oje?’ ⁸Kuneere nda, onomwaaddela wi: ‘Osasanyedhe yooja, oware guwo dhimohi, ogiimelele va. Miyo gamala oja ni ong'wa, we fineeriwe oje, ong'we’. ⁹Munoobuwelela wi oneere omutamaalela mwiimeleli ola mwaha wowiirana dharumiwiye? ¹⁰Ndala teto nyo mweerana dhaaddeliwiinyu, mwiire: ‘Nili amwiimeleli eebeweene mwaha wi nihiirana dhafwaneelihi wiira’ ”.

Oyilihiwa wa aliba mareda kumi

¹¹Yesu adhowaga oZheruzalemi ahivira mmigaanoni mwa Samariya ni Galileya. ¹²Avolowagawene mmudhini athu kumi a mareda^q yahimuharelaga, wiimela wuddeeddewene. ¹³Egeemelile wuddeedde wewule yookuwaga, yiiraga: “Yesu, namasuuziha, muneeddiwele thagaraga!”

¹⁴Yesu agawoonile, ahiraga: “Mudhowe mweyoonihe wa anamaku-tha”. Dhahipadduwa edhowaga mundila yahiyilihiwaga.

¹⁵Mmohi wa ale kumi agoonile wi gihiyilihiwa, ahiwelelaga mundduli amutamaalaga Mulugu ni ndhu nootaama. ¹⁶Agafiyile vaaligi Yesu, ahikokoraga oworomihedha kove vati va manyalo a Yesu, atamaalelaga. Ola aali muSamariya.

¹⁷Vano Yesu ahimukohaga, wiira: “Kamwaali kumi mweelihiwe? Ki atanu ni annayi eli waani? ¹⁸Kalivo mmohi owelile wi amuthithimihe Mulugu, ahili mwanaweendda ola?” ¹⁹Omwiirela: “Kawege nrromelo naawo nuhuuyilihi”.^r

Odha wa Omwene wa Mulugu

²⁰Dhahipadduwa ayi, aFarizi yahimukohaga Yesu wi Omwene wa Mulugu onadha alini? Yesu ahawaakulaga, wiira: “Omwene wa Mulugu kunadha ni mukalelo wowooneya ni meento, ²¹athu kidha ewogaga, yiira: ‘Oli veva’, naari ‘Ole oli vale’, vowi Omwene wa Mulugu oli muwari mwa nyo”.

²²Yesu ahawaaddelaga anamasuuzi aaye, wiira: “Onofiya mudhidhi onafunigiinyu woona nlabo nimohi na Mwaana a Muthu mwa malabo alene, kamudha moona. ²³Athu enodha yuwaaddelegeni wi: ‘Oli va!’

^q 17.12 *Mareda* mu ewogelo ya eGerego kinaagana maredave mbwenye teto dhireda dhoohiyana-hiyana dha nikupa na muthu. ^r 17.19 Naari wi: *nuhuuvulumusa*.

naari ‘Oli wule!’ Kamuyewo, naari kamwaahare. ²⁴Vowi nlabo nnadha Mwaana a Muthu kanidha naanganyedheya onaakale wona ozherima, onadheela odhulu omoneyelaga dhipaddi dhaatedhene. ²⁵Mbwenye enofuneya wi vowambeela oliye arabulihiwe mwa dhego dhijinji, akooddiwe ni mulogo ola.

²⁶“Dhapadduwile malabo a Nowe teto sinaapadduwe malabo a Mwaana a Muthu. ²⁷Athu yooja, yoong'wa, yootela ni oteliwa, ofiyedha nlabo navolowile Nowe mmwanddeyani, odha mutokora waatolosa aatene.

²⁸“Dhimohive dhedhi dhahipadduwa malabo a Lothi. Yooja, yoong'wa yoogula, yooguliha, yoodhala, yoomaga nyuba dhijinji. ²⁹Mbwenye Lothi nlabo navenyigiiye oSoddoma, odhulu wahirubwaga munddo ni mabwe oohidda, waatolosa aatene.

³⁰“Dhinadha dhiireye ndala nlabo noodha wiyooneyiha Mwaana a Muthu. ³¹Nlabo nddo onaakale vadhulu va nyuba onadhe akite wi akumihemo dhookalana dhaaye dhili mba. Emodha-modhave onaakale omudda ahiwelele mundduli wi athukule dhego. ³²Muubuwelele dha mwadha Lothi! ³³Ole onafuna wiing'anela egumi yaaye onoyelela, vano ole onaye-lele onovulumusa. ³⁴Ginowuwaaddelani wi: Mahiyu ayene abiili enodha ekale vakamani; onodha athukuliwevo mmohi, ahiyiwevo mmohiwa. ³⁵Ahiyana abiili enoodha esilege vamohi, athukuliwevo mmohi, ahiyiwevo mmohiwa”.^s

³⁷Vano anamasuuzaa aaye yahimukohaga, wiira: “Dhineereye waani dhedhi, Nabwiyani?”

Yesu ahaakulaga, wiira: “Vevo vinaakale muruthu, fivevo teto vina-tugumane mibidha”.^t

Musibe wa maamukwele a ntidi

18 ¹Yesu ahaawogela musibe mmohiwa, voofuna wawaaddela wi elo-belege mudhidhi waatene ehigomege, ²eeraga: “Muluwani nimohi mwahikala namathonga miladdu ahamoova Mulugu, naari kaamuriha muthu. ³Ahikalawo teto maamukwele mmohi muluwani mwemule, adheesa wa oliye, awogaga, eeraga: ‘Mugithongele muladdu oli vaari va miyo ni mwiiddani aaga’. ⁴“Vahivira mudhidhi ahifunaga owoga. Mbwenye vooharela ahiiraga yeeka: ‘Naari gihimoovaga Mulugu, naari gihimurihaga muthu, ⁵vowi mwihiyana ola onoginyagula, gineere gimuthongele muladdu waaye wi onaadhe aginyaguleve’ ”.

^s 17.35 Enofwanyeya verisikulu 36 eneera: “Athu abiili enodha ekale omudda; athukuliwevo mmohi, vano mmohiwa ahiyiwe” elebiwe mu dhoolebiwa ni madada dhing'onog'ono baahi. Mwa ela anamasuuzaa ajinji enoobuwela wi madhu ala kiyalebiwe ni Luka. Moone Matewuzhi 24.40. ^t 17.37 Madhu ala enatapulela wi odha wa Mwaana a Muthu kudha orabuleleya. Athu aatene enoodha enone, a vakuukuvi ni awoolapela enoodha etugumanege odha ogumana ni oliye. Moone Matewuzhi 24.28; Ovuhulela 19.17,21.

⁶Nabwiya aheenjedhagave, eeraga: “Mwihiiwa madhu a namathonga muladdu gwalagwambi ole. ⁷Mulugu kanaathongele mwa ebaribari oosaku-liwa aaye, enamweebedha mahiyu ni mutana, naari viviraga malabo majinji ahinawaakule? ⁸Ginowuwaaddelani wi Mulugu mowaaguva onodha athonge muladdu weewa. Mwa dhaatedhene dhedhi adha adhaaga Mwaana a Muthu, onodha afwanye nrromelo elabo ya vati?”

Musibe wa mFarizi ni namakoha-musoko

⁹Yesu aheenjedhagave, waawogela musibe ale yeeromela wi booharhamo malamulo a Mulugu yaabeddaga athu amohiwa. ¹⁰“Yaaligi alobwana abiili yahivolowaga nyuba ya Mulugu wi yalobele; Mmohi aali mFarizi, mmohiya aali namakoha-musoko. ¹¹MFarizi ageemelile, egi olobela mwa oliye yeeka eeraga: ‘Nabwiya Mulugu, ginowuutamaalelani vovi kaginaligana ni athu amohi: anameeya, oohuroromeleya, aliba oraruwa wona namakoha-musoko ola. ¹²Ginothuga dila biili vasumaanani, ginoveleela dhaneekumi mwa dhaatedhene dhinapuriimi’.

¹³“Mbwenye namakoha-musoko ahiimelaga, volapelavene, naari kaafunaga othukulela meento aaye odhulu ooddwadhaga vathimarimani vaaye, eeraga: ‘Ee, Nabwiya Mulugu, mugeeddiwele thagaraga vovi gili namathega’ ”.

¹⁴Yesu ahiiraga: “Ginowuwaaddelani wi namakoha-musoko ole ahiwelela vaade vaaye agaleveleliwe dhoothega dhaaye, mmohiwa ole, naari. Ole oneere eyunnuwihe onookitihiwa, oneeyeviha, onowunnuwihiwa”.

Yesu onowareeliha ahima

(Matewuzhi 19.13-15; Maruku 10.13-16)

¹⁵Athu yowaadhana ahima wa Yesu wi aahela madada areelihe, mbwenye anamasuuzavawooniligiiwa, yegi waahiiha. ¹⁶Mbwenye Yesu ahawiithanelaga vaaligi oliye ana-ahimaya, wiira: “Ahiyeni ahima edhe wa miyo, kamwaahiihe, sowi Omwene wa Mulugu bwa athu enaligana ni aliwa. ¹⁷Ebaribareene ginowuwaaddelani wi ole ohunaakele Omwene wa Mulugu wona mwaana, kadha avolowamo”.

Muthu ooreela

(Matewuzhi 19.16-30; Maruku 10.17-31)

¹⁸Mulobwana mmohiwa ooreela ahimukohaga Yesu, wiira: “Namasuuziha apama, gineere ddi wi gaakele egumi yoohumala?”

¹⁹Yesu ahimwaakulaga, wiira: “Onaggiirela ddi apama? Kalivo oli apama, apama di Mulugu, baahi. ²⁰Ohaanona malamulo: ‘Kuraruwe, kumpe muthu, kawiiye, kumwiinkedhe mukwaawo, waariihege ababo ni amaayo’ ”.^u

^u 18.20 Okuma 20.12-16; Deteronomiyo 5.16-20

²¹ Muthu ole ahiiraga: “Dhaatedhene dhedho gambeele ohara ngali muzombwe”.

²² Yesu ageewile, ahimwiirelaga: “Yego emohi ehuhaleela, ogulihe dhaatedhene dhinniiwena, korowadha waavahe athu oorabula, dhooreela onoodha ofwanye odhulu. Weera ndo, ogiharege”.

²³ Muthu ole ageewile madhu ale, ahikukumuwaga wovi aali ooreela vajinji. ²⁴ Yesu agamoonile [wi ohukukumuwa vajinji,] ahiiraga: “Dhili dhoorusa vajinji wi athu ooreela evolowe muuMweneni wa Mulugu! ²⁵ Eli yookweya kamelo ovira mookupula mwa singano, ohiyana wi athu ooreela evolowe muuMweneni wa Mulugu”.

²⁶ Ale yeewilege, yahiiraga: “Akala dhili ndo, ki onaande ovolowa baani?”

²⁷ Yesu ahawaakulaga, wiira: “Dhihinaandeya ni athu, dhinaandeya ni Mulugu”.

²⁸ Vano Peduru ahiira: “Hiyo nihihiya dhaatedhene dhaanihuna, wuuharagani”.

²⁹ Yesu ahawaakulaga, wiira: “Ebaribareene ginowuwaaddelani wi kaliwo muthu onaahiye nyuba yaaye, mwihiyanaaye, addibile, ababiinya, naari anaaye, mwaha wa Omwene wa Mulugu, ³⁰ ohunaakele dhiinovewa vajinji-vene mookwaranya dhanniyena, teto mu elabo enadha, egumi yoohumala”.

Yesu onowoga dila ya neethaaruu dha okwa waaye ni ovenyihwa
(*Matewuzhi 20.17-19; Maruku 10.32-34*)

³¹ Yesu ahawiithanelaga wovihivale anamasuuzwa kumi ni abili, wiira: “Mwiiwe, nili voolenddoni woodhowa oZheruzalemi. Wewo onaakwane-lihiwe dhaatedhene dhilebiwe ni anamavuhulela dhinawoga dha Mwaana a Muthu. ³² Miyo gineere opelekiwa mmadadani mwa athu oode.”^v Gineere obeddiwa, oruwaniwa, otaperiwa mare, ³³ owaxuliwa, egipe. Vano nlabo na neethaaruu gineere ovenya muukwani”.

³⁴ Anamasuuzwa ale kayeewelegamo yego mwa dhaatedhene. Dhatapulelaga madhu ala yaaligi oowiipiteya, kayanonelagamo dhawogigiye.

Yesu onomuyiliha muliba ohoona
(*Matewuzhi 20.29-34; Maruku 10.46-52*)

³⁵ Dhahipadduwa Yesu aaddamelaga nluwa na oZheriko wahikala muthu ohoona akaraatilege seresere ya rampa, alobaga wa athu yowii-kamihedhana. ³⁶ Ageewile musiddo wa anamwinji wa athu yaviraga ahikohaga si ddi eneereya. ³⁷ Yahimwaaddelaga, wiira: “Yesu a oNaza-rethi dinavira”.

^v 18.32 Ala baayene yahaali aZhudewu.

³⁸Vano oliye ahikuwaga, wiira: “Yesu, Mwaana a Davidi,” mugeeddiwele thagaraga!”

³⁹Ale yadhowaga osogolo wa Yesu yomwihiihaga wi amaale. Mbwenye oolibihedhagave okuwaga: “Mwaana a Davidi, mugeeddiwele thagaraga!”

⁴⁰Vano Yesu ahimelaga, wawiirela wi emudhowena va oliye. Agafiyile, Yesu ahimukohaga, wiira: ⁴¹“Onafuna guwiirele ddi?”

Oliye waakula: “Nabwiyani, ginafuna giwelele woona”.

⁴²Yesu ahimwiirelaga: “Woonaa waawo owelele, nuuyilihile thi nrromelo naawo”.^x ⁴³Mowaaguva ahambeela woona, omuharaga, amutamaalaga Mulugu. Athu aatene egoonile nde yoomutamaalaga Mulugu.

Zakeyu namakoha-musoko

19 ¹Yesu ahifiyaga oZheriko aviraga muluwani mule. ²Mwahikala muthu mmohi ooreela eeriwa Zakeyu, mpogo a anamakoha-musoko. ³Oofunesesaga omoona Yesu baani, mbwenye kaakwanihilege ni wiinjiva wa athu, vowi aali ookwiiva. ⁴Nuwindo, ahithamagelaga osogolo, ogwela munthazani wi amoone vowi Yesu aavire vevale vaaligiye.

⁵Yesu agafiyile mburo olene, asugwaga odhulu ahimwiirelaga: “Zakeyu, kita mowaaguva. Vowi soofuneya peeno wi gikale vaade vaawo”.

⁶Oliye ahikitaga mowaaguva omwaakela ni ohagalala.

⁷Aatene yoonilege nde yomwaabaga yiiraga: “Oliye ofiyedhe vaade va ‘namathega’”.

⁸Nuwindo, Zakeyu ahimelaga omwiirela Nabwiya wi: “Ginogawa vaari dhooreela dhaaga gaavahe oorabula. Akala gihimwiiyela muthu ginomuwelihedha dila nnayi okwaranya dhamwiiyeliimi”.

⁹Yesu ahimwiirelaga: “Peeno ovulumusa ohufiya vaade va vowi ola teto di mwaana a Abarhamu. ¹⁰Vowi Mwaana a Muthu odheelee waasayela ni waavulumusa oorimeela”.

Musibe wa korowa kumi dha parata

(Matewuzhi 25.14-30)

¹¹Yesu ahaawogelaga musibe mmohi wa alene yamwiiwaga oliye nde dhawogigiye, vowi aaligi vakukuuve ni oZheruzalemi, mwa ela aliwa yoobuwelaga wi Omwene wa Mulugu weere ofiya mowaaguva. ¹²Nuwindo, Yesu wiira: “Muthu mmohi a nlogo noovuweya ahidhowa elabo emohiya woolapa wi avahiwe omwene eendo awelewo. ¹³Ahawiithanaga amwiiemeleli aaye kumi, waavaha korowa dha parata kumi, wiira: ‘Mwiiiregena nagooso ofiyedha ginaweliimiwo’.

¹⁴“Mbwenye athu a elabo ele yoomugana, yahaaruma mundduli mwaaye arumiwi wi yamwiirele: ‘Hiyo kannafuna wi anithongege’.

^w 18.38 Mwaana a Davidi Ndda naali ndina nimohi na Misiya nanoniwiiyena ni aZhudewu. Moone teto verisikulu 39. ^x 18.42 Naari wi: *nuhuuvulumusa*.

15 “Vano oliye aweliliyewo, agavahiwe omwene, ahawiithanaga amwiimeleli alene yaavahiliye korowa dha parata wi anone dhipuriliisu.

16 “Ahidhaaga owambeela, wiira: ‘Nabwiyani, korowa yeenyu ele, gipurilemo dhimohi kumi’.

17 “Nabwiye ahimwaakulaga, wiira: ‘Dhihikala pama, we oli mwiimeleli apama, mwaha wi ohooneyiha ororomeleya ni dhooyeva, onodha waathonge maluwa kumi’.

18 “Ahidhaaga mwiimeleli a nabiili, eeraga: ‘Nabwiyani, korowa yeenyu ele, gipurilemo dhimohi tanu’.

19 “Nabwiye ahimwiirela teto ni olena: ‘Onoodha waathonge maluwa matanu’.

20 “Odha vevale mwiimeleli mmohiwa, eeraga: ‘Nabwiyani, korowa yeenyu ela, galogohiliimi gamagile muleesoni. 21 Miyo gowuwoovani vovi nyo muli muthu oorusa, munovenyihavo elene muhuheliliinyuvo ni ohadda nde muhudhaliliinyu’.

22 “Nabwiye ahimwaakulaga, wiira: ‘Mwiimeleli abure! Ni mwaha wa vamulomoni vaawo ginowuukona. Wahinona wi miyo gili muthu oorusa, ginovenyihavo gihiheliliimivo ni ohadda dhidhaliliimi. 23 Ki mwahaya bwaddi odhe ohuhelege obanko korowa yaaga, miyo gawelawo, gaakele moweenjedhedheya?’

24 “Vano ahawiirelaga ale yoonelaga: ‘Mmwaake korowa eyo mumvahe olene winna kumi’.

25 “Aliwa yahimwaakulaga, wiira: ‘Nabwiyani, oliye ohukanna dhimohi kumi!’

26 “Miyo ginowuwaaddelani wi ole winna oneere weenjhedhi-wa mbwenye ole ohinna, naari yooyeva elene yinniiyena onowaakiwa. 27 Mbwenye amwiiddani alene yahafunile wi miyo gaathongege aliwa, mwaadhena wuno mwaape vameentoni vaaga!”

Yesu onovolowa muZheruzalemi ni ovuwa

(Matewuzhi 21.1-11; Maruku 11.1-11; Zhuwawu 12.12-19)

28 Vano Yesu agawogile nde, ahisogolaga odhowa oZheruzalemi. 29 Dhahipadduwa ayi, yaaddamelaga oBetifazhe ni oBetaniya vakukuuve ni Mwaango wa Olivera, ahaarumaga anamasuuzaa aaye abiili, 30 wa-waaddela, wiira: “Dhowani mudhi onooniinyu oyo. Mwaavolowaga, munomfwanya mwaana a buuru agamagileliwe ohunagweliwege ni muthu. Mmutapule, mmudhena. 31 Muthu onookoheni, eera: ‘Munamutapulela ddi?’ mmwaakule, mwiire: ‘Nabwiya dinamfuna’ ”.

32 Vano ale yarumiwege edhowaga, yahimfwanyaga wona mwawaaddelege Yesu. 33 Aliwa emutapulaga buuru, anyaya yahiiraga: “Munamutapulela ddi?”

34 Aliwa yahawaakulaga, wiira: “Mwaha wi nabwiya dinamfuna”.

³⁵Nuwindo, yahimudhaagana, otadeela dhoowara dheewa vadhulu vabuuruni ole, omwiirela Yesu wi amugwele. ³⁶Yesu adhowaga, athu yootadeelaga dhoowara dheewa murampani.

³⁷Vano aaddamelaga mukitakita wa Mwaango wa Olivera, anamwinji aatene, anamasuuzi, yoolupaga moohagalala ni madhu oomutamaa-la Mulugu, mwaha wa dhootikiniha dhaatedhene nde dhooniligiwa, yiiraga:

³⁸“*Oreelihiwa di mwene ole onadha mu ndina na Nabwiya!*”

*Murenddele okale odhulu,
nthithimihoni nikale wa Mulugu a Mudhulu-dhulu!”*

³⁹Vevale aFarizi amohiwa yahimwiirelaga vaari va anamwinji: “Namasuuzi, mwaamaalihe anamasuuzi eenyu!”

⁴⁰Mbwenye Yesu ahawaakulaga, wiira: “Ginowuwaaddelani wi aliwa yamaala mabwe binakuwege”.

Yesu onamuundela Zheruzalemi

⁴¹Yesu aaddamelaga oZheruzalemi agoonile nluwa ahiindaga, ⁴²eera-ga: “Ee! Akalagahi peeno wahinona mwa we weeka, dhego dhinavaha murenddele. Mbwenye dhiinova nda dhili dhoologoheya vameentoni vaawo. ⁴³Vowi enodha malabo amwiiddani aawo enoorijiwa ni miliddi dhoothawelamo ni waapeeliha dhipaddi dhaatedhene yuuthiyeelelena. ⁴⁴Eneere wuutolosa we ni anaawo aatene. Vowi kanidha nihiyiwa nibwe nimohi vadhulu va nibwe nimohi, mwaha wi kunonile mudhidhi olene wadhiile Mulugu wi oovulumuse”.

Yesu onoweeliha nyuba ya Mulugu (*Matewuzhi 21.12-17; Maruku 11.15-19*)

⁴⁵Vano Yesu avolowaga vathaddo va nyuba ya Mulugu, ahambeelaga wathamagihamo anamaguliha. ⁴⁶Ahawaaddelaga, wiira: “Dhihilebiwa: ‘Nyuba yaaga enaakale nyuba ya matugumano a malobelo.’”^z Mbwenye nyo muhusaddula okala nikungu na ambava”.^a

⁴⁷Yesu oosuuzihesa munyuba ya Mulugu malabo maatene. Mbwenye apogo a anamakutha, anamasuuzi a malamulo ni asogoleli a athu yoo-funa empe. ⁴⁸Mbwenye kayanna yowiira vovi athu aatene yoodhiveliwa vajinjivene yavuruwanaga madhu aaye.

Yesu onokohiwa dha owodha waaye (*Matewuzhi 21.23-27; Maruku 11.27-33*)

20 ¹Nlabo nimohi Yesu aasuuzihaga athu mu nyuba ya Mulugu, alaleyaga Muselu Wapama, yahidhaaga apogo a anamakutha ni

^y 19.38 Masaalimu 118.26. ^z 19.46 Ezaya 56.7. ^a 19.46 Zheremiya 7.11.

anamasuuziha a malamulo, vamohi ni makolo a mutugumano. ²Yahimukohaga, wiira: “Onaaddele owodha oneeriwena dhego dhi okumilena waani? Wuvahile owodha wula baani?”

³Yesu ahawaakulaga, wiira: “Miyo teto ginowuukohani yego emohi, mugaaddele: ⁴Amvahile Zhuwawu Namabathiza owodha wi abathizege aali Mulugu, yaali athu?”

⁵Aliwa yahambeelaga okohana mwakaleligiisu, yiiraga: “Neera ‘Amvahile di Mulugu’, ononikoha eere: ‘Ki mudhe muhumurumedhege?’ ⁶Vano nehi niire: ‘Wali wa athu’, athu aatene enofiyedha onipa ni mabwe vovi mmurimani mweewa enolibihedha wi Zhuwawu aali namavuhulela”.

⁷Omamalelo wiwa yahaakulaga, wiira: “Kannonile”.

⁸Vano Yesu ahawaakulaga, wiira: “Naari miyo teto kaginowaaddelani ni owodha baani ginieriimina dhego dhi”.

Musibe wa anamalima abure

(*Matewuzhi 21.33-46; Maruku 12.1-12*)

⁹Nuwindo, Yesu ahambeelaga owoga ni athu ale musibe ola: “Mulo-bwana mmohi ahilima mudda wa uuva, ahaahiyedha anamalima, oliye ovenyavo odhowa elabo emohiwa, ahikala wewule mudhidhi woolapeleene. ¹⁰Ogafiyile mudhidhi woovaha dhoovaha dha uuva ahimuruma mwiimeleli aaye wa anamalima ale wi yamvahewo dhoovaha dha mmuddani mule. Mbwenye anamalima ale yahimuddwadhaga, omuwe-liha, ehimvahile yego. ¹¹Nuwindo, ahimuruma mwiimeleli mmohiwa, mbwenye teto nuulena yahimuddwadhaga omwiirela dhabure, omuwele-liha mundduli ahinna yego. ¹²Nuwindo, ahimuruma a neethaaruya teto nuulena yahimporosa, omvokedha okwibi.

¹³“Vano muliba mudda ole ahiira: ‘Gineere ddi? Gimurume mwaanaga, ginamudhiveliimi mwaagahi ola kimuriha?’

¹⁴“Anamalima ale egamoonile, yahaaddelanaga mmohi ni mukwaaye, yiiraga: ‘Ola di namahalana mudda, nimpe wi mureeleloya okale weehu’.

¹⁵Yahimvokedhaga ode wa mudda ole, ompa.^b

“Ki muliba mudda ole adha, onawiirena avi anamalima ale? ¹⁶Oliye onoodha, aape, eera ndo, aabolihe amohi muddaya”.

Athu egeewile nda, yahiiiraga: “Dhi kadhinapadduwa!”

¹⁷Vano Yesu ahaasugwaga, wiira: “Enatapulela ddi yoolebiwa ela eni:

“*Nibwe nenddo nakooddile anamamaga nyuba,
ndda nihisadduwa okala nibwe noohiddeela nyuba.*”^c

¹⁸Olene onatongwele nibwe nddi onogwaddanyeya, ole nnammoreliiwa nibwe nddi onoosileya”.

^b 20.15 Mukalelo wa aZhudewu yalima mudda yowaabela cinga. ^c 20.17 Masaalimu 118.22

¹⁹Wora emohive elene anamasuuziha a malamulo ni apogo a anamaku-tha yoomusayela omwihidda vovi yahiiwaga wi musibe ole aawogelaga aliwa. Mbwenye yawoovaga athu.

Opeleka musoko wa Sezari

(*Matewuzhi 22.15-22; Maruku 12.13-17*)

²⁰Vano yoomuharahara, yahaaruma athu yanna mukalelo woohari-hamo wi yamuwage Yesu muwano, emwihidde yampeleke mu othongi wa kuminadori. ²¹Vano yahimukohaga, wiira: “Namasuuziha nihinona wi munowoga, munosuuziha mowogoowa, kamwinna nsakulo wi ola baani, munosuuziha dila ya Mulugu ni ebaribari. ²²Dhinorumeedheya, naari kadhinarumeedheya wi nipeleke musoko wa Sezari?”

²³Mbwenye Yesu vovi ahinona ogongomwa weewa ahawaakulaga, wiira: ²⁴“Mugoonihe korowa emohi ya parata.^d Kove elivo sawani? Ki ndina nilebiwevo thawani?”

Vano aliwa yahimwaakulaga, wiira: “Dha Sezari”.

²⁵Yesu ahawaaddelaga, wiira: “Mumvahege Sezari eli ya Sezari, mumvahege Mulugu eli ya Mulugu”.

²⁶Kayoonile yoomwihiddana mmadhuni vameentoni va athu, vano mootikiniheya ni dhowaakula dhaaye yahimaalaga.

Ovenyihwa muukwani

(*Matewuzhi 22.23-33; Maruku 12.18-27*)

²⁷ASaduseyi amohiwa, ayene yaharumeedha wi ohukalawo ovenyihwa muukwani, yahimwaaddamelaga Yesu. ²⁸Omukoha, wiira: “Namasuuziha, Mozezi ahileba nlamulo nowi akwa mulobwana mmohi, akala ahitela amwihiya mwihiyanaaye, ahinna ahima, ddibile amutele-ge maamukweleya wi ambalele ahima ddibile ole yeelengiwege ahima a mwanookwa. ²⁹Dhahiireya ndala yahikalawo addibila atanu ni abiili. Owambeela ahimutela mwihiyana, oliye okwa, ahimbalilena mwaana.

³⁰A nabiili, ³¹a neethaaru, emodha-modhave atanu ni abiili ala yahikwa, yahimbalele ahima. ³²Teto omagomihedhowa mwihiyana ole okwa. ³³Ki nlabo noovenyihwa muukwani mwihiyana ola, onaakale mwadha wani vovi addibila aatene atanu ni abiili ale yahimutela?”

³⁴Yesu ahawaakulaga, wiira: “Athu eli elabo ya vati vano enotela, enoteliwa. ³⁵Mbwenye ale enaakale oofwaneelela ofiya elabo eyo enadha voovenyihwa muukwani kawuli otela naari oteliwa, ³⁶vovi kinaakwege, enaakale wona angero. Vano enakala ahima a Mulugu mwaha woo-venyihwa muukwani. ³⁷Mozezi ahiwoga wi anookwa enovenyihwa

^d 20.24 Naari wi: *denariyo*. Denariyo yaali korowa yawale ya parata ya oRoma mutheengo waliveliwa namalaba alaba nlabo nimohi.

vawogiliye thalako ya nikupu nahiddaga munddo, veeriliye wi ‘Nabwiya di Mulugu a Abarhamu, Mulugu a Ezaaki, Mulugu a Yakobo’.^e ³⁸Mulugu kahuwo Mulugu a athu ookwa, di Mulugu a athu ookalawo vowi wa oliye aatene ehikanna egumi”.

³⁹Vano amohiwa mwa anamasuuziha a malamulo yahiira: “Nama-suuziha, muhaakula pama!” ⁴⁰Nuwindo, yowoovaga omukoha dhimohi dhiwa.

Kirixtu di Nabwiya a Davidi

(*Matewuzhi 22.41-46; Maruku 12.35-37*)

⁴¹Yesu ahaakohaga, wiira: “Enaawogela ddi wi Kirixtu^f di mwaana a Davidi? ⁴²Vowi mwiinyeene Davidi ohuwoga mmaniivuruni a Masaalimu, wiira:

“*Nabwiya Mulugu ohuwoga wa Nabwiya aaga:*

Okaraati omoononi waaga wooja,

⁴³*ofiyedha gaahela amwiiddani aawo*

ekale wona voonyingala manyalo aawo’.^g

⁴⁴Akala Davidi onamwiira ‘Nabwiya’. Onaakale addi mwaanaye?”

⁴⁵Athu aatene emvuruwanaga Yesu ahawaaddelaga anamasuuziwa aaye, wiira: ⁴⁶“Pole-pole ni anamasuuziha a Malamulo, enodhiveliwa owara mikanjo dhoolapa, efunaga vajinjivene ojolijiwa ni nriho mburo dhowooneya. Aliwa enodhiveliwa mu nyuba dha matugumano enothamagela okaraatela dhittengu dhowambeela, mburo dha nriho mmathangani. ⁴⁷Aliwa enowaaka mowaaguva nyuba dha amaamukwele aahiyana ni wawiiyela dhookalana dheewa moohukalana manyazo, enolobela moolapiha, moonyengetha. Athu ala enoodha yoonihiwe goyi yuulubale waakwaranya amohi”.

Yooveleela ya maamukwele oorabula

(*Maruku 12.41-44*)

21 ¹Yesu ahisugwaga, wawoona aliba oreela evokedhaga yoovaha mukaxani mwa korowa, ya nyuba ya Mulugu. ²Ahimoona-ga mwihiyana maamukwele oorabula, ahivokedhagamo korowa biili dhing'onong'ono dha gwingwi. ³Vano ahiiraga: “Ebaribareene ginowu-waaddelani wi maamukwele a mwihiyana oorabula ola ohuvaha vajinji waakwaranya aatene. ⁴Mwaha wi ala ehivaha wona yoovaha moothapa. Mbwenye ola, moorabulani mwaaye, ohuvaha dhaatedhene dhanniiyena dhafuniye wiikamihedhana”.

^e 20.37 Okuma 3.6 ^f 20.41 Kirixtu mu ewogelo ya eGerego enatapulela *Muthikitheliwi, Misiya*, naari wi: *oosakuliwa a Mulugu*, oyene onaavulumuse athu. ^g 20.42-43 Masaalimu 110.1

Etoonyihedho ya makuthulo a dhaatedhene
(*Matewuzhi 24.1-35; Maruku 13.1-31*)

⁵Anamasuuzwa amohiwa yoowogaga dha mukalelo woomageya nyuba ya Mulugu, moowomihedhela ni mabwe ooriya ni mvahi dha nyuba ya Mulugu. Yesu ahiiraga: ⁶“Nyo munoono dhego nda? Enoofi-ya malabo ohunaakale nibwe vadhulu va nibwe nikwaaye, nihinaadhe nihibwanyuliwe”.

⁷Yahimukohaga, wiira: “Namasuuziwa, dhinapadduwa alini dhego dhedho? Ki etoonyihedho baani enaadhe ekalewo dhego ndo dhadha dhaakwanelihwaga?”

⁸Yesu ahawaakulaga, wiira: “Pole-pole wi munadha muholosiwe, ajinji enoodha edheege mundina naaga, yiiraga: ‘Miyo gili oliyeene’ teto enoodha yiirege: ‘Mudhidhi ohaaddamela’. Ala munadha mwaahare! ⁹Mudha mwiiwaga dha koddo, ovenyedhana, muhoove. Soofuneya vowambeela dhipadduwe dhego ndo, mbwenye omakuthulo wa elabo kunafiye”.

¹⁰Vano ahawaaddela, wiira: “Nlogo nneerege owana koddo ni nlogo nimohi, omwene oneerege owana ni omwene omohi. ¹¹Onoodha okalewo othikeya wuulubale wa elabo, ni dhiredda wona thoba, ni dala mburo dhoohiyana-hiyana, dhoopadduwa dhuulubale dhowoopiha, ni dhitoonyihedho dhuulubale dhodheela odhulu.

¹²“Dhihineereye dhego dhaatedhene nda, enoodha yuuhiddegeni ni wuurabulihani, yuuthukulelegeni omuladduni mu nyuba dha matugumano dha aZhudewu^h ni wuufugelani mukaambura, munoodha mpelekiwege vameentoni va mamwene ni va makuminadori, mwaha wa ndina naaga. ¹³Nda dhinoodha dhuupadduweleni wi mukanne mpatha wogiiwela onamoono. ¹⁴Mulibe murima kamukathamihaye yoo-funa waakula. ¹⁵Vowi miyo ginodha guuvaheni madhu ni tthottho wi amwiiddani eenyu kidha ekoodda naari ovaanya. ¹⁶Ababiinyu, addibilinyu, amudhiinyu ni akwiinyu enodha yuupelekegeni. Amohiwa mwa nyo enodha epiwe. ¹⁷Aatene enodha yuwiiddegeni mwaha wa ndina naaga. ¹⁸Mbwenye kamudha muyelega naari nthithi nimohi na mmuruni mweenyu. ¹⁹Mwavilelave, munoodha mpure egumi yeenyu.

²⁰“Teto mudha mmoonno Zheruzalemi arijiwa ni anyakoddo, munone wi obwanyuliwa waaye ohaaddamela. ²¹Vano ale enaakale oZhudeya ethawelege mmwaangoni, ale enadha ekale muluwani, ekumemo, ale enadha ekale mmamidda enadha evolowe muluwani mwa. ²²Vowi malabo ayo enadhe ekale malabo agoyi wi dhaakwanele dhaatedhene dhilebiwe.

^h **21.12** Nyuba dha matugumano dha aZhudewu Nda mu ewogelo ya eGerego dheeriwa sinagoga. Mabasa eewa kayaali oolobelamoove, naari osuuzamo Malamulo, mbwenye teto yowaathongamo athu yahaaharihamo Malamulo a aZhudewu.

²³Ooddilu ba ahiyana enaakalena wari mudhidhi oyene teto wawaamwihaha ahima! Vowi onodha okale goyi, okubanya wuulubale mwiilaboni ya vati ni owali wa Mulugu wa athu ala. ²⁴Enodha epiwege ni masupaadda, amohi enodha ecedheliwege dhilabo dhaatedhene. Zheruzalemi athu oode enodha emunyingalele ofiyedha waakwanela mudhidhi wa athu oode ale.

²⁵“Onoodha wooneye dhitoonyihedho vanduwani, vamweerini ni vattendderini. Veelaboni ya vati vinoodha vikale masooso ni makathamiho wa athu a milogo, othuusiwa ni okukuma wa mahinje a munyaza ni kuluzi. ²⁶Athu aatene enoodha ehileyege ni woova yuubuwelaga dhinafuna opadduwa mwiilaboni vowi kopolo dha odhulu dhinoodha dhithikeye. ²⁷Vano athu aatene enoodha emoone Mwaana a Muthu adhaaga mmuraboni ni owodha ni nthithimiho nuulubale. ²⁸Mwadha moona dhipadduwaga dhego dhedhi libani mirima, muthukule kove dheenyu vowi wooboliwa weenyu ohaaddamela”.

²⁹Yesu ahawaaddelaga musibe mmohi, wiira: “Mwamoona namutaa-mbwiⁱ ni mithanko dhimohi. ³⁰Dhambeela opwedheya, nyo munonona wi elimwe ehaaddamela. ³¹Mwa mukalelo mmohive nyo mwadha moona dhego dhedhi dhipadduwaga, munone wi Omwene wa Mulugu ohaaddamela.

³²“Ebaribareene ginowuwaaddelani wi nlogo nenddi kannamale nda dhaatedhene dhihinapadduwe.

³³“Elabo ya vati ni odhulu dhinoodha dhimale, mbwenye madhu aaga kidha emala.

³⁴“Pole-pole, mirima dheenyu dhihikale dhoolodhowa ni mathanga, olezela ni ozuzumela dha elabo ya vati, wihina nlabo nenddo nnoodheeleni moorurumusa wona musapa. ³⁵Vowi nnodha naadheele athu enakala elabo yaatene ya vati. ³⁶Mwiyiing'anele mudhidhi waatene ni olobela mwaha wi mukalena kopolo dhoorabelana dhego dhaatedhene dhineereyege ni wiimela vameentoni va Mwaana a Muthu”.

³⁷Yesu oosuuziha malabo maatene munyuba ya Mulugu, mbwenye vakala mahiyu, ookuma odhowa okalaga omwaangoni oneeriwa Olivera. ³⁸Vano athu aatene yoodhowa bebeheene wi yakale ni oliye munyuba ya Mulugu wi yamwiiwege.

Zhuda onowiiwanana ni apogo a aZhudewu dhoompeleka Yesu
(*Matewuzhi 26.1-5,14-16; Maruku 14.1-2; Zhuwawu 11.45-57*)

22 ¹Mudhidhi wa Othabela wa Mikaathe Dhoohuheliwa Emela, weeriwa Paxkwa,^j aaddamelaga. ²Apogo a anamakutha ni anama-

ⁱ 21.29 Naari wi: *namutaambu*. ^j 22.1 Paxkwa yaali mathanga oofuneyesesa a aZhudewu. Moone Okuma 12.1-27. Vowi Yesu avenyihwe nlabo nenddo na Paxkwa, hiyo dhiinova Paxkwa eehu nnathabela ovenyihwa wa Yesu muukwani.

suuziha a Malamulo yoosayelaga mukalelo wowi empe Yesu, mbwenye yowawoova athu. ³Vevale Sathana ahivolowaga mmurimani mwa Zhudasi a oEsikariyothi,^k mmohi mwa anamasuuzaa aaye kumi ni abili. ⁴Oliye ahidhowa ogumana ni apogo a anamakutha ni ale yaang'anela nyuba ya Mulugu wi yeewananele mukalelo woompeleka Yesu. ⁵Aliwa veewiliwa dhedho yahidhiveliwaga, yahimuroromeliha omvaha korowa. ⁶Zhudasi ahirumeedhela, wambeela osayela mpatha wowi ampeleke anamwinji ehilivo.

Yooja ya Nabwiya

(*Matewuzhi 26.17-35; Maruku 14.12-31; Zhuwawu 13.18-30; Zhuwawu 13.36-38*)

⁷Vano nigafiyile nlabo na Mathanga a Mikaathe Dhoozuheliwa Emela vapiwa nibila na Paxkwa. ⁸Yesu ahimuruma Peduru ni Zhuwawu, eeraga: “Kaweni mwasasanyedhe dhooja dha Paxkwa wi nije”.

⁹Aliwa yahimukohaga, wiira: “Munafuna nasasanyedhe waani Mathanga a Paxkwa?”

¹⁰Yesu ahawaakulaga, wiira: “Mwaavolowaga muluwani, muneere ogumanana mulobwana agathukule muno wa mahinje. Mmuharege vaade vineeriye avolowe. ¹¹Mmukohe mwiinya a vaade, mwiire: ‘Namasuuziha onakoha: suubi a alleddo wi gijemo Mathanga a Paxkwa ni anamasuuzaa aaga oli waani?’ ¹²Oliye onowuwoonihani suubi mulubale a vadhulu, mwemo muli dhaatedhene dhoofuneya vamathangani, musasanyedhemo dhoojadha”.

¹³Aliwa edhowaga yahifwanya dhaatedhene wona mwawaaddelege Yesu. Vevale yahisasanyedha Mathanga a Paxkwa. ¹⁴Vano mudhidhi ogaakwanile Yesu ahikaraatigi vameeza vamohi ni arumiwi aaye. ¹⁵Ahiwogaga, wiira: “Ginofuna vajinjivene wi nimuje vamohi Paxkwa ola gihinoone dhoovoreya. ¹⁶Ginowuwaaddelani wi kagidha gimuja mmohi ofiyedha aakwanelihiwe muuMweneni wa Mulugu”.

¹⁷Ageere ndo ahimuthukulaga nakoma^l a vinyu, otamaalela, wiira: “Mwaakeleni mmugawane mwaatene mukaleliinyu. ¹⁸Ginowuwaaddelani wi kagidha gimung'wa vinyu dila emohi ofiyedha odha Omwene wa Mulugu”.

¹⁹Vano ahithukulaga mukaathe, omutamaalela Mulugu, ogwaddanya wawinka, wiira: “Ola bu mwiili waaga onavahiwa wa nyo; mwiiregenave ela muguubuwelelaga”.

²⁰Vooharela, ahimuthukulaga nakoma, ovahedha mahala, wiira: “Ola di nakoma a nipangano no waandana nixa na mwazi waaga onakuthuleliwa wa nyo”.

^k 22.3 Esikariyothi mu ewogelo ya eGerego enatapulela wi “muthu a oKariyothi”.

^l 22.17 Naari wi: *kopo*. Moone teto maverisikulu 20.

²¹ “Mbwenye moone, muthu ole onafuna ogiguliha oli ni miyo vameeza veva. ²² Ebaribareene, miyo, Mwaana a Muthu, gineere opiwa wona mwafuneyeliwa, mbwenye oddilu oli ni muthu oyene onaagigulihe!” ²³ Vano arumiwi yahambee-laga okohana vakaleligiisu, yiiraga mwa aliwa wi eerena dhedho baani.

²⁴ Teto wahikalaga ovaanyihana vakaleligiisu, yiiraga wi mwa aliwa aali oofuneya baani. ²⁵ Yesu ahawaaddelaga, wiira: “Mamwene a athu oode enowaajela athu eewa; ale enaalamula enerriwa anameerana dhapama. ²⁶ Mbwenye nyo kamunaakale ndo. Moohiyaniha, mpogo mwa nyo onaakale wona mung'ono. Vano ole onasogolela onakala wona ole oneemelela. ²⁷ Ki oofuneya baani: di ole oli vameeza naari ole oneemelela? Kahuwo ole onaja vameeza? Mbwenye miyo gili vaari va nyo wona ole oneemelela. ²⁸ Nyo muli alene munakalave ni miyo moweewani mwaaga. ²⁹ Wona ababa egisakulele omwene, miyo ginowuu-sakulani ³⁰ wi muje, mung'we vameeza vaaga muuMweneni mwaaga. Muneere okaraati mumpanddoni dha omwene wi mwaathonge malogo kumi ni meenddi a Ezarayeli”.

³¹ Teto Yesu ahiwogaga, wiira: “Simawu, Simawu, woone, Sathana ohuu-waddihedha wi oveetheni wona tirigu.” ³² Mbwenye miyo guhuulobelega wi nrromelo naawo nihithime. Wadha otthwaruwa waalibihe addibilo”.

³³ Mbwenye Peduru ahaakulaga, wiira: “Nabwiyani, gili owiimeleene odhowa ofugeliwa ni nyo, ofiyedha okwa”.

³⁴ Vevale Yesu ahiiraga: “Ebaribareene ginowuwaaddela mahiyu ale-na a peeno mutubi ahinandde ‘Kokoliko’, oneere ogikoodda dila thaaruiiraga kuginonile”.

³⁵ Vano Yesu ahaakohaga anamasuuzaa aaye, wiira: “Voorumiliimini voolenddoni giiraga wi kamuthukule thumba na korowa, naari thumba na olenddo, naari sapatho; yahikalavo yoohaleleni?”

Aliwa wiira: “Kanhaleeliwe yego”.

³⁶ Oliye wawaaddela, wiira: “Mbwenye dhiinova winna thumba na korowa athukule ni thumba na voolenddoni; ole ohinna supaaadda, agulihe yowiikuneelana yaaye wi agulena naaye. ³⁷ Ginowuwaaddelani wi enofuneya dhigipadduwele dhedho dhilebiwe: ‘Wi oliye oneere otaganyihedhiwa ni anameerana dhabure?’” Ebaribareene dhaatedhene dhinawoga dha miyo dhinofuneya dhaakwanelihiwe”.

³⁸ Aliwa yahimwiirelaga: “Nabwiyani, nihikanna masupaadda meenddi ala!” Waakula, wiira: “Baahi, ehaakwana”.

Yesu onolobela vaMwaangoni wa Olivera (Matewuzhi 26.36-46; Maruku 14.32-42)

³⁹ Vano ahivenyaga odhowa oMwaangoni wa Olivera wona moolemeelela ni anamasuuzaa aaye vamohi. ⁴⁰ Egafiyile mburo wasakuliwe,

^m 22.31 Oveethiwa wa tirigu onafwanafwana wona oveethiwa wa mbuga. ⁿ 22.37 Ezaya 53.12.

ahiiraga: “Lobelani, mulobaga wi munaamorele moweehiwani”. ⁴¹Ahisusedhaga vang'ono, olapelawa wona vinamorela nibwe muthu avoka, ahikokoraga wambeela olobela. ⁴²Alobelagave, ahiiraga: “Babani, mwafuna girabeliheni nakoma^o a goyi ola, mbwenye ohiireye ofuna waaga, wiireye ofuna weenyu”. ⁴³[Vano mungero a odhulu ahimooneyelaga wi amulibihe mmurimani. ⁴⁴Yesu agali mmasoosoni, oolobelagave ni kopolo. Nikurumela naaye naaligi wona mathotho a mwazi waddonddelaga vati.]

⁴⁵Agamalile olobela ahiwelela waaligi anamasuuzwa ale araaru, aafwanylege egonaga, wovi okubanya weewa wahitthabwaga. ⁴⁶Oliye wiira: “Munagonela ddi? Mvenye, mulobele wi munaamorele moweehiwani!”

Omagiwa wa Yesu

(*Matewuzhi 26.47-56; Maruku 14.43-50; Zhuwawu 18.1-11*)

⁴⁷Yesu awogagave yahifiyaga athu ajinjeene ni mmohi wa anamasuuzwa kumi ni abiili, ole eeriwa Zhudasi, aaligi vasogolo. Ahisusedhaga vaaligi Yesu wi amulojele ni bezhu. ⁴⁸Yesu ahiwoga ni oliye, wiira: “Zhudasi, onafuna ompeleke Mwaana a Muthu ni ombezhari?”^p

⁴⁹Vano anamasuuzwa a Yesu yamwaapeelelege vevale yoonaga dhafunaga opadduwa, yahimukohaga, wiira: “Nabwiyani, munofuna naaporose ni masupaadda eehu athu ala?” ⁵⁰Mmohi aaligi vevale ahixomolaga supadda omporosana mwiimeleli a musogoleli a anamakutha. Ompadha nibaru na omoononi wooja.

⁵¹Yesu waahiiha, wiira: “Baahi! Hiyani!” Oliye okahinya nibaru, ovoliha.

⁵²Vano Yesu ahiwogaga ni apogo a anamakutha, anamaang'anela a nyuba ya Mulugu ni makolo a mutugumano, yadhiilege wi emwihidde, wiira: “Nyo munadha ni masupaadda ni golomondo wi mugihidde wona gili mbava? ⁵³Malabo maatene gakala ni nyoovo nyuba ya Mulugu, mbwenye kamugihiddile. Mudhidhi ola bweenyu. Si kopolo dha mwiipipini”.

Peduru onokoodda wi ohumunona Yesu

(*Matewuzhi 26.69-75; Maruku 14.66-72; Zhuwawu 18.15-18,25-27*)

⁵⁴Vano egamwihiddile Yesu, yahimudhowana vaade va musogoleli a anamakutha. Peduru egi waahara volapelavene. ⁵⁵Yahitubaanyaga munddo vathaddo aatene okaraati. Peduru ahifiyaga mburo olene okaraati ni aliwa. ⁵⁶Mwiimeleli mmohi a namwali ahimoonaga Peduru vakaraatiligiye vooneyelaga munddo, omusugwesesa, wiira: “Mulobwana ola akala ni oliyeene!”

^o 22.42 Naari wi: *kopo*. Nakoma etoonyihedho ya owali wa Mulugu. Moone Ezaya 51.17,19,22; Zheremiya 49.12. ^p 22.48 Olojela omohi.

⁵⁷Mbwenye Peduru ahikooddaga, eeraga: “Asa! Mwihiyana we, miyo kagimunonile”.

⁵⁸Vigavirile mudhidhi vang'onove, mwiimeleli mmohi agamoonile ahiiraga: “Teto we oli mmohi mwa aliwa”.

Peduru wiira: “Mulobwana we, miyo kagili”.

⁵⁹Vigavirile mudhidhi wowaakwana wora emohi muthu mmohiya ahikalelaga ntidi, eeraga: “Ebaribareene ola aali ni oliyeene, vowi muGalileya”.

⁶⁰Mbwenye Peduru ahikalelaga ntidi okoodda, eeraga: “Mulobwana we, miyo dhinawogiiwe kaginonile!” Awogagave ndo mutubi ahunddaga: “Kokoliko”. ⁶¹Nabwiya ahirugunuwaga omusugwa Peduru. Oliye wuubuwelela madhu yamwaaddelile Nabwiya owi: “Peeno veva mutubi ahinandde onogikoodda dila thaaru”. ⁶²Vano Peduru ahivenyagavo, odhowa wuunddaga ni okubanya wuulubale.

Anyakoddo enombedda Yesu.

⁶³Alobwana yamwiing'anelaga Yesu yoombeddaga, emuddwadhaga. ⁶⁴Yoomukuneelaga wiintoni waaye ni guwo yiiraga: “Ovuhulele! Wuuddwadhile baani?” ⁶⁵Yoomuwogelaga dhego dhijinjidhene emunyemulaga.

Yesu agali va Pilatu ni Heroddi

⁶⁶Ode ogasile bebeheene, apogo a mutugumano a nlogo na Ezarayeli, apogo a anamakutha ni ale yasuuzaaha malamulo, yahitugumanaga, omuthukula Yesu omudhowana omuthegoni weewa. ⁶⁷Omukohaga, yiiraga: “Akala oli Kirixtu^q ole aroromelihiwe, onaaddele”.

Oliye wawaakula, eeraga: “Naari guwaaddeleni kamunarumeedha. ⁶⁸Naari guukohani, kamunagaakula yego. ⁶⁹Okuma dhiinoveva munomooni Mwaana a Muthu agakaraatile omoononi wooja wa Mulugu winna kopolo dhaatedhene”.

⁷⁰Athu aatene wiira: “We oli Kirixtu ole aroromelihiwe, Mwaana a Mulugu ooreelihiwa?”

Oliye waakula, wiira: “Nyoovo dinawoga wi gili”.

⁷¹Yahiiraga: “Ki ninafunelege ddi onamooni wumohi? Vowi nihiiwa weekiihu dha muwano mwaaye”.

23 ¹Nikuru naatene nahivenyaga vamutugumanoni, omuthukula Yesu omudhowanaga wa Pilatu. ²Vano wewule yahambeelaga omusumela, yiiraga: “Muthu ola nimfwanyile aholosaga nlogo neehu. Ahiihaga wi kipelekege musoko wa Sezari, onawoga wi oliye di Kirixtu^r aroromelihiwe, teto di mwene”.

^q 22.67 Kirixtu mu ewogelo ya eGerego enatapulela *Muthikitheliwi, Misiya*, naari wi: *oosakuliwa a Mulugu*, oyene onaavulumuse athu. Moone teto verisikulu 70. ^r 23.2 Kirixtu mu ewogelo ya eGerego enatapulela *Muthikitheliwi, Misiya*, naari wi: *oosakuliwa a Mulugu*, oyene onaavulumuse athu. Moone teto verisikulu 35, 39.

³Pilatu ahimukohaga, wiira: “We oli mwene a aZhudewu?” Yesu ahimwaakulaga, wiira: “Onawoga di nyo”. ⁴Vano Pilatu ahawaadde-la apogo a anamakutha ni anamwinji wiira: “Kagimfwanyilena muladdu”.

⁵Mbwenye aliwa yahikalelaga ntidi yiiraga: “Onowaadugurula athu asuuzihaga Zhudeya aatene obaja oGalileya ofiya wuno”.

⁶Pilatu agewile dho Galileya ahikohaga akala muthu ole aali muGalileya. ⁷Aganonile wi mwene aaye di Heroddi, ahimusukumela wa Heroddi. Mudhidhi oyene, Heroddi akalaga oZheruzalemi.

⁸Heroddi agamoonile Yesu, ahihagalala vajinjivene vowi oofunesesa omoona wambeela wale. Mooligana ni dheewiye dha oliye, oojejihedha wi oneere wiirana ntikiniho. ⁹Ahimukohaga moohiyana-hiyana, mbwenye Yesu kamwaakulilege yego. ¹⁰Apogo a anamakutha ni ale yasuziha malamulo yaaligi vevale, yegi omusumela ni dhego dhijinji. ¹¹Vano Heroddi ni anyakoddo aaye yegi omvevusa embeddaga. Yahimuwarihaga yoowara ya omwene, omuwelihedha wa Pilatu. ¹²Nlabo nenddo Pilatu ni Heroddi, yahaandanaga vowi wale yahiiddana.

¹³Vano Pilatu ahaatugumanyaga apogo a anamakutha ni asogoleli ni nlogo, ¹⁴wawiirela: “Nyo munogidheelana muthu ola wona namaholosa nlogo, gigamukohile vameentoni veenyu kagimfwanyilena muladdu omusumeleliinyu. ¹⁵Naari vang'onong'ono, Heroddi kamfwanyilena muladdu, wofwanelela opiwa, bu mwahaya omuweliheliye wa hiyo”. ¹⁶Vano miyo ginomu waxuliha, geera ndo gimutapule. ¹⁷[Mudhidhi wa Paxkwa ahilemeelela omutapula oomagiwa mmohi.]

¹⁸Anamwinji aatene yookuwaga, yiiraga: “Mumpe ola, mmutapule Baraba!” ¹⁹(Baraba ola afugeleliwe ni mwaha wa ovuruvuru muluwani teto ni ompa muthu.)

²⁰Pilatu afunagave wi amutapule Yesu, ahikalelaga ntidi owoga ni aliwa. ²¹Mbwenye aliwa yegi okuwa: “Mmukomele! Mmukomele vamuraddini!”

²²Vano dila ya neethaaruu ahaakohaga, eeraga: “Yabure wiiriliyena ddi? Ebaribareene kagimfwanyilena muladdu wofwanelela okwa, ginomu waxuliha nuwindo gimutapule”.

²³Aliwa yoolibihedhaga okuwa vajinjivene wi mukomeleni vamuraddini. Okuwa weewa wahambeelaga ogonjiha. ²⁴Pilatu orumeedha yooloba yeewa. ²⁵Omutapula ole yamulobigiisu afugeleliwe mwaha wa ovuruvuru ni ompa muthu, vano ompeleka Yesu moofuna mweewa.

Okomeliwa wa Yesu vamuraddini

(Matewuzhi 27.32-44; Maruku 15.21-32; Zhuwawu 19.16-27)

²⁶Emudhowagana Yesu, yahimwihiddaga muSirenewu eeriwa Simawu, akumaga mmavade, omukapathiha muraddi wi amuharegena Yesu.

27Yegi omuhara athu ajinjeene, a nlogo ni ahiyana yakukuthaga vathimarimani emuunddelaga. 28Mbwende Yesu ahirugunuwaga, wiira: “Ahiyana oZheruzalemi kamuguunddele miyo; mwiyuunddele weekiinyu vamohi ni aniinyu! 29Vowi malabo enodha eneriwege: ‘Oreelihiwa baale chinabala, ehibalile, naari ehaamwihile!’

30“Malabo ayene enodha yambeele wiirela mwaango: ‘Nibidhuwele hiyo!’ Vano epathakala: ‘Nikuneele hiyo!’”^s 31Ki akala muthanko mukiiti, onowiiriwana ndo wowumma onadha wiiriwena havi?”

32Yahithukuliwaga amohiwa abili, yaaligi anameerana dhabure vamohi ni Yesu wi yoonihiwe goyi yooopiwa. 33Egafiyile mburo weeriwa “Egarigadhi”, vevale yahimukomelaga vamoraddini oliye ni abili ale, mmohi omoononi wooja, mmohi wuung'otoni. 34Vano Yesu ahiiraga: “Babani, aleveleleni [vowi kinonile dhineeriisu]”. Yahombezelaga gari, voogawana dhoowara dhaaye.

35Nlogo naaligi vevale negi, woona dhaatene, apogo yegi ombedda, yiiraga: “Waavulumusa athu amohi, wiivulumuse weeka akala ebaribareene oli Kirixtu, oosakuliwa a Mulugu”.

36Teto anyakoddo, yoomunyemulaga yahimwaaddamelaga wi emvahe vinyu oonyuunya, yahiiiraga: 37“Akala we oli mwene a aZhudewu wiivulumuse weeka”.

38Vadhulu vamoraddi vahilebiwaga: “OLA DI MWENE A AZHUDEWU”.

39Mmohi wa anameera dhabure yakomeliwigiiyena oomunyemulaga oliye, eeraga: “We kuli Kirixtu, ole aroromelihiwe? Wiivulumuse weeka vamohi ni hiyoya”.

40Mmohiya ahimwaakulaga, omusumulula, wiira: “Hiyo nigali othongiwa vamohi ni oliye, we kunamoova Mulugu? 41Hiyo nihifwanelele orabula mwaha wi nnalivela dhabure dheriihu. Vano ola keerile yego yabure”.

42Aheenjedhedhaga, eeraga: “Yesu, mwaguubuwelele mwavolowa muuMweneni mweenyu”.^t

43Yesu ahimwaakulaga, wiira: “Ebaribareene ginowuwaaddela peeno veva onakala vamohi ni miyo mburo wooriya odhulu”.

Okwa wa Yesu

(*Matewuzhi 27.45-56; Maruku 15.33-41; Zhuwawu 19.28-30*)

44Mudhidhi waaddamelaga, wa wora ya neekumi nabiili ya mutana yihihi yahikuneelaga elabo yaatene ofiyedha mudhidhi wa neethaaruu wa ciguwo. 45Guwo yagawa nyuba ya Mulugu^u yahitaleeyaga vaari ni vaari,

^s 23.30 Ozeya 10.8. ^t 23.42 Dhoolebiwa ni madada dhimohi kadhineera: “Yesu, mwaguubuwelele mwavolowa muuMweneni mweenyu”, mbwende dhini: “Yesu, muguubuwelele mwadha mudha wona Mwene”. ^u 23.45 *Guwo yagawa nyuba ya Mulugu yaali guwo yatomeyiwe munyuba ya Mulugu yagawa Mburo Woweela ni Mburo Wowelesesa. Moone Okuma 26.33.*

ng'ee! ⁴⁶Yesu ahikuwaga ni ndhu nootaama, eeraga: “Babani, ginopeleka mmadadani mweenyu muneba waaga!” Nuuwoga madhu ala, okwa. ⁴⁷Sinturiyawu’ aaligi vevale vowoona nde ahimutamaalaga Mulugu, eeraga: “Ebaribareene muthu ola aali ooharihamo”. ⁴⁸Muthithi wagu-manilege woonelaga dhowiireya nde wahivenyagavo nuwiikubanyiha ekukuthaga vathimarimani veewa. ⁴⁹Vano ale yamunonilege Yesu, vamo-hi ni ahiyana yamuharaga okumela oGalileya, yahikalagave voolapela vene yoonelaga dhowiireya nde.

Ologohiwa wa Yesu

(*Matewuzhi 27.57-61; Maruku 15.42-47; Zhuwawu 19.38-42*)

⁵⁰Ahikalawo mulobwana mmohi eeriwa Zhuuze. Aali muthu apama, ooharihamo, mmohi a anamathonga a aZhudewu. ⁵¹Kaadhiveliwena dheerile nikuru ndde. Aali mukadda Arimateya mudhi mulubale wa oZhudeya. Oojijhedha Omwene wa Mulugu. ⁵²Ahidhowaga wa Pila-tu, omuloba mwiili wa Yesu. ⁵³Ovenyihavo vamuraadini, ohuruwedha ni guwo yoweela ya liinyu. Ohela munsiyeni natopiwe vanibwe-ni wona nikungu. Nsiye ndde mwaali muhunaheliwege muruthu. ⁵⁴Naaligi nlabo noosasanyedha, omambeeelo wa sabuddu.

⁵⁵Ahiyana yakumilege oGalileya ni Yesu yahidhowaga woona nsiye ni ologohiwa wa mwiili wa Yesu. ⁵⁶Yahivenyaga odhowa osasanyedha dhoonukwela ni makura. Nlabo na sabuddu yahivumaga mooligana ni Malamulo.

Ovenyihwa wa Yesu muukwani

(*Matewuzhi 28.1-10; Maruku 16.1-8; Zhuwawu 20.1-10*)

24 ¹Nlabo nowambeela na sumaana ebembe mbee ahiyana yahidho-waga onsiyeni. Yahithukulaga dhoonukwela dhasasanyedhigiisu. ²Yafwanyilege nibwe nigapigirisiwe vansiyeni. ³Egavolowilemo kayafwa-nyilegemo mwiili wa Nabwiya Yesu. ⁴Aliwa kayanonaga dhafunigiisu wiira, yahisimwelaga. Yuubuwelagave, yahikumelelaga alobwana abiili, dhoowara dheewa dhegi ozherimela. ⁵Ahiyana ale yahikannaga woova wuulubale. Yahiworomihedhaga kove vati. Alobwana ale yahawaaddela-ga, wiira: “Munamusayelega ddi mugumi vaari va anookwa? ⁶Oliye mu kalimo! Ohuvenyihwa! Muubuwelele madhu yowogiliyenaani mukalaga oGalileya. ⁷Yeeriliye Mwaana a Muthu oneere opelekiwa mmadadani mwa athu oothega, akomeliwe vamuraadini, nlabo na neethaaruu avenyi-hiwe”. ⁸Vano yahuubuwelele madhu aaye.

⁹Egawelilewo onsiyeni yahisorihaga dhego dhaatedhene wa anama-suuza kumi ni mmohi ni wa ale aatene yaaligi ni aliwa. ¹⁰Ahiyana ala

v 23.47 *Asinturiyawu* yaali asogoleli a anyakoddo zana (100) a aRoma.

aaligi Mariya a oMagadala ni Zhuwana ni Mariya, maaye a Tiyago teto ni ahiyana amohi yaaligi ni aliwa, yahisorihaga dhego dhaatedhene wa arumiwi. ¹¹Madhu ala yaali wona eebeweene, aliwa kayaarumeedhilege ahiyana ale. ¹²Mbwenye Peduru ahivenyaga othamagela onsiyeni, agafiyile ahiturumelagamo oonilege guwove baahi dha liinyu. Peduru ahiwelelaga vaade vaaye ootikiniheya mwaha wa dhende dheereyile.

Dhowiireya mundila ya Emawu

¹³Nlabo nimohive nenddo anamasuza abiili yaharaga dila ya murudda mung'onong'ono weeriwa Emawu, olapelana wiwa waali makilomeeturu kumi ni nimohi, ofiya oZheruzalemi. ¹⁴Yegi othapanyedha, dhego dhaatedhene dheereyile. ¹⁵Ethapanyagave ndo, Yesu mwiinyeene ahawaaddamelaga, othaanaga ni aliwa. ¹⁶Meento eewa yahithiitheya, kayamudidelilege.

¹⁷Vano Yesu ahaawogagana, wiira: “Yego ddi yuukathamihileni enathapanyedhiinyu mweeddaga?” ¹⁸Aliwa wiimela ni okubanya nama-suuzza mmohi eeriwa Keleyopa ahaakulaga, eeraga: “We oli muleddo oZheruzalemi wuno onatikina dhiireyile malabo alena evirile?” ¹⁹Yesu ahaakohaga aliwa, wiira: “Epadduwile ddi?”

Vano yahimwaaddelagamo dhende dheereyile: “Dhampadduwele Yesu mu-Nazarethi. Oyene aali mulobwana namavuhulela, owodha mmabasani ni mmadhuni, vameentoni va Mulugu ni vameentoni va athu aatene. ²⁰Vano wona apogo a anamakutha ni asogoleli eehu yahimpeleka wi akoniwe ni opiwa ni omukomela vamuraddini. ²¹Mbwenye hiyo noojejihedha wi aakale oliyeene oobole nlogo na Ezarayeli teto mwa dhaatedhene, ala malabo maraaruru dhego nda dhipadduwiliwa. ²²Mbwenye teto ahiyana amohiwa yaali ni hiyo ehinitikiniha, voomaruwa njijiji noomaselo edhowaga onsiyeni. ²³Vano kifwanyilemo muruthu wa Yesu, owelawo yiiraga: ‘Nihifwanyiwa maroho a angero, ayene esorihile wi Yesu mugumi’. ²⁴Ebaribareene amohiwa a mwa hiyo yahidhowa onsiyeni, wona ebaribariya dhawogile ahiyana ale mbwenye kiyamoonile”.

²⁵Yesu ahiwoga, wiira: “Nyo muli wona oolodhowa oonyemela mirima wi muroromele ni orumeedha dhiwogile anamavuhulela! ²⁶Kamunonile wi yaali yoofuneya Kirixtu” onnihiwe goyi avolowe munthithimihoni naaye?” ²⁷Vevale ahambeela waatapulela dhilebiwe dha oliye mmalebani maatene wambeela maniivuru a Mozezi ofiyedha mmaniivuruni a anamavuhulela aatene.

²⁸Yaaddamelaga murudda wadhowigiisu Yesu eeddaga wona onafuna akwaranye. ²⁹Mbwenye aliwa yahiiiraga: “Kamukwaranye vovi ohuriba. Nduwa nihidhowa”. Oliye ovolowa okala ni aliwa.

³⁰Egakaraatile vameeza ahithukulaga mukaathe, ovahedha mahala, opadhula waagawela. ³¹Mowaaguva meento eewa yahifuguwaga omudi-

^w 24.26 *Kirixtu* mu ewogelo ya eGerego enatapulela *Muthikitheliwi*, *Misiya*, naari wi: *oosakuliwa a Mulugu*, oyene onaavulumuse athu. Moone teto verisikulu 46.

dela wi di Yesu ahinaanelaga vameentoni veewa. ³²Yegi owoga mmohi ni mukwaaye, yiiraga: “Mirima dheehu kadhathamaga awogiiye mundila anitapulelaga Maleba, kaahi ndo?” ³³Mudhidhi mmohive olene yahimaruwaga owelela oZheruzalemi, waafwanya arumiwi kumi ni mmohi egatugumane ni amohiwa. ³⁴Yiiraga: “Ebaribareene Nabwiya ohuvenyihiwa ohukumelela wa Simawu”. ³⁵Vano alobwana abiili ale yahisorihaga dhawiiireyele mundila, voomudidela ni voopadhula mukaathe ni waagawela.

Yesu onowooneyela wa anamasuza aaye

(*Matewuzhi 28.16-20; Maruku 16.14-18; Zhuwawu 20.19-23*)

³⁶Ewogagave dhego nda, Yesu ahikumelelaga vaari veewa, wiira: “Murenddele okale ni nyo”.

³⁷Aliwa yahirurumuwaga ni woova yeesaga enoona ntowa. ³⁸Oliye waakoha, wiira: “Mukalele ddi owukuuwa ni waanganyedha mmirimani? ³⁹Moone madada aaga ni manyalo aaga. Di miyeene. Mugaababele, mugoone. Vowi ntowa kannakalana mwiili, naari makuva, munagooneliinyu miyo gihikanna”.

⁴⁰Awogagave nda ahawoonihaga madada ni manyalo. ⁴¹Vano aliwa kayarumeedhile mwaha woohagalala ni otikina, Yesu ahiiraga: “Muhukalanaavo yooja?” ⁴²Nuwindo, yahimvahaga epaddi ya somba yowoosa.^x ⁴³Waakela oja vameentoni veewa.

⁴⁴Nuwindo, wiira: “Miyo ngalive ni nyo gahiwoga wi dhineere dhaakwanele dhaatedhene dhilebiwe dhodheela wa miyo mMalamuloni a Mozezi, mmaniivuruni a anamavuhulela ni mMasaalimuni”.

⁴⁵Vano Yesu ahaafugulaga moobuwelelo eewa wi yiiwelelemo Maleba Ootaleleya. ⁴⁶Wawaaddela, wiira: “Dhilebiwe sowi: Kirixtu oneere orabulihwiwa ni ovenyihiwa muukwani nlabo na neethaaruu. ⁴⁷Wi mwa ndina naaye nlalelyiwe, wi athu ethwaruwe mwa dhoothega dheewa, wi elevelelyiwe. Nda dhineere dhilalelyiwe milogo dhaatedhene wambeela oZheruzalemi. ⁴⁸Nyo muli anamoona a dhego nda. ⁴⁹Moone, miyo ginowuurumihedhani nrromeliho na aBaba, mukalegeve muluwani mwemuno ofiyedha muwarihiwe kopolo dhodheela odhulu”.

Yesu onogwela odhulu

⁵⁰Nuwindo, Yesu ahaasogolela okuma muluwani mule, odhowa oBetaniya. Ahaathukulelaga madada wareeliha. ⁵¹Aareelihagave yahimwalanaga, othukuliwa odhowaga odhulu.

⁵²Egamweebdhile, yahuwelelaga oZheruzalemi ni ohagalala wuulubale. ⁵³Yookalave nyuba ya Mulugu, emutamaalaga Mulugu.

^x **24.42** Dhoolebiwa ni madada dhijinji dhini: *Nuwindo, yahimvahaga epaddi ya somba yowoosa ni nikandda na nuwi*. Mbwenye anamasuza ajinji enoobuwela wi ni *nikandda na nuwi* madhu ala kiyalebiwe ni Luka.